

ASO LUA, 1 FEPUARI 2022

Na toe faaauau Taulumaga a le Fono Aoao Faitulafono i le itula e 2:00 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2021/2022.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Ua tuanai le soliatu ma ua faliu foi le la i le tauafiafi, ae o lo o agalelei pea le Atua e ala i Lana faamalologa i le paia o le tatou Maota. Ua toe taliu mai foi i le tatou malologa. E i ai foi le talitonuga ua maua se faasiliga malosi e faaauau ai le tatou galuega, faamalo le usufono, faamalo le onosai i le mamalu o le Palemene.

E faataatiaese a tatou Taulumaga i le itula e 1:00 ua maea ona saunoa le Afioga i le Minisita o le Soifua Maloloina e talifuaitau foi i mataupu sa laga i saunoaga a sui usufono mamalu.

Ia o lea ua oo atu le tatou faasologa o tali a le Malo i lau Afioga i le Minisita o Leoleo ma le Ola Toefuataina. Ou te tapa ma le faaaloalo lau Afioga mo lau saunoaga.

Afioga Hon FAUALO HARRY JEFFREY SCHUSTER (Minisita o Leoleo ma Falepuipui): Faafetai lau Afioga i le Fofoga Fetalai mo le avanoa. Ou te faatulou atu i lau Afioga ma le mamalu o le Ofisa o le Fono. E faatulou atu foi i le Afioga i le Palemia ma le Aiga Kapeneta, Minisita Lagolago ma sui usufono mamalu foi o lenei Itu o le malu.

E faatulou atu foi i lenei Itu o le malu i sui usufono mamalu o le Itu Agai. E faapea foi ona faatulou atu i le paia o Ofisa Sili o Pulega o Matagaluega ma Faalapotopotoga a le Malo o lo o tatou faatasi.

Ia, e faatalofa atu foi ma faatulou atu i le faafofogaaga ma le tapuaiga a Samoa i ona tulaga faalupe, i ou paia faale-Malo, paia faaleaganuu, ia, paia faale-Ekalesia.

Lau Afioga i le Fofoga Fetalai, faafetai tele lava mo le avanoa ou te tulai atu ai mo au ma le Afioga i le Minisita Lagolago, le Afioga i le sui usufono ia Fepuleai Faasavalu, o lo o ma auuana i le Matagaluega o Leoleo ma le

Ola Toefuataina, o le Fui Mu ma le uluai Auaunaga o Laveai Muamua o Faalavelave Faafuasei, faapea foi le Ofisa o le Komesina o Faiga Palota. Ia, e ui o le autu o le tulai atu o le tali i le fesili a le mamalu o sui usufono na tuuina mai, ae momoli atu i tali ia le agaga faafetai. E muamua le agaga faafetai lau Afioga, e faafetai atu i sui usufono mamalu uma lava sa fautua mai ma aumai foi timaiga ma mafauauga faapea le tuusao mai o manatu e fesoasoani ai foi i le auaunaga i nei Matagaluega e 3 o lo o ma auauna ai.

Faafetai atu foi lau Afioga i le Fofoga Fetalai. Faafetai atu i si o matou itumalo ia Vaimauga 4. O le paia lava lea i le Alosina, le Aiga Salevalasi, le Faletolu ma le Vainalelepa ma upu ia te oe Tuisamau, i nuu mavae i Apia ma Alamagoto, ae tainane itumalo e 21 o si o matou itumalo. Faafetai lava ia te outou le tatalo ma tapuai mai, faafetai mo le faamalosiua mai. Faafetai atu foi i nai o matou aiga, o uo ma e masani mo le lagolago. E moni pei e foliga foi lea e le faigata tele, e faigata lava mea uma, ae faamoemoe lava i le Alii. Faafetai lava le tapuai mai.

Faafetai foi lau Afioga i le Fofoga Fetalai. E momoli lau faafetai tele lava i Ofisa Sili o Pulega o Matagaluega uma lava a le Malo i le latou tautua ma le fautua mai foi i le faigamalo, aua o latou lea o lo o i ai le tomai i Matagaluega taitasi. E leai se isi o matou e i ai se poto i mea uma lava o galuega a le Malo, o le poto ma le atamai lea e i Matagaluega a le Malo ma Ofisa Sili o Pulega o le Malo.

Ia e faapitoaugafa se faafetai i le Matagaluega o Leoleo i le auaunaga i le foi o lo o tauaveina tiute faa-Komesina i lenei taimi ia Auapaau Logoitino Filipino e faapea foi le Afioga ia Tanuvasa Petone Mauga mo le Pulega o Fui Mu. E faapea foi ona faafetai atu ia Unasa Charles Ah Poe mo le Ofisa o le Komesina o Faiga Palota. Malo lava le galulue.

Faamalo lava i le Komiti o le NEOC, faafetai tele lava ia te outou i le galuega fita ma le faigata o lo o feagai ma outou i lenei taimi. Ae faapito foi se faafetai i le Komesina ma le Matagaluega a Leoleo faapea foi Fui Mu. Ou te lagona e faigata le auaunaga a le Komiti o le NEOC ma e o lo o latou faafoeina ae ou te talitonu foi, o leoleo lava e aupito sili ona faigata le galuega o lo o latou faia, ona o tatou tapu lea e avatu mo le puipuiga o le tatou atunuu, e fetoi ma le mea foi lea o le aiatatau. Ia o le toatele lava o le tatou atunuu e lavapapale ma onosai, ae i ai foi isi e tilotilo foi latou i le latou aiatatau ma le mea foi lele e le manao e mulimuli i le mea lea e fai atu ai. E so o se mea lava o le olaga lenei e i ai lava tagata e le savali i le mea la e manao e savali ai. O le mea la lea, faamalo atu lava i le Matagaluega le onosai, e le faigofie la outou galuega, a ia tatou alo i le tulaga e i ai le Tulafono. Ae i ai foi le tatou tu ma le aga e mafai lava ona faafoeina malie ai foi e faafitauli mai.

E momoli atu foi le faafetai tele i le Matagaluega o Tupe faapea lau Afioga i le Minisita ma le Minisita Lagolago o Tupe, e na o le Matagaluega a Leoleo lea e i ai le \$400,000 lea e aumai e fai ai le pa i Salelologa, ae faafetai mo le

tupe ua faaavanoaina mai mo lenei faamoemoe. Ia se i oo i le Tala Autu o le Tupe ona ou aisi atu lea mo le \$50 miliona e fai ai le fale leoleo i o i le mea o lo o i ai nei le headquarters i Apia, ae faafetai tele mo le lagolago.

Faafetai tele foi i lau Afioga i le Minisita mo Galuega Tetele a le Malo lau Afioga Olo, faafetai tele lava mo le alavai lea ua fai i totonu o le matou nuu i Apia, i le alu ifo lea i luma o le fale Ioane Viliamu, ona masalo o le vai tau lea i le 20 ua tea atu, o matou lava lea e matua puapuagatia lava ma isi foi vaega o le taulaga i Apia ma i i Faleata i le lolovai pe a pa mai le Vaisigano. Faafetai mo le galuega lea, e faapea foi le galuega tele i gauta i le vai o Loimata o Apaula, nai aiga na e faasolo mai lava i lalo mai o Motootua seia oo mai i le mea o lo oi ai le auala laupapa i Lalovaea, tasi foi nai ia aiga e tigaina tele pe a pa le vai lea. Faafetai i lau Afioga.

E toa-14 sui usufono mamalu sa afea le Matagaluega o Leoleo i a latou fesili. E ui la i le tele o le fuainumera, o le sui usufono lea mai Aleipata Itupa i Luga, o Falealili 2, Safata 2, Aana 2, Faasaleleaga 5, Faleata 4, Falelatai ma Samatau, Vaa o Fonoti, Aleipata Itupa i Lalo, Aana 2, Anoamaa 1, Satupaitea ma Vaimauga 1. E faafetai tele atu lava i fesili ma manatu na outou faaali, na lilifa a outou fesili i le popolega i le tulaga lea o le faateleina o fualaau faasaina, aemaise lava le fualaau lea o le aisa.

Afioga Leaana Ronnie Posini: Lau Afioga i le Fofoga Fetalai...

FOFOGA FETALAI: Ia, se malologa i lau Afioga i le Minisita, se i tulai mai lau Afioga i le sui usufono mamalu mai Safata 1.

Afioga Leaana Ronnie Posini: Faafetai tele lava i lau Afioga i le Minisita. Leaga o lea ua ou faalogologo atu ua tolaulau mai sui usufono sa faaali o latou finagalo i mataupu tau leoleo i le mea lea o le aisa. A o lea ou te matau atu e le o i ai le sui usufono o lenei itumalo, ae sa mamafa i ai se matou tala. Ma le agaga faaaloalo.

FOFOGA FETALAI: Faafetai. O lea ua faafofoga mai le Afioga i le Minisita le sui usufono mamalu.

Afioga Hon FAUALO HARRY JEFFREY SCHUSTER: E faamalulu atu i le sui usufono mamalu mai Safata, e saolele lava le saunoaga, o lea e i ai uma Safata 1 ma Safata 2. E faamalulu ai foi i le sasi. O lea ou te manatuaina sa i ai lau saunoaga, ma lau saunoaga foi e faatatau i le mea o loli nei soona alu i le atoa i auala. Ae faamalulu atu.

E lilifa lava outou finagalo i le tulaga lea o le aisa ma auupega malolosi. I lau faitau i manatu faaali, e lilifa uma lava manatu i le tulaga foi lea o le vaai alofa i lo tatou atunuu. O le vaai popole, ma le tulituli lava ia aua ne i oo le tulaga lea o le fualaau faasaina e tai pei o le aisa i le tulaga ua i ai isi

faigamalo, ua sosolo faa-faamai le faaaogaina o le aisa, i tagata foi nei e faaaogaina le aisa, ae ua maua foi la i le tulaga lea ua faaaoga e tagata o lo o faatauina le aisa ma auala e maua ai a latou tupe, ae le o se auala e talafeagai ma le Tulafono.

E tutusa lelei lava o tatou manatu i le tulaga lea tatou te le fia oo i se Samoa faapea ua faamoemoe ona tagata i le aisa, a ua tatou le mafai foi ona faatonutonu e o lo o faaaogaina le auala sese lea o le faaaoga o fualaa faasaina e maua ai a latou tupe, ona o le mea sao lava o nei tagata e le o ni tagata lelei, aua e latou te faaaogainasese le vaivaiga faaletagata e aumai ai nei fualaa faasaina, ona uma ifo lea ua maua i le tagata foi lele e taua faapapalagi o addict e faamoemoe i le fualaa lea i taimi uma, ma e se faamai tatou te le o mananao e maua iinei i Samoa. O lo o maua i atunuu i fafo, ae tatou te le mananao e... E saolele lava fetalaiga, e o faatasi lava fualaa faasaina ma auupega malolosi. O le faamaoniga o lea tulaga, ua toalua alii leoleo ua maua ai i le tulaga lea, o le o atu e pue mai e o lo o totoina ma faatauina fualaa faasaina, ae fano ai ma ola o leoleo. Ma e matua moni lava fetalaiga. Ma o le maualuga foi lea ua ave i le Matagaluega i lagona ia tou te aumaia, i le maualuga e tataua ona i ai le mataitu ma tulaga uma ia ma galulue, ia aua ne i oo tatou i se tulaga matuia.

E talia ma le faafetai fautuaga, e saolele lava a outou saunoaga. E le maua ni aisa i Samoa, na o le marijuana e mafai ona maua i Samoa aua e mafai ona o tagata toto. A o le aisa la, mo fualaa eseese e gaosia ai le aisa. O le se tasi o fualaa aupito sili ona manaomia i le faiga o le aisa, o le fualaa foi lea sa taatele iinei i Samoa o le codeine, lea sa i ai le panadeine, ae pei lava ou te tau masalosalo ea e le i toe aumaia ia tatou i faletalavai fualaa lea e i ai le codeine, ona o le tulaga lea e mafai ona faaaoga e le vaega lea e faia le aisa e fai ai le aisa. E saolele lava fetalaiga, na o le pau lava le auala e maua ai le aisa o le aisa e gaosia mai fafo ona aumai lea i totonu o Samoa, po o le aumai o fualaa eseese ia e i ai le codeine ma isi fualaa, ona gaosi ai lea o le aisa ma faatau iinei i Samoa.

E talia le fautuaga ia tagai i le uafu. E ui e le o i ai ni vaalele i le taimi lenei, a ia vaai totoa i malae vaalele, o vaafagota ma vaafaila ia e omai mai fafo, aua na o le pau lea o auala e mafai ona saofia mai ai le aisa ma nisi fualaa faapea faasaina i totonu o Samoa pe a aumai i auala ia. Ma e galulue faatasi le Matagaluega o Leoleo ma le Matagaluega o le Tiute i le tulaga lea i le puipuiina o uafu ma le malae vaalele.

I le tulaga i taifau, ia, e taliaina foi le fautuaga, e manaomia ni taifau e sili atu i lo le fuainumera lea o lo o i ai i le taimi nei. O le taimi nei, e 4 taifau sa i ai, a ua mamate la isi taifau e 2. Sa tailua, e 2 le Customs, 2 le Matagaluega o Leoleo. Ua mate la isi taifau, ae toe 2 la e totoe. Ia a o taifau foi, e faamoemoe i le fesoasoani a le Malo o Niu Sila ona e le faigofie foi le koleniga o taifau ia ia faaaoga e maua ai fualaa faasaina. Ae le gata i lea, e koleni taifau, ae koleni foi la tagata e faapitoa lava alii leoleo ma tamaitai o

le Customs, e koleni e faaaoga ia masani ai le taifau i le taimi foi lea e o ai e faaaoga e pue mai ai le aisa. Ma ua uma ona faaoo e le Matagaluega le talosaga i le tatou Matagaluega o le Va i Fafo, e faatalosaga foi i Niu Sila. Ae o le tulaga lea ona e faamoemoe i le fesoasoani mai a Niu Sila, e faamoemoe i ai le maua mai ai o ni taifau. A o se tasi lea o vaega taua. A o le mea aupito sili lea ona taua o tatou lava alii ma tamaitai leoleo faapea ma le Matagaluega o Tiute, ia mataala i taimi uma e puipui tatou mai ituaiga tagata ia, aua ua tatou silafia uma lava, e le ni tamai tupe, tupe e maua i fualaa faasaina ma e o le ituaiga mea lea e taumafai i ai tagata ia, o le aumai o fualaa faasaina i totonu o Samoa po o le faaaoga o Samoa e faau atu ai fualaa faasaina e alu agai i Niu Sila ma Ausetalia. Tatou te le oo la i lea tulaga, ae faafetai tele lava mo fautuaga na tuuina mai i ia vaega.

I aupega faasaina, o lo o taumafai lava leoleo e fai tulaga foi lea o e o lo o i ai fana e le o laiseneina e tatau ona aumai i totonu. Ma o lo o taumafai foi le Matagaluega e faafaigofie i e e talafeagai ona ave i ai o aupega e laisene, pei o tatou faifaatoaga, ma e o lo o i ai i le taaloga foi lea o le fanafana. Na pau na o tagata o lea e tilotilo i ai le Matagaluega pe a talosaga mai i ni laisene mo aupega malolosi.

Sa afea e le sui usufono o Aleipata Itupa i Luga faapea le Vaa o Fonoti, o Anoamaa 1 ma Anoamaa 2, Falealili 2 ma Gagaemauga 2 se tulaga i se fale tinei mu ma se taavale tinei mu mo latou itumalo. O lo o i ai le fuafuaga a le Matagaluega, o lo o tilotilo i tulaga ia. Na pau le mea e talosaga atu e onosai, ia leaga e fuafua lava le faatuina o fale tinei mu i tupe maua. Ia o lo o tilotilo le Matagaluega foi lea i se vaega e mafai ai ona tele le auaunaga tau fesoasoani i tua i Savaii ma iinei i Upolu, e tau faasoaso faapena. Ae o galuega foi a le Matagaluega lea ua i ai, e aofia ai ma le fesoasoani foi lea le uluai fesoasoani, le ambulance. E o lua lava le i ai i le fale tinei mu ma le i ai o le auaunaga lea. Ma o se tulaga lea o lo o tagai i ai le Matagaluega ma le Board a le FESA. O se tasi o tulaga foi o lo o fai si faigata i le ambulance, e tatau lava pe ana faapea o le ituaiga lalolagi foi lea o le tatou tusi siaki o le matua tele lava, e tatau lava ona tofua le fire service ma ni paramedics foi lea e kava le 24 itula. O le taimi nei, na o le tasi lava le tatou paramedic ua iu mai Ausetalia, e manaomia la nisi e koleni faa-paramedic, o lea la e ogatusa lava ma isi talosaga foi lea e mili lava le... a tatou vaai foi fua i fomai e manaomia ma tamaitai tausimai ma isi uma lava auaunaga tau soifua maloloina, ia e taufai mili uma lava ma manaoga e sue uma ni tagata faapea, ia e aofia atu ai ma le paramedic, ae le tele tele le tatou tusi siaki. Ia e fuafua lava la i le tusi siaki foi a le Matagaluega o Tupe o tatou manaoga. Ae faafetai mo manatu faaalua, aua o nei auaunaga e taua. E pei ona taua e tutusa uma lava outou manaoga ona o mea o lo o i ai outou itumalo, a tupu ai se mu, e oo atu le taavale mu, ua uma ona mu le fale.

O le sui usufono mo Falelatai ma Samatau faapea foi le sui usufono mo Faleata 4, e i ai a lua talosaga sa faaali mai i le tulaga o le Tulafono o Faiga

Palota. O lo o i ai le tatou Komisi foi lea e iloiloina le Tulafono o Faiga Palota pe a maea so o se faiga palota. O lea la o lo o galulue le Matagaluega. Ua fai si tuai o le galuega a le Matagaluega o le umi o le tatou faiga palota lea na uma atu, o lea faatoa uma atu faiga palota laiti, o lea lava o le a faaalu le malosiaga o le Matagaluega i le faiga o se Komiti lea e iloiloina le Tulafono o Palota, o lea foi la ua maua ai i le avanoa mo tatou uma lava e le gata ia tatou o sui usufono, a o le mamalu foi o le tatou atunuu e fia faasoa i le Tulafono o Faiga Palota po o le a tonu le ituaiga Tulafono tatou te mananao ai e talafeagai mo tatou i le faafoega o tatou faiga palota i le agai atu i le lumanai. O le a maua uma e tatou le avanoa lea. Masalo o se taimi po o totonu o le isi 5 masina ua amata le galuega a le Komisi o Faiga Palota.

Sa i ai fesili a le sui usufono mamalu mai Faleata 1 i mea o taavale ia e i ai pu foi ia matua ova lava le leotetele, ia ma moli ia spotlights ia e le talafeagai mo taavale ia. E saolele lava lau Afioga i le sui usufono. E tele foi lava isi sui usufono ua faaoo mai le tulaga lea. Na o le pau si fesoasoani ona o tagata foi ia e popoto foi e le faaeina le pu pe a latalata mai i le fale o leoleo ae faae i tua. Na pau le mea o le matau ae o le laisene o le taavale ma le taimi lea sa fai ai le tulaga lea, ona lipoti lea i le Ofisa o Leoleo.

O le tulaga i moli, e saolele lava, e faamauina foi le taavale, ae i ai la le tulaga e faatagaina e le Matagaluega a Leoleo taavale e faaogaina e kamupani sikulati, e siaki ai a latou fale ia latou te vaavaaia, latou te faatagaina foi le mamalu o le atunuu lea e i ai latou faatoaga, pa povi, e siaki ai... e faaoga pe a o e siaki a latou faatoaga. Na o le pau lea o tagata lea e faailoa mai e le Ofisa e faataga i ai moli ia.

Lau Afioga i le sui usufono mamalu mai Safata i lau saunoaga i loli ia ma taavale tetele, e sao lelei lava lau saunoaga. E faapena uma lava tatou, atonu lava e leai se isi o tatou lea e i totonu o le Maota lenei ua vaai i taavale ia, e le gata i Apia a o tua, a omai nei loli lapopoa nei e aumai container ma mea, e le tatau ona o i le ituaiga saosaoa la e o ai. E te tilotilo atu lava a tupu se faalavelave faafuasei, e le mafai e loli lapopoa ia ona tu i le taimi e tatau ona tu ai. Na pau se manatu o le Lipoti mai le Matagaluega o Leoleo le taimi ma le numera o le taavale lea ona mafai lea e leoleo ona fai se suesuega i ai i tagata ia e solia lea tulafono.

O le fesili mulimuli o le fautuaga mai le Afioga i le sui usufono mamalu mo Gagaifomauga 1, i le tulaga lea i le faamalosi ma le puipuia o tamaitai ma tamaiti mai sauaga. E tutusa lelei lava o ta manatu lau Afioga, e faapena foi le tele o sui usufono nei, o se tulaga foi lea ua faateleina le tulaga lea o le sauaina o tina ma fanau. Ua i ai Tulafono faapitoa na pasia e le tatou Faigamalo lea na uma atu nei na ave ai le malosiaga i le faamasinoga, na tu faapitoa ai lava le Faamasinoga lea mo Aiga. Na ave foi la ma malosiaga faapitoa i Faamasino o le Faamasinoga lea e mafai ai ona latou faia poloaiga faavavevave lava e faasaina ai se tasi ua tuuaiina ua sauaina se tina po o le fanau mai le toe nofo ai i le mea o lo o i ai, po o le latalata atu foi i le tina po

o fanau o lo o sauaina. O le Tulafono foi lea pei ona faatu e le faigamalo ua tuana'i atu, o lo o i ai ma le suiga ua faia i le Tulafono a Leoleo, ua ave le tiute faapitoa lava i leoleo, e le gata la i le o e faamalosi le Tulafono, a ua ave i leoleo le tiute lea o latou e faamautinoaina. A sau se tina po o ni fanau i se tulaga ua sauaina, e ao ia i latou ona puipuia le tina ma le fanau lea e aofia ai la le tulaga lea le mafai ona latou oo atu i le fale ma le aiga o lo o tupu ai le mea lea ona aveese mai le tina ma fanau ae ave i se isi mea e latou te maua ai le saogalemu. Ma e fou le tulaga lea lau Afioga ma lau Afioga i le Fofoga Fetalai i tiute faaleoleo, e masani lava leoleo ia i le tiute o le faamalosi o le Tulafono ma taloka tagata. A o le tulaga la lea a ou vaai i ai ou te faatusaina pei o se tiute foi lea pei o tiute lea e ave i le Matagaluega foi lea o le Social Welfare, e o e aumai tina ma tamaiti i se mea o lo o sauaina ai fanau. Na pau se manatu, ia, o ou lava talitonuga o au ia, e le taitai talafeagai lea mea o le sauaina e se tama po o se isi lava o se tina po o fanau. E le o se tulaga lelei, ma o se... O le faatumauina ma le faataatiaina e le Faigamalo ua tuana'i atu o le Tulafono lea i le faatuina o le Faamasinoga Faapitoa ma le ave o le tiute faapitoa lava lea i leoleo, o se ata lena e faaali mai ai, e le tataua ona toe tupu lea tulaga, e tataua ona tatou puipui uma i ai. Ma i si ou lava la manatu vaivai, po o le mea ua le oo i le galuega faaopoopo i le agai atu i luma. O se tasi lea o tulaga e tataua ona asia e le pulega mamalu a alii ma faipule i totonu lava o le alaafaga ia, aua o sauaga ia e tupu i totonu o aiga, o aiga e tu i totonu o nuu. E pei la o la e tupu lava, ae na ou ola ae foi au ou tilotilo i le mea lea e fasi mai lava e le next door neighbour lona toalua ae nofonofo lava le matou aiga e leai se matou feau i ai. Ae pei ua tuana'i na taimi, pei ua oo i le taimi foi lea o le agai i luma o le Tulafono lea, e faigofie ona fai o le Tulafono, a o le faigata la o le faamalosi o le Tulafono. Ia o le a faamoemoe la na o le Faamasinoga pe na o leoleo? O le toatele foi o tagata e pei e fefe ma mama e ave se tagi i luma o le Faamasinoga pe ave i leoleo, ona o le tulaga foi lele faapea o le a tauvalea ai le tatou aiga pe a uia lea tulaga. Ia o lea ua oo i le taimi, i tatou alii ma faipule, tilotilo i lea tulaga. A tatou manao e tineia se mea ua vaai i ai le Palemene e le o se mea talafeagai, tatou te manaomia le saogalemu o tina ma tamaiti i taimi uma, ia o le tulaga lea e tataua ona oo i ai.

Lau Afioga i le Fofoga Fetalai, faafetai tele mo le avanoa. Na o le pau lea o nai mea sa fesilisili mai ai...

Tofa Seuamuli Fasi Toma (Gagaemauga 2): Lau Afioga i le Fofoga Fetalai...

FOFOGA FETALAI: Ia, se i malolo mai lau Afioga i le Minisita se i tuu atu le avanoa i o i le sui usufono mamalu.

Tofa Seuamuli Fasi Toma: Faafetai mo le avanoa. E pei o se matagi agimalie le tofa i le Afioga i le Minisita, e tusa ai foi ma le saunoaga ma le tali faaaloalo aua foi nisi o mataupu sa laga e sui usufono mamalu o le Palemene. E leai foi se agaga e faalavelave aua foi le saunoaga matagaofie. E pau lava si vaega sa aafia i se tuualalo a lenei sui usufono, ona o le tulaga i Lipoti foi ia o lo o saina mo galuega faavaitaimi, lea sa avatu ai se talosaga i le Afioga i le Minisita, pe le alagataua ona saina lava i Savaii lipoti ia mo Savaii, e faaititia ai foi le tumu o le ofisa mo Upolu nei, e le gata foi i galuega faavaitaimi a o nisi foi o vaega moomia aua foi tulaga mo i latou e fia faamaonia lipoti mai le Matagaluega o Leoleo. Ia, pe le o le taimi lelei lenei e saunoa mai loa lau Afioga i le Minisita e amata atu nei i le aso ona saina Lipoti ia i Savaii i Tuasivi. Ia, ma le agaga faaaloalo. Faafetai.

FOFOGA FETALAI: Ia tulai mai lau Afioga i le Minisita. Oi, mo le faasaina o le taimi o lau Afioga i le Minisita, se i tulai mai lau Afioga i le sui usufono mamalu mo Safata 1.

Afioga Leaana Ronnie Posini: Faafetai tele i lau Afioga i le Minisita. E pei o lea ua faalogologo lava ma le totoa i le saunoaga a lau Afioga. E momoli atu ai le agaga faafetai tele i le saunoaga manino a lau Afioga. Ae pei na faamamafa lava se tala a lenei itumalo o fualaau faasaina ma le aisa lea ua i totonu o le tatou atunuu, lea foi ua maua e le Ofisa o Leoleo tulaga ia.

Na pau lava le tulaga o mea ia aua o lea ua matau e oo lava foi i le tatou motu i Salafai lea na maua mai ai faatoaga marijuana ia. O lau tatalo aua i lau matau, o le galuega faifaatasi ato a lo tatou atunuu ina ia foia le faafitauli lea, aua ou te faaigoa lava e au ia o se mala ua oo mai i totonu i fualaau faasaina nei. Ae lelei foi ae i ai se avanoa lelei o le tou Matagaluega aua o lea ua tele ina i ai Ofisa o Leoleo i tatou itumalo i tua, e i ai ni taimi e o atu ai i totonu o fonu a nuu e o atu e toe faamalosi. O le pitolaau lea o le pitolaau foi a le pulega a alii ma faipule, pe maua se avanoa e o atu ai malu o le malo e faamanatu pea le mea lea o le solitulafono mamafa. O le ala lea o le matou tuualalo atu, ae ou te talitonu foi e momoli le agaga faafetai i lau Afioga, o lea foi ua uma ona pau le saunoaga a lau Afioga i le Fonu a le tatou Palemene i le Tala Autu o le Tupe, lea ua e saunoa, e le aafia lava lau Afioga i le faatinoina o galuega a le Matagaluega o Leoleo. O lea e momoli atu ai le faafetai tele, malo le tofa i lau Afioga. Ia manuia le Fonu.

FOFOGA FETALAI: Mo le faasaina o lou taimi, se i tulai mai le sui usufono mo Faleata 1.

Tofa Manuleleua Paletasala T. Tovale (Faleata 1): E momoli le agaga faafetai i lau Afioga i le Minisita o lea sa afea e lau faamalamalama nisi o

atugaluga o le sui usufono o lenei itumalo e uiga lea i le pisapisao o taavale i afiafi, aemaise o moli ia pei ona saunoa lau Afioga. Na pau lava le mea lea i lau Afioga, o leo o laau taavale. Na saunoa lau Afioga a i ai ni taavale o faapea ona faalavelave i afiafi i lotu a aiga, ia vaai ifo le laisene, e matau le laisene ma momoli atu. O se manatu o lou sui usufono, e pei e faafaigata ia matou ona matou puea laisene o taavale, leaga o la matou te nonofo mai i o matou fale, matou te le o feoai i le auala. Ae pei o le galuega tonu lea a alii ma tamaitai leoleo o lo o tiute i luga o le auala i le taimi lea. O le puega o taavale ia e faalavelave i luga o le auala i tagata feoai, e ala i taavale ma moli ia ma pu o taavale. E na o se fautua atu i lau afioga i le tulaga lea, i alii ma tamaitai leoleo e faatino le latou galuega lea, o le pueina o latou ia e faafitauli i luga o aualatetele.

O le lona lua o vaega o lau tautalaga, a o feagai foi, o le tulaga lea o taifau. E pei ona silasila i ai lo tatou atunuu, ua amata foi ona faateteleina taifau taaloa i le auala i le taulaga i Apia, aemaise o nuu tutaulaga. E tatalo atu foi i lau afioga, o lea sa i ai le polokalame a le Matagaluega o Leoleo, sa latou faatonutonu ia taifau. O lea e tatalo atu i lau afioga pe le mafai ona toe faatino le vaega lea o le tapue o taifau lea ua tele ina taaloa i alatetele. Ia ma le faaeteetega, o le aafia ai o nisi o tagata savavali i le alatele. Ina ne i te i ua aafia se soifua i se taavale, ne i oso mai se taifau a se aiga i se tamaititi o savali mai i le auala, ae oso, e oso i le auala tele ae fetai ma le sau o le taavale, ona afaina lea o le soifua.

O se faamanatu atu lena i lau Afioga, ae faafetai mo lou avanoa i lau Afioga i le Fofoga Fetalai.

FOFOGA FETALAI: Ia onosai mai lau Afioga i le Minisita se i tulai mai le sui usufono mo Aana Alofi Nu 2.

Afioga Aiono Tile Gafa (Aana Alofi 2): E faafetai i lau Afioga i le Fofoga Fetalai mo le avanoa. E augata lava lenei sui usufono, e faalavelave i le gasologa o le galuega matagofie a Minisita o le Kapeneta, aua le talifuaitau i le tatou Palemene ma finagalo o sui usufono. O lea ua taliga fialogo lava le saunoaga a lau Afioga i le Minisita o Leoleo i lau folasaga malamalama aua tulaga o le galuega. E momoli atu ai lava le agaga faafetai.

E moni sa afea e lenei sui usufono le tulaga o le galuega o laau faasaina. Lau Afioga i le Fofoga Fetalai, ua oo mai le manatu, e toe tepa i tua i le matagofie o polokalame sa feagai ma le Matagaluega agai i nuu ma afioaga, i le faamalamalamaina o soligatulafono.

Sa i ai le Aso Sa sa potopoto ai le matou Pulega mai Lepale Fasitoo-uta seia tau mai i Levi, sa fai ai le polokalame a i, i le toeaina i Levi. O le manaia ia o lena polokalame, o le faamalamalamaina o taiala ma tulaga uma o le Tulafono, ma aiaiga ma faasalaga pe a soli le Tulafono.

O le ala lena o lou toe tulai atu, pe ua 3 ea tausaga talu ai, a o lea foi sa fai i i, i le pito mai. Ae manaia pe a faasolo tailua nuu. E leaga e 7 nuu, o le ala lena o lou tulai atu, e ese le manaia. A o le taimi lenei ua sui foi tagata, a o le empower ina o le Tulafono, faamalosiga. O le mea lena, e aofia uma lava, e oo lava i laau faasina, o laau malosi, o le sauaina o tina ma tamaitai. Sa galulue faatasi foi ma le Matagaluega o Tina ma Tamaitai. Ae talosaga atu i lau Afioga i le Minisita, e manaia, ae e le i tumu le falesa, ona sa fai i le Aso Sa.

O le manaia ia ae toe faatulaga pe a fai e tusa ai ma le finagalo, ma polokalame fuafua foi a le Matagaluega. Ma lou faaaloalo faafetai.

FOFOGA FETALAI: Ia tulai mai lau Afioga i le sui usufono mo Faasaleleaga Nu 5.

Afioga Peseta Vaifou Tevagaena: E tasi lenei mataupu sa ou laga i lau lauga, ae momoli atu le faafetai i lau Afioga i le Minisita. O lau Matagaluega le isi Matagaluega o lo o feagai nei ma fita ma faafitauli, e pei foi o le Matagaluega a le Soifua Maloloina. I le tautua foi a le aufaigaluega, e le maua foi se malologa i le ao ma le po, aemaise o faafitauli lea ua faafeagai ma le tatou atunuu, i le faamai.

Ae sa avatu i lau lauga, tulaga faigata lea e feagai nei ma le Matagaluega, o le tau sailia lava o tagata ma solitulafono. A silasila foi i le mea lea na tupu mai i Vaitele i se tasi o alo o le atunuu, e oo mai lava i le taimi lenei. O lea lava e le i maua po o le a se tulaga ua oo i ai le maliu o se tasi o alo talavou o si o tatou atunuu. O lea na avatu ai se fautuaga, ona o lea ou te iloa, o lea e lava le tulaga o le faipaaga a lo tatou Malo ma Ausetalia. O lea foi ua tulai mai le faaletonu i le tatou vaa na puipuia le tatou gataifale.

O le tuualalo a lou nei sui usufono, e le mafai ona faatagisia e lau Afioga ma le Matagaluega le Malo o Ausetalia, se satelite e mafai ona oo mai i inei le vaavaaia, e le gata i le tatou gataifale a o le vanimonimo. E pau lea o le solution ma le auala e maua ai le ausolitulafono. O satelite nei, e tele ituaiga, i lalo o le Middle East ma le tele o atunuu la, latou te faaaogaina le satelite e taua o le Russian Satellite, e pue ai le au drug dealer nei.

O le ala lea na ou fautua atu ai i lau Afioga i le taimi na ou lauga atu ai, pe le mafai ona talosaga i le Malo o Ausetalia, o la e afio mai le Minisita o Malaevaalele, leaga o lea e ia te ia le power i luga o le vanimonimo, o lea na te pulega luga o tuaoi o le ea lea e i luga, ina ia mafai ona faataga mai satelite a Ausetalia, e vaavaai o tatou gataifale ma luga o lo tatou atunuu. O le agaga lea ma le faaaloalo, o lea e tau faufautua atu i lau afioga, toe tuutuu atu i Ausetalia le suesuega o le mataupu lea, ia maua ai ma le tamaitiiti lea, e oo mai i le taimi nei, o lea lava ua le iloa po o fea ua fai i ai. Ma lou faaaloalo.

FOFOGA FETALAI: Se i onosai mai lava lau Afioga i le Minisita, tulai mai le sui usufono mamalu mo Satupaitea.

Afioga Hon Lautafi Fio Selafi Purcell: Sa fai foi si umi o ou fesoasoani atu i le Afioga i le Minisita i le mataupu lenei. E pei sa ou taua, o le mea lea sao mai ai i lou iloa ia mea ia e fai ai iinei, ona e le maua i le border. E seiloga ua aumai iinei fai ai, ona faatoa maua lea, ona faatoa maua lea e tatou taifau ma leoleo. Se i vagana o ni mea e fai mai fafo, ona i ai lea o le avanoa e maua ai. Ua popoto foi tagata i le mea, o lea ua ou faalogo atu, o lea uafaafetai i le Minisita o lea ua ia acknowledge ina le tulaga lea. O nisi o mea ia e faaaoga e pei o lea na ou taumafai atu ai, o mea e maua gofie, o asipolo, o cold remedies ma mea faapena, e faatau lava e le tagata i le counter iinei la, ae a leai, e faatau mai i o, ona aumai lea. O lau tuualalo, se Tulafono foi lea, aemaise lava latou e omai fafo, aemaise o latou e aumai a latou faamomoli. Aua a fai o ni tagata o lea e mafaufau e aumai mea ia e fai ai ia fualaa faasina malolosi ia. Ia taatia ia ia canopies marijuana, a o meths ma isi tulaga. Ia i ai se Tulafono e faagata ai ia le tele o mea e aumai e latou. Ia aua nei mafai ona omai fau ai loa iinei manufacture ai loa mea na iinei. Ia fua lava le aofai o panadeine ia e te saunoa ai, e leai se mea o le a aumai ai fua ia se pusa panadeine faapenei. Aua o isi mea na o lea ua sao mai, mai Amerika, Ausetalia, aua e faigofie ona o latou faatau mea na, faapea o mea e aumai iinei i Samoa. Na o se tilotilo lea ia i ai se Tulafono, e faataga ai na o se amount lava e aumai, e faaaoga i mea ia o gasegase. Ae aua ne i i ai se manatu e aumai tuufaatasi mea nei, ona tatou tigaina lea a o lea ua omai. Ua tatau foi ona galulue, ua le tatau ona toe aumaia na fualaa. O fualaa e le ono faia ai ia drugs nei, e faataga ona aumai, set amounts ae le o lea o mea ia ua faasa e isi atunuu pe ua le tatau foi ona faasa ia tatou. O la e i ai isi fualaa e mafai ona faaaoga mo le flu ma tulaga faapena. O lona lua, o si au tuualalo, e pei o mea ia na saunoa i ai isi sui usufono, o le consultation ma tatou village ma tatou alalafaga, i mea ia marijuana, aua e leai lava se mea e o tagata e o i ai, e toto lava i laufanua. O alii ma faipule latou te pulea mea ia, ou te iloa o le tele lena o le fesoasoani, e le taitai ona lava leoleo. O le o ma fai fai gata, fai fai uma, e pei o le tulaga lena, e fai saga faaoso foi lele, ae i ai lava se mea e continue ai lava. E tusa pe taitasi i le tausaga ona o e i tua, e vaai mai alii ma faipule o la e taua le naunau atu a leoleo, e faamatala atu mea la ia. Ma le aoga o so latou sao i le faaleleia o mea ia o le faalaititia o maruana ma tulaga na. Aua o laufanua lava o alalafaga e toto ai, e leai se isi mea e o i ai. E faapena foi se manatu i education program, e faalauiloa i le atunuu, ia mea e tatau ona tilotilo i ai, ia mea ia o fualaa faasaina nei malolosi. Aua e i ai lava mea, le vaega lea e faia mea nei, e fefefe i latou neighbour se mea o tupu. E tatau ona faamalamalama i e o lo o nonofo i fanua tumaoti, ma nonofo i Apia ma tulaga uma, i mea e tatau ona latou silafia. Ia latou iloa ai, e i ai mea la e tutupu i totonu o le fale lea.

O isi mea na, e manaomia tele le vai, e manaomia le ki o le vai, e tai alu lava le vai i le aso atoa ma le po. E faalogo atu lava le neighbours, o la e alu, ona vili mai loa lea o leoleo, se i omai e siaki. O tulaga faapena, ia malamalama ai, discourage ai tagata ia, ma le manatu e le o iloa e isi tagata ia latou te faia. E i ai le mea e i ai le manogi, e malosi lava le manogi, po o fea lava e i ai e iloa mai lava le manogi o le kasa lea e susunu e faaliu ai le mea lea i drugs. O mea faapena a iloa e isi o le atunuu, e fesoasoani i le tou galuega. E na o se tuualalo, ma le faaaloalo lava.

FOFOGA FETALAI: Ia muamua mai le Sui Taitai.

Tofa Hon Laufo Fonotoe Nuafesili Pierre Laufo: E na o se faamanatu i le Afioga i le Minisita o Leoleo, ona o lea sa maua le Lipoti ua maea ona pasia le lala o le tatou Ofisa e faatu i Saluafata, ae totogi le tupe i le itumalo. E faamanatu atu, ona o la e le i amatalia le galuega, ma le faaaloalo.

FOFOGA FETALAI: Ia tulai mai le sui mamalu o Aleipata Itupa i Luga.

Afioga Fuaava Suluimalo Amataga: E faafetai i lau Afioga i le Fofoga Fetalai mo le avanoa. E momoli atu le agaga faafetai i le uso a Minisita. O lea ua tali mai le tele o mataupu sa laga e lenei sui usufono. Ae pau le tulaga e toe tuu atu ai se tuualalo, sa ou taua le tafatolu lea na maua i osofaiga. O le drugs, o meatau malolosi ma le tupe, ae i ai la ma le atalii lena e pei e tau maua mai isi ata, o mea faitino e gaosi ai le fualaaui lea e tau vaavaai atu ai. E pei o paipa nisi mea, test tubes ma mea faapena. O lea ua saunua atu nisi o sui usufono i raw materials, mea ia o fualaaui e faaoga e gaosi ai, ou te iloa foi o tatou taifau, K9 ua train i le manogi o fualaaui. E pei e tau agai se faamatalaga i le polokalame a lo tatou Malo e train, aemaise le aufaigaluega, i le vaavaaiga. Aua o lea sa avatu ai se faamatalaga i le tatou scanner, e faigofie ona iloa ituaiga equipment ia, po o fea lava e sau ai, pe sau i le atopau, e faigofie lava ona iloa, containers, e iloa ai lava, ia e tai pei o le mea foi lea a scan atu o la e sau ai le pau taavale, ae la e iloa le aiga e leai se taavale.

O lona uiga e i ai le mafuaaga, ae afai e maua ai ia ituaiga utensils ia i totonu, atonu e i ai se mea e amatamata mai ai i ina le faafesilisili foi lea. Ia aua o lea ua iloa ua sao mai ia le raw materials. O lona uiga la, e toe lava la o mea e fau ai le drug ma equipment e inisinia ai le mea lea, ina ia taumafai e alo mai ai i le tatou K-9 ona e lelei ia le sosogi o taifau foi lea e maua le tele o mea e gaosi mai i fafo. Ia ae pei o se mea foi lea ia familiarise ia le tatou resources, staff, a scan atu loa e maua se ituaiga, ia pe o le a le ituaiga tube mea faapena, aua e le faapea o tioata uma foi e le tae i le vevela foi lea pe a oo ina gaosi le mea.

Atonu foi o lena e silafia e nisi ia suesuega foi ia ma mafuaaga e fai ai tulaga ia. Ae pei o se tuualalo tatou tapenapena i ai, e le gata ina saili le mea lea ua gaosi mai i fafo ae saili foi mea faitino na aumai mo le gaosi i totonu o si o tatou atunuu. Ia ma le agaga faaaloalo faafetai lava.

FOFOGA FETALAI: Ia tulai mai ia lau afioga i le Minisita e talifuaitau foi i le sui usufono mamalu.

Afioga Hon FAUALO HARRY JEFFREY SCHUSTER: Ia faafetai i le Afioga i le Fofoga Fetalai faapea foi i le sui usufono mamalu. Ia le afioga i le sui usufono o Faleata 1 o lea e tatou te faatasi ma le Sui Komesina o la e faafofoga mai i lou manaoga ia tele ia ni petolo e o e vaavaai ia taavale ia. Ia ae e pei lava ona ou fai atu muamua o le auvaega foi lea e o atu ia leoleo ua le faaeina le pu, tape moli. E pei o le mea lena sa aveatu ai se manatu e faamau mai le numera pe a faapea e iloa atu. Ae o le a taumafai foi e petolo i auala.

E faafetai foi i le fautuaga mai i le sui usufono mai i Aleipata Itupa i Luga. O le galuega lea e pei ona e saunoa i ai o lo o galulue faatasi ai i le Matagaluega o Tiute ma Leoleo ma le Transnational Crime lea e i ai i luga o le fale o le Malo. O latou lea o lo o galulue faatasi i le tulaga lea. E le gata i le vaai sao i mea o lo o gaosi ai, a o isi ituaiga auala eseese e i ai le isi ituaiga auala pe a faapea ua ou tilotilo la e fai i atunuu i fafo.

E aumai mo le ie foi na e it's just a cloth ua uma ona soka e le auvaega i totonu ia le cocaine. Ia ona ave laia i le mea lea e ave toe nonofo le vaega ma toe soka i le vai ona toe separate lea. O le tulaga ia o la e koloni ai ia le tatou afaigaluega. Ia ae e pei o le fesoasoani tele lea ia tafiau ma isi tulaga o lo o i ai.

E tai tutusa ia le tulaga lea na e saunoa i ai ma le mea lea na saunoa i ai le sui usufono mo Satupaitea, ia mataala mo tulaga uma ia, i le tilotilo i mea o lo o faaaogaina e gaosi ai le fualaau faasaina. Ia aua e oso lava le masalosalo foi lea i tagata ua aumai le 400kg o le aspirin ae e le o se pharmacy. E le o se faletalavai e le o se falemai. E i ai le tulaga lea na tupu foi i le tatou falemai na ave sese e le afaigaluega i totonu o le faletalavai ia fualaau ia faatau i tagata ia e gaosia ai le aisa. E pei o tulaga ia la e mataitu e le Matagaluega.

E lagolagoina ma talia le fautuaga mai i le sui usufono o Satupaitea, sui usufono o Safata Nu.1. faapea foi le sui usufono o Aana Alofi Nu.2 i le tulaga lea, o se fautuaga lelei tele le tulaga e tataua ona vavalalata ia le... i le agai i luma, sootaga i le va o leoleo ma a tatou alii ma faipule ona e le mafai e leoleo... ona e le atoa se 1,000 o leoleo lea e i ai. E le mafai e leoleo ona leoleo ni tagata e 200,000.

O le mea mautinoa la, e pau lava le auala e mafai ona tatou faataunuu ai ia le tulaga lea, o le atinae, o le vavalalata lea i le va o leoleo ma alii ma faipule, i le tulaga o le faailoa ia ma faailoa atu foi ia tiute faaleoleo ma tulaga e tau

i le Tulafono. O le tele lava o le aoaoina o o tatou tagata o le iloa i le Tulafono, ia o le agai foi lea i luma o tatou tagata.

E faamauina lau afioga i le sui usufono mamalu mai Anoamaa 2 se Talosaga foi mo se Ofisa o Leoleo mo lou itumalo ae faapea foi le manaia o le fautuaga na e tuuina mai. O le tilotilo lea i le siiina o le faasalaga faaletulafono e sii i luga ia le taimi falepuipui mo e maua i le tulaga lea. Ou te iloa o se faasalaga talafeagai tele mo le auvaega ia o dealers. E tele se taimi a maua oe e te faia le mea leaga lea o lou gaosia ma faatau atu ia fualaau faasaina, e matua maualuga mamao lava lou faasalaga i lo le tagata ia e ese mai i le tagata lea na alu e faatau aua e faaaoga. E pei o le tulaga lea na tatou talanoa ai e faaaoga sese ia tagata ia o le vaivaiga faaletagata. Ua uma ifo ai ua faamoemoe le tagata i fualaau e ola ai.

Pe e i ai se isi fesili na galo ia te au i fesili ia na...

FOFOGA FETALAI: Ia na ua maea ua kava uma lava lau saunoaga.

Afioga Hon FAUALO HARRY JEFFREY SCHUSTER: Ia ua lelei, faafetai tele lava ia lau afioga i le Fofoga Fetalai mo le avanoa.

Tofa Seuamuli Fasi Toma: Lau Afioga i le Fofoga Fetalai...

FOFOGA FETALAI: Ia ...

Afioga Hon FAUALO HARRY JEFFREY SCHUSTER: Oi ia sorry lau afioga i le Fofoga Fetalai...

FOFOGA FETALAI: E sao lelei lava ia le afioga i le sui usufono mamalu

Tofa Seuamuli Fasi Toma: Faamolemole lau afioga i le Minisita e amata nei...

FOFOGA FETALAI: sao lelei lava le saunoaga a le sui usufono a Gagaifomauga Nu.2.

Afioga Hon FAUALO HARRY JEFFREY SCHUSTER: E leai e sao le saunoaga a le toeaina. E sao e 2 mataupu sa e laga o lau fale fuimu, ia ma oulua ma Aana Nu.3. O oe o lou manaoga ia fai i Savaii ia le pepa kilia mo e o lo o fia Malaga i fafo.

O le Talosaga a Aana o le pepa foi lea e aumai e le alu i fafo ae o la e i ai le record. Ia faamalulu atu ia oulua, ia ona o tulaga...

Afioga Peseta Vaifou Tevagaena: Lau afioga i le Fofoga Fetalai...

FOFOGA FETALAI: Sa e saunoa i se lipoti lau afioga...

Afioga Peseta Vaifou Tevagaena: Ioe lau afioga...

FOFOGA FETALAI: Ia tulai mai ia lau afioga...

Afioga Peseta Vaifou Tevagaena: Leaga o lea ua tali uma finagalo o sui usufono. Masalo ua galo i le afioga i le Minisita ia le taua o le mea lea na ou avatua leaga na ou lauga ai. E tatou te fiu lava e sue ia tagata ia e lau maia fualaa iinei ae o lea e le o aumaia le mea lea na ou fai atu ai i lau afioga, e le taitai maua.

FOFOGA FETALAI: Ia o lea ua maua, o le satellite.

Afioga Peseta Vaifou Tevagaena: Fai le satellite iinei. Russian Satellite.

Afioga Hon FAUALO HARRY JEFFREY SCHUSTER: Lau afioga i le Fofoga Fetalai, o le mea lea na ou faaeteete ai e tali, aua o le tali lena o le a iloa ai e isi tagata le... o le tali sao lava, o la e faaaoga e le tatou vaega foi lea a Ausetalia lea e galulue ma tatou le satellite. Ae o lea la ua ou tali atu i i, o lea la iloa e vaafagota o lea e i ai le satellite lea e tapue ai latou. O le mea lea sa faaeteete i ai e aua le soona taua uma mea, o le pui-pui foi i galuega a leoleo.

O lea e faaaoga e... a e fia silasila i ai, afio i Matautu, o la e i ai le vaega lea vaaia ia le tatou tuaoi i le sami, e maua uma lava e le satellite lea ia... o lea la e galulue le vaega lea ma le transnational unit ma isi atunuu. Ia o lea la ua out ia le tatou secret ona o le fesili i lau satellite, aua o le mea moni e tatou te le o manao foi e iloa e le ausolitulafono o lea e i ai ia le tatou auupega ia.

Lau afioga i le tiakono toeaina...

Tofa Hon Olo Fiti Afoa Vaai: Lau afioga i le Fofoga Fetalai...

FOFOGA FETALAI: Ia se i tulai mai le Minisita o Galuega pe e te fesoasoani i le satellite.

Tofa Hon Olo Fiti Afoa Vaai: Leai, o lea la faatoa ou malamalama nei, o le leva na leoleo ae na te le iloa le... ia Peseta. Na te le i silafia e le i maua lelei mai e Peseta ia le mea lea e taumafai atu ai le Minisita i le nanaina o mea ia e fai ai ia suesuega. Matuai leva ona e leoleo, e tasi le mea e na o le tufa samani lau mea sa fai...

FOFOGA FETALAI: Ia se i tulai mai le afioga i le sui usufono mamalu mai i Faasaleleaga Nu.5. leaga o lea ua taua lou suafa...

Afioga Peseta Vaifou Tevagaena: Se i ou tali atu i le Minisita lea. Masalo a e sailia record a le Ofisa o Leoleo, o au lava le leoleo e pito sili ona laitiiti, ioe i lou taimi.

Ae o le mea lea e saunoa ai le Minisita o la e i ai satellite i luga o vaafagota. Ia sa ou le tali atu lava, a e aua ne i galo i lau afioga, e eseese ia ituaiga satellite. The Russian satellite e ati lana vaai i lalo o mauga, pe lafi lava ia le drug dealer i le mauga o Vaea e maua. O le eseese na o mea tau satellite. O le ala lena e ala ai ona ou fai atu, e tataua ona toe tilotilo ma vaavaai le Matagaluega i isi laasaga e aumai ai aua a le aumaia le mea lea, e faatupulaia pea le faaaitauli i fualaau faasaina nei.

Susuga Hon Laauli Leuatea Polataivao Fosi: Lau afioga i le Fofoga Fetalai...

Afioga Peseta Vaifou Tevagaena: O lea la e malamalama ai ia... leaga o lea na ma felelei ma si ou uso i le apolo lea...

FOFOGA FETALAI: Ia se i tulai mai lau afioga i le Minisita o Faatoaga...

Susuga Hon Laauli Leuatea Polataivao Fosi: O le Maota lena e na o mea faamaonia. Ou te tapa ia faamaoniga o le satellite lea e fia aumai i le Maota e sailiili ne i alu ai ia le tatou taimi ae gata lava ia mea a Russia ia i Russia. O si fesoasoani atu lea.

O lea o le a tauau ina mamulu atu ia faamaumauga o lea e nana e le Matagaluega. Ae tatou malilie ia, o lo o ia te au foi le Matagaluega o Vaa Fagota, la e i ai le screen faapitoa e leai lava se vaafagota e kolosi i le tatou borders. It's all there. Ia o le puipuiga lena, e pau lava le mea lea na taumafai nei o le oso sese o le tatou Nafanua e le i faatonuina e alu. Ia o le mea lena o lea e tausuesue.

FOFOGA FETALAI: Ia ou te iloa lea ua...

Afioga Lupematasila Galumalemana Tologata Togia Tile Leia: Lau afioga i le Fofoga Fetalai...

FOFOGA FETALAI: Ia tulai mai ia le sui usufono o Falelatai ma Samatau...

Afioga Lupematasila Galumalemana Tologata Togia Tile Leia: Faafetai mo le avanoa sa i ai lava le manatu e le tulai atu ae ona o le taua tele o le talanoaina o lea faafitauli. O lea sa ou taua ma avatu foi ia le fautuaga, tapena ia se tatou Tulafono ina ia mafai ai ona fai ia se tatou test aua o le mea lea e tulai mai i le taimi lenei, a maua e le Malu o le Malo le tagata foi lea e masalomia e filogia ma fualaau faasaina, e le o i ai se Tulafono e mafai ai ona test e leoleo.

Ae o le mea foi lea e ala ai ona alu le manatu e fai se Tulafono, e pei o se mea foi lea e tau taofiofi ai tagata e le faapea o le a faamallosia le test o tagata uma. Ae a silafia e le mamalu o le atunuu o la e i ai se Tulafono, o i ina foi e tau taofiofia ai le solitulafono lea. E pei o le agaga lea e taumafai atu ai ma le faaaloalo.

FOFOGA FETALAI: Malo, tulai mai lau afioga i le Minisita, ou te iloa lea ua aotetelega i sau faamalamalama, ia malamalama foi ia le sui usufono mamalu.

Afioga Hon FAUALO HARRY JEFFREY SCHUSTER: Faafetai i lau afioga i le Fofoga Fetalai. Se i ou mulimuli ou foi mai ia oulua se i ou muamua ia Falelatai ma Samatau. Leai o le Tulafono ia i fualaau faasaina, o tatou le isi... o le faigamalo lea na tea atu nei na pasia ai ia... o le tele o Tulafono na pasia i mea lava ia tau fualaau faasaina.

O le Tulafono lea e i ai nei le tatou Malo e pei ona pasia e le Malo lea na tuanai atu nei, matua tutusa lelei lava ma malosiaga o Tulafono i Niu Sila ma isi atunuu. E matua malolosi lava o Tulafono. Ou te malamalama i le mea lea e te tau saunoa i ai, ae o le mea la e te lua fetoi pe a e alu i le tulaga lea, o le auloia ia mo aiatatau. Aua e faigata tele le mea lenei aua o la foi e amanaia e le Tulafono lenei e pei ona pasia e le Malo ia tulaga lea i le aiatatau ma le mea lea o le compulsory testing, ona e tu tulimanu lava i le tatou Faavae ma le tatou aiatatau la e i totonu i le tulaga foi lea e le mafai ona faia se mea e masalomia ia oe, seiloga ua i ai se warrant mautu foi lea e aumai i le Faamasinoga ona faatoa mafai ona uia tulaga ia. O le puipuiga foi la o Tulafono i le faigamalo lea na tea atu, ia aiatatau o tagata, ae ou te malamalama i le mea lenei i le tulaga lenei e te saunoa mai ai i le compulsory test. Ae o le Tulafono lava lenei e fetoi ma le tulaga lenei.

Lau afioga i le sui usufono o Ggaifomauga Nu.2. i lau talosaga lea i Savaii e fai ai pepa, ia ona o tulaga faaleoleo e tataua ona tuu uma faamaumauga uma i i i le mea o i ai le Pulega autu mo faamaumauga o records. O le... Gaseata le sui usufono mamalu o lau Talosaga ona o nai tagata foi na e fia o i galuega ae maua mai ia record ua leva ua 10, 20 pe mafai ona faamama. Ia e faamalulu atu e leai ia se tatou Tulafono foi lea e mafai ai ona aveesea ai se record o faamau ai sau solitulafono i se taimi ua leva. E savali lava ia le tatou Tulafono ma le faavae o le tatou Tulafono i le tulaga foi lea ia faamaoni

ma le faamaumauga sao lava lea i le mea na tupu, o lea e mau i totonu o faamaumauga a le Malo, o le Faamasinoga ma le Ofisa o Leoleo.

Ia ona la o le faiga o tulaga faavae na a le tatou Malo la e i ai, e le mafai ona suia ia se faamaumauga, e le mafai foi ona aveesea. E i ai le malosiaga i le Tulafono faa-Amerika. E i ai le malosiaga i le Kovana pe a uma le taimi e 10 tausaga, e faamama ai se record o se isi o se soligatulafono muamua i tulaga talafeagai. Ae ou te le iloa foi pe o le tali lea o lau fesili, leaga ua ou vaai foi i form ia lata mai i Niu Sila ma Ausetalia pe a apply le visa, e sau ai le fesili pe i ai sou record ia ona e tali lea i pe leai. Ae sau ai foi ma le isi fesili e mulimuli mai, pe i ai sau record ae na discharge oe without conviction, e te tali foi la i pe afai na discharge oe without conviction. Ia ou te le iloa la pe i ai se penefiti o le mea lena o le aveese o le i ai o se malosiaga e aveesea ai se solitulafono. E mau lava ia le faamaumauga sa e solia se Tulafono e tusa lava pe... e na o le pau lena o le fautuaga i le mamalu o le atunuu. O le tali faamaoni lava fesili leaga na ou tau foi i tulaga ia o tagata na pepelo i totonu o faamaumauga, ia na ae aveatu ae maua mai i Niu Sila ma Ausetalia, ia ona le mafai lea ona malaga i Niu Sila ma Ausetalia.

Ae na o se vaivaiga lena lau afioga i le Fofoga Fetalai, faafetai tele lava i sui usufono o le Maota mo le avanoa.

FOFOGA FETALAI: Faafetai, malo faafetai. Malo saunoa i lau afioga i le Minisita o Leoleo faapea foi le Toefuataiga. O lea ua manino ma malamalama le paia o le Maota, ia aemaise foi o nisi mataupu sa laga e sui usufono mamalu. Ia ou te talitonu foi ua faamalieina ia le paia o le Maota ia aemaise foi o le faafogafoga mai o le paia o le atunuu, ia aemaise foi o le Matagaluega.

Ia malo lava galulue, e matau tau o lo o faaauau lava galuega aua le lumanai ma le manuia aemaise foi o le puipuiga o le saogalemu o le atunuu. Ia malo faafetai.

Ia o lea ua oo atu ia le faasologa i le afioga i le Minisita o Tupe, ia tulai maia lau afioga i le Minisita.

Afioga Hon MULIPOLA ANAROSA ALE MOLIOO (Minisita o Tupe): Faafetai i lau afioga i le Fofoga Fetalai mo le avanoa. E talitonu ua maea folasia foi ia le Tala Faatatau Autu o le Tupe, saunoa foi ma fetalai lena itu o le tatou Maota. Maea folasia foi le folasaga a le Afioga i le Taitaifono o le Komiti o Tupe. Ia i le Tala o le Tupe na tapenaina e le Matagaluega o Tupe e ala i manaoga sa tuuina mai e tatou Matagaluega e 8.

E faalogologo lava ma le totoa i le tele o saunoaga ma fetalai i le agai lava o saunoaga i le aafiaga o le tamaoaiga. Ma o le a ou taumafai e avatu pea se folasaga i lona aotelega, aua o lea ua uma ona maea saunoa foi le tele o afioga i Minsita, ia e pei o lea e agai tonu mai i ai le tele o fesili, ae o le a

ou tali i lona aotelega, faapea foi le faafogafoga mai o Samoa ia ma si ou itumalo.

Ia malie i lou gutu upu o lau afioga, aua o upu a le potou foi e mama e pei ona faailoa mai e Paulo ia Korinito. Ae peitai e matou te tautala atu i le potou lilo o le Atua. O le potou sa natia, na fuafuaina mai e le Atua mai i le amataga, mo lo tatou manuia. Ae e pei lava ona tusia, o mea e le i vaaia e mata, e le i lagona foi e taliga. E le i oo foi i le loto o le tagata. O mea ia ua saunia e le Atua mo e alolofa ia te Ia.

Ae fai mai upu o le mavaega a le tama i lona afafine, a e paia le pa i Fualaga, sua le tuli aua le alii o aiga. O le ituaso o le faamaina, ina ua faatoilalo e le itutaua a le tamaitai le toatele o alii. E le o le fitafita, e le o le malosi, a o le mana o le Atua e na te faaaupega ma faatomaia e ua Ia filifilia.

Seu maia lou sa Samoa, se i o tatou aleaga piioa aua ua mou ataata fasia o liaga, o ni afa foepapa, po o ni peau mamala, e ono toto ma lalaga i lo ta fogavasa. E leai ua mafai, aua ua mamama semaaga o au Talosaga. E ta te le tauiso foi pe taumamate o lea ua maualuga ou laueleele ma o ta laufanua. Fai mai e naumati ma maasoloa fanua na ala ai ona solisoli le papamaa. Fai mai e oge matapuna foi, ma magomago le eleele na ala ai ona foafoa le ana o le tama.

O le ala lea na siligia ai e feoi le alo o Mataafa, ma le alo o le Tuimanua. O i fea ea se laveai? O le Malo ua tulai mai. O le tali, ia solisoli le papa fuania ina ia puna vai i eleele, e ola ma foafoa ai le atunuu. O le vai lea o le tama i le Anapapa, fai mai na togitogi ai ia le alualutoto, ae nainai e manulele o le vanimonimo, tulai mai le tagata malosi e fai ma suli.

E faapena lau faitau i le aso, o lea ua o tatou utuvai pisipisi i taufaafuaese. Ua maua foi manu ma solisoli ai le tama o le papa, ina ia puna mai le vai o le faaolataga. O ai lea tagata? O le tama na valoia e perofeta, e i lona ua le Malo, o le Atua malosi. O le Tama o le faavavau ma o le Alii Ia o le filemu. Aumaia le Suafa manumalo o le Alii lea o le filemu, ou te faatalofa atu ai i lau afioga i le Fofoga Fetalai o le Maota o Samoa.

Faatalofa atu i lau afioga i le Palemia o Samoa, lau afioga i le Sao Faapito. Talofa i lau afioga i le Sui Palemia Tuala Ponifasio, ma le mamalu i Minisita o le Kapeneta ma Minisita Lagolago. Ou te ofo alofa atu foi i le Susuga i le Taitai Tuilaepa Sailele Dr Aiono Malielegaoi, faapea foi le Susu o lau Susuga i le Sui Taitai ma le Vaega Faaupufai faapea sui usufono mamalu uma o le Maota Fono. Faatalofa atu foi i lau afioga i le Ao Mamalu o le Malo ma lau Masiofo, aemaise o le Sui o le Fono a Sui Tofia.

O le paia lava lea aua Tama ma Aiga, Tumua ma Pule, Aiga i le Tai ma le Vaa o Fonoti. E faafeiloai atu foi i le tapuaiga a le afioga i le Faamasino Sili ma le mamalu o le Faamasinoga. O le tapuaiga mamao mai a so o se tamafanau a Samoa i so o se atunuu, ae tainane le paia o le Aiga Sa Levi, le paia o le aufaigaluega a le Atua, o lo o nonomanu aua se manuia mo Samoa.

Ae e le faagaloina foi le tapuaiga a Tutuila ma Manua, le paia lava lea aua Sua ma Vaifanua, Fofu ma Aitulagi, Saole ma le Launiu Saelua, Tama a le Manua ma le Tootoo o le Faleula.

Ou te faatalofa atu foi i le tapuaiga a si ou itumalo o Palauli Sisifo, po o Palauli 1, i le Afio o Letelemaana ma Leaupepe, Afio le Alo o Lilomaiava, le mamalu ia te Oe le Falelua, Afio le Matua le Tauavamea, Afifio le Uso o Leilua ma Faliuga, le Ituala Mavae ma le Tama a le Fale faapea le Nofo a Ituaiga i le Ailaoa. Afio lau Afioga i le Sao Faatupuinati, Afio lau Afioga i le Tuuauato ma le Falesefulu o Pesefea Manaia, Afio Alo o Lilomaiava ma le Nofo o Usoalii, Alalatai e na tai i upu ia Gagaemalae. Afifio Aiga, Alalatai le Matua ia Tuato ma Tuitolovaa, ma le mamalu o le faleupolu o tofiga a Salemuliaga.

Afifio Suafa ma Saleulu, Alalatai Faatoafe ma le Nuu e faigata. Afifio le Aiga paia le Aiga Salevalasi, Alalatai le tautalaga ia Faiumu faapea le Falefa ma le Faigata.

Ou te faatalofa atu foi ma ofo alofa atu i le paia o le aufaigaluega tofofi a le Atua i totonu o lou itumalo, e amata mai i Foailalo seia paia Taga. O a outou tatalo ua manuia ai faiva o la outou auauna faatauvaa. Ou te faapai atu foi i le faafofoga tapuai mai a si o tatou atunuu o Samoa aoao i ou mamalu faale-Talalelei, mamalu faale-atunuu ma ou mamalu faale-Malo, aua e ausage le tuvae, o le ana e tafia e tapuna tupu i le ifi i outou finagalo ma so matou faamoemoe, i le faasoaso a le Atua soifua. Ua tu i mauga, vaai i ula, ua tatou futifuti manuula i le agalelei ma le agaalofo o le Atua.

Lau afioga i le Fofoga Fetalai, e pei lava ona lagaina e nisi o sui usufono o le Maota, ou te fia tautala i le aotelega o lo o i ai nei:

Vaega muamua, tau o oloa ma ua taugata ai le soifuuga o tatou tagata, aemaise i latou o lo o vaivai ia le tamaoaiga ma le vaega Lua, tulaga pau o le faatupulaia o le tamaoaiga o le atunuu.

Muamua, o le mafuaaga autu o le siitia o le tau o oloa, e mafua lea i le aafiaga o le Koviti-19 i atunuu o le lalolagi. Ua mafua ai le siitia o le tau o le suauu, siitia le tau o oloa mai fafo, e aofia ai le siitia o le tau o totogi i le auina mai o nei oloa ma isi.

Lona lua, o lo o i ai pea ia aafiaga tuga o le tatou tamaoaiga ona o le tapu o femalagaiga faava-o-Malo ma o lo o aafia ai le vaega o Turisi ma faletalimalo faapea isi uma vaega o le tamaoaiga o lo o faamoemoe i ai lo tatou atunuu.

O lo o ave pea le lagolago a le Malo i lea foi vaega taua o le tamaoaiga e ala i fesoasoani tau tupe ua faamatuu atu i vaega o turisi e pei ona faamaonia i le Tala Faatatau Autu o le Tupe sa pasia ia Setema i le tausaga talu ai ma o lo o faagasolo nei. O lo o i ai foi fuafuaga e pei ona outou silafia i le fesoasoani mo pisinisi tumaoti ma isi.

O mafuaaga nei ua ou taua, e mafua mai i fafo ma e le fou lea tulaga. I le fia sefulu tausaga o le taatiaga lava lea na sau ai, e faalagolago tele i le vaega

o Turisi, ae faatuatuanai i isi vaega o le tamaoaiga. Ana ave i ai le faamuamua i nei mau tausaga e tele, semeamanu e mafai ona o tatou tetele atu i aafiaga tuga ua i ai nei si o tatou atunuu, ona o aafiaga o le tamaoaiga o atunuu tetele o le lalolagi, ona o le faamai o le Koviti-19.

I le pale mai o lenei Vaega Faaupufai e taitai le sa folau o le tatou Malo, ua faamausali ai le mau e tatai i le malo ona faatino ni suiga lelei maumaututu, ina ia faamalosia ma siitia ai le tamaoaiga e ala i le siitia o le auaunaga a le Malo. Ia galulue le aufaigaluega, ia siitia le auaunaga mo le manuia o tagatanuu.

O nisi vaega o le a agai i ai le faamamafa o le atinae o tagata. O le tatou oa pito sili lea ona taua o tatou tagata ina ia maua avanoa, e atinae ai ia o tatou tagata aemaise o le i ai o auaunaga e lagolagoina le soifua manuia o tagata, e pei o le maua o auaunaga lelei tau aoaoga, soifua maloloina faapea avanoa lasi tau pisinisi e unai ma atinae ai o latou tamaoaiga.

A lelei lea tulaga, o le a mautu foi atinae o nuu, ekalesia ma itumalo aemaise o le tamaoaiga o le atunuu. E pei lava ona laga e nisi foi sui usufono, toe lava o se ana ona faailoa faalatele lea, o le taiala a lo tatou Malo mo le isi 5 tausaga sa tapenaina ina ua ofi atu le tatou Faigamalo.

Sa ou taua i lau lauga le tulaga lenei ma ou te toe fia faamanatu atu. O lenei Tala Faaopoopo o le Tupe, o lo o fuafuaina se faasiliga o Tupe Maua nai lo Tupe o lo o fuafuaina e faaalu e \$2.7 miliona, ma ua faalelei ai le tulaga o lo o taatia ai le pau o le tatou budget deficit mai i le 2.5% i le 2.4% o le tamaoaiga pe a faatusatusa i le Tala Autu o le Tupe sa o tatou pasia ia Setema 2021.

Ou te fiafia foi e faailo atu sa faatino i le masina o Novema 2021 le isi iloiloga a le Faalapotopotoga a le International Monetary Fund, le IMF. O le Faalapotopotoga faava-o-Malo, o lo o latou mataituina le tamaoaiga ma le tulaga tau tupe, po o financial system o le lalolagi, e aofia ai atunuu o lo o faisaofaga ai e aofia ai ma Samoa. O lo o molimoli mai ai ni fautuaga, e tatai ona toe silasila totoa i ai le Malo aemaise o le Matagaluega o Tupe, Faletupe Tutotonu, Ofisa o Fuainumera Faamauina ma isi Matagaluega a le Malo ina ia faaleleia ia tulaga ua fautuaina, aua le faaleleia atili o tulaga tau Lipoti faapea le mataituina o tulaga tau tupe a lo tatou Malo.

O le fesili agai i le Tulafono e foia ai tupe palapala laga e se tasi o sui usufono. Mo le silafia, o lo o i ai le Tulafono ua taua o le Tulafono o Puipuiga mai i tupe e faaofi mai Faasolitulafono 2007. O lo o gafa le Faletupe Tutotonu o Samoa ma lea matafaioi. Ma e sili le agai sao mai i lo tatou Ofisa i le Central Bank mo le faamalamalama atili o aiaiga o lea foi Tulafono pe a manaomia.

Sa fesili foi le isi sui usufono, maua tele foi folasaga agai i le retention, e tai 10% o konekarate a kamupani o lo o faaaogaina e le Malo. Ua maea ona faamanino atu lea tulaga e le Afioga a le Palemia ma nisi o Minisita ma le mafuaaga e taofi ai e le Malo le 10%. Ia mautinoa e lelei ona faatino le

galuega ae le i maea le 12 masina. E lelei foi ua tuuina mai le manatu ina ia apply e le Malo se isi 10% faaopoopo i le tau o le konekarate mo le maintenance pe a uma le 12 masina, ae toe leaga mai le auala. Ae peitai ane, e faigata tele ona faatino lea tulaga ona o aiaiga o le fesoasoani mai a tatou paaga.

O le isi tulaga e tatau lava i Matagaluega, o lo o faatoai mai atinae, ona fuafua lelei lana Tala o le Tupe. Aua a fai e fausia se auala, e tatau foi ona mafaufau i le vaegatupe e tuu ese, e maintain ai le tatou auala. Ae le na o le fau o atinae ae le iloa pe faapefea ona maintain ma e aafia ai le Tala o le Tupe a le Malo, ona o le soona fau ae le mafai ona maintain le tele o atinae o lo o i ai nei.

Sa lagaina e se tasi o sui usufono, o poloketi o lo o faatupeina e paaga mai fafo. Ina ne i uma le taimi faatulagaina, toe faafoi tupe nei e le i maea ona faaaogaina. E faafetai atu i le sui usufono mo le manatu faaalua, ma o le naunautaga foi lea o le tatou Malo, ia lelei ona faatino poloketi, ia manuia ai le atunuu ma ia alu aoga foi seleni ua mafai ona ofo mai e tatou paaga mo le atinaeina o si o tatou atunuu. O lo o ave pea le faamamafa ina ia lelei ona faaoga ma faatino i taimi faatapulaa nei poloketi. Ia aua nei oo i se tulaga e toe faafoi ai ona ua tuai ona faatino.

E faafetai atu i sui usufono sa lagolagoina vaegatupe ua toe faaopoopoina mo le EPC ma le Ofisa o le Vai e tai \$2 miliona. Mo le silafia e tai \$2 miliona lava e ave i Faalapotopotoga nei i tausaga taitasi, ae le i oo i le tausaga sa fai ai le stimulus o lea na siitia ai i le tai \$4 miliona, e amata mai i le tausaga 2020. I le agai i luma, ua tatau foi ona tagai Faalapotopotoga nei i auala e faatupe ai latou operation ma sefe ai tupe. Ia tuutiitia ai le faamoemoe mai i le Tala o le Tupe a le Malo, i le agai i le lumanai.

E fia faasao atu foi le lafoga a se tasi o sui usufono mamalu i le vaegatupe e \$3 miliona e faamatuu atu i le SUNGO, e le sao lea saunoaga. E leai se \$3 miliona o faamoemoe e ave i le SUNGO, e masalo o le \$3 miliona lea e sese mai ai, o le \$3 miliona lea o lo o faaagaga mo penefiti ma faamanuiaga mo tagata e i ai manaoga tumau.

Ua faamauiina foi le fautuaga a se tasi o sui usufono mo le tauofoga ma le faatautui, faatau atu o taavale tuai a le Malo. Ia i ai se avanoa e manuia ai le aufaifaatoaga ma le mamalu lautele o le atunuu i ni tau pau. O le a tagatagai i ai le Matagaluega o Tupe, faapea le Komiti o Tauofoga i lea tulaga.

O le tulaga i le tatou vaalele ma le Samoa Airways, ua tele foi saunoaga, ma fetalaiga na saunoa i ai i totonu o le Maota. Ua maea foi ona fai le faaiuga a le Kapeneta i le vaalele, e faavae i iloilogaga ma fautuaga maumaututu, sa faatino e i latou o lo o i ai le tomai. E tele ni mafuaaga ogaoga e pei ona taua e le Afioga i le Minisita o le Samoa Airways, le afioga ia Leatinuu. Ae o le autu o lea faaiuga, sa fua i le aafiaga o le gau. O lo o i ai nei le Samoa Airways ma le aafiaga o le Tala o le Tupe a le Malo.

E agai atu le Faigamalo lenei, o lo o tulaga faaletonu le kamupani a le Samoa Airways. Ua le mafai ona totogi ana aitalafu, ma o lo o faamoemoe i le nonogatupe a le UTOS. O le aafiaga o le gau lenei pe a le foia i le taimi lenei. O le fafa ma amo e tagata faisaofoaga, o taxpayers uma a le atunuu ona o lo o guarantee e le Malo lenei le nonogatupe. E le o i ai ni vaa o feoai ma o le pagatia foi lea o le kamupani lenei.

O le a lava le faamatalaga e fai mai i le aoga o le vaalele, i le atinaeina o le tamaoaiga ma le Samoa Airways, e i ai le talitonuga, a le fufulua mai totonu o le kamupani, se i tulou, ma faasaosao tulaga tau Pulega ma le Faafoeina ma le faaaogaina o tupe, e tusa ai ma ala o Tulafono tau Kamupani ina ia faavae i pulega lelei, e le taitai ona manuia lenei atinae.

O le ala lea lau Afioga i le Fofoga Fetalai, ua manatu ai le Kapeneta, o le faafoi o le vaalele, o le amataga lea o le ave o le faamuamua i le gau o lo o i ai nei le Kamupani. Ma ia faafoi le puleaina ma le faafoeina i le tulaga e tatau ona i ai. O le tele o le galuega o lo o gafa nei ma le Komiti Faapitoa e toe faasaosao tulaga na faatino ai, ma faamaonia ai e le Kapeneta talu ai le auina mai o le vaalele, ae o lo o tele le gau ma faaletonu ai le Kamupani.

E talitonu e tele nisi auala o le a maua ai avanoa mo femalagaaiga a le atunuu i le lumanai, ma e talosagaina ai e lagolagosua a lena Itu i taumafaiga a lo tatou Malo.

E faaiu atu se faamatalaga i le faamai o le Koviti-19, ma le aafiaga sa ou taua i le tamaoaiga o si o tatou atunuu. I le oo mai o le faamai i o tatou laufanua, o le mea moni e le ausia le vaai taulai sa fuafuaina, e siisii malie ai le tamaoaiga i le faaiuga o le tausaga faale-tupe lenei. E le o nofonofo lo tatou Malo aemaise o le tatou Ofisa o Tupe, i le faaaauu pea ona faatino matafaioi ma galuega o lo o gafa ma i latou i le faasoasoina o le tatou tamaoaiga. O lo o faaaauu pea ona faatino galuega mo le faamatuuina atu o fesoasoani i le Tala o le Tupe, o lo o faagasolo nei. E aofia ai tupe mo le puipuia o le pipisi atu o le faamai Koviti-19 i tua. O lo o faagasolo nei ona faamatuuina atu fesoasoani mo pisinisi tupe, mo i latou o lo o i ai manaoga faapitoa, o vaegatupe mo atinae o itumalo ma isi fesoasoani, ua maea ona faalauiloa atu.

O nei fesoasoani, e le gata e manuia ai tagata ua aafia o latou tamaoaiga i aafiaga o le Koviti-19, ae toe lalaga ai le tatou tamaoaiga.

Ae mo le agai i luma, e avatu pea se tuualalo i sui usufono mamalu o le Maota, e auala atu i lau Afioga i le Fofoga Fetalai, o le taimi lenei ua i ai le faamai i Samoa, e le tatau ona tatou tusitusilima, ae ia tutu faatasi ina ia puipuia ma saogalemu o tatou tagata mai aafiaga matuia o le faamai, e pei ona pagatia ai atunuu malolosi o le lalolagi.

E avea lenei avanoa e faaleoina ai le agaga o le faafetai.

FOFOGA FETALAI: Ia fai se malologa a lau Afioga i le Minisita o Tupe, se i tuu atu le avanoa i le sui usufono mo Anoamaa Nu 1.

Afioga Alaiasa Moefaauouo Malagaitutogiai Sepulona Moananu: E momoli le faamalo i le Afioga i le Minisita mo le saunoaga tau faamalamalama le tulaga tau tupe. Ae i ai si vailiu lea sa saunoa i ai i le tulaga o le vaalele, ma le fufuluina o Kamupani. E foliga mai leaga o le vaalele ma le Kamupani, o le mea a lo tatou Malo. E moni o le Kamupani a o le major shareholder o le Malo. O lea e pei o le a tuuaia o la e faafofoga mai le atunuu, o le Kamupani foi na faatulai e lenei Itu, ona o lana ia foi faiga faavae e fesoasoani i le atunuu. O lea ua faafofoga mai i le tele o mau ua avatu. Aemaise le pasese lea ua i ai nei mo tatou tagata, pe a o le a se finagalo o le Atua e uma le faamai. E pei e foliga mai sa i ai ni mea alualua sa fai e le Faigamalo ma le Kamupani lea sa i ai i le faatulai mai o le Kamupani lea.

O le mea lea lau Afioga i le Minisita, e pei o lea ua malamalama tatou alo i luma, o le eseese lenei o mafaufauga sa i tua foi o lenei atinae. Ma o le atinae foi lenei, o le 2017 faatoa amata ai ina ua tatou o ese mai faiga paaga lea sa tatou faia. Ia leai loa se tatou vaalele, e leai lava ma se sui o le atunuu lenei i le taimi na talanoaina ai le mataupu lea, e le i naunau e fai se vaalele. O le mea sili o lea ua tatou oo i ai, o lea ua tatou vaai i le tulaga ua i ai, o lea ua aumai lo outou finagalo e faamuta. O le fesoasoani atu lea ma le faaaloalo. Ae aveese ia mafaufauga faapea e i ai mea eleelea ma mea e tatau ona fufulu, ona o le faamoemoe sa i ai le Faigamalo ma le faaiuga sa i ai. Ma le agaga faaaloalo.

FOFOGA FETALAI: Ia tulai mai le sui usufono mo Faleata Nu 3.

Tofa Hon Lealailepule Rimoni Aiafi: E faafetai lava i lau Afioga i le Fofoga Fetalai. E augata lava e tu atu ona e leai se avanoa e lauga ai i le tele o mataupu. Ae faafetai foi i le uso, le Afioga ia Alaiasa ua taua le vaega lea.

O lea ou tau manatua le tatou Fonotaga mulimuli lava i le tausaga ua mavae nei, e tasi lava le mafuaaga na ala ai ona le aumaia le tatou vaalele o le safety. Ae peitai ane, o lea ua toe sui le tulaga o le finagalo o le Malo, ae o lea ou te manatua le faaiuga a le Kapeneta na i ai talu ai ina ua...o le tupe lea mai le UTOS e fesoasoani i le vaalele, e recapitalize ma restructure le company. E le faapea e aumai le tupe e tuu i totonu, ae tatau ona iloilo e recapitalize ma toe restructure ato le Kamupani ina ia faigofie ona faatino le tulaga lea. E le faapea la o se faiga na faataga fai, ma ina ua afifio mai foi... e pei o le mea lea ua tagai nei i ai lenei itu, e tusa o lea o le a loose loose tatou. E loose le leai o se vaalele, toe loose le alu o le tupe. Ae na aumai le tatou vaalele se i faataitai, po o le a le tulaga e i ai, aua na o le safety lava le tulaga lea sa taua muamua. O le mea foi e popole ai le taofi, o le Ofisa Sili o le Samoa Airways, o ia lea o le uluai pule o le PASO, ou te ofo foi pe afai e le lava

lona malamalama i lea tulaga. O le toe fesoasoani atu lea ma le faaaloalo lava. E faafetai lava mo le avanoa lau Afioga.

FOFOGA FETALAI: O lea lava ua tuu atu le avanoa i lau Afioga i le sui usufono mamalu, ona e leai sou taimi i taimi o tatou lauga.

Tulai mai lau Afioga i le Palemia.

Afioga Hon Fiamē Naomi Mataafa: E faafetai lava i lau Afioga i le Fofoga Fetalai mo le avanoa. E tulai atu e lagolago i le mataupu ua oo i ai le faasoa a le Maota ma le saunoaga a le Afioga i le Minisita o Tupe i le tatou vaalele. Atonu e i ai se manatu mo tatou ua fai sina umi o i ai i Faigamalo ma Upufai. O le mau foi lea e le tatau ona faipisinisi le Malo. O le vaalele i le taimi muamua o le Polenesia faaletonu, fai e le Malo. O lea ua oo mai i le taimi o le Samoa Airways, fai e le Malo. E fai e le Malo ae faatino i faiga faapisinisi. O le mau la, a ua fai faapisinisi, fai moi faapisinisi. Aua o le mea moni lava, a na o se pisinisi moi lava, ua leva ona malolo. Ae o le a le mea lea e fai? E tului, e tului e tului i tupe a le Malo. O a tupe a le Malo, o tupe a lae atunuu. E pei o le mau lena, aua ne i tetena i outou fingalo le saunoaga a le Minisita e faapea e fufulu. E sao e tatau ona fufulu, ona o faiga faapisinisi. Aua e na o le pau lava lena o le auala e mafai ona gaoioi ai, transparent, accountable ia mea e fai. E pei o le a o le a tatou finau ai. O ai na fai mai e fai le vaalele, o ai na fai atu e aua le faia le vaalele. I le taimi lenei, ia outou finagalo malilie, e le faia le vaalele. Ia tatou malolo, tatou mataitu, silasila le Malo i isi auala e mafai ona femalagaai ai le tatou atunuu, faiga paaga o a isi faiga. A o se upu i le nei taimi i le fai o le vaalele, ia finagalo malilie ia le Maota, lea ua fai le faaiuga.

FOFOGA FETALAI: Ia faafetai, ou te iloa ua manino le saunoaga a le Palemia. E masalo foi lo tatou sa, a o o i luma, toe o i tua. Ua i ai le manatu o le Nofoa ua lava ma totoe saunoaga a le Malo i le vaalele. O le mea lea ou te fesoasoani atu i sui usufono mamalu, o lea ua uma ona faataatia le finagalo o le Faigamalo, o lea foi ua saunoa le Palemia, tatou malilie ia i lenei taimi. Se i mataitu foi e le Faigamalo po o le a le laasaga tatou te o i ai. Ae o lea ua manino mea uma, a o lea ua faamalamalama atili e le Palemia, le saunoaga a le Minisita o Tupe, ou te talitonu o le auga lena o le agaga o le Afioga i le Minisita o Tupe, ona o lea e saunoa faalauaitete, mo le aotelega o le tamaoaiga. A ua maea ona sausaunoa Minisita e fitoitonu i ai le vaalele. O le mea lea ua i ai le faiga a le Nofoa, o le a le toe talanoaina le vaalele i le taimi lenei. O lea ua saunoa manino le Malo, o lea foi ua saunoa manino le Palemia, o lona uiga e toe toso ai foi tatou i tua, a o lea ua manino le tulaga o lea e i ai le Malo. O le mea lena, tatou tau fai tatalo i le Atua po o le a se mea o le a tatou agai i ai i le lumanai. O le agaga lena o le Nofoa, ua matau atu foi, o le a tatou toe foi foi i tua. O le mea lea ua faatonuina le mataupu

lea i le vaalele, ua faagata i i le tatou talanoaina, o lea ua mausali le tali a lo tatou Malo.

O le mea lea ma le agaga faaaloalo i sui usufono mamalu, ia faaauau mai lau saunoaga lau Afioga i le Minisita o Tupe.

Afioga Hon MULIPOLA ANAROSA ALE MOLIOO: E faafetai i lau Afioga i le Fofoga Fetalai, atonu e pei lava ona e saunoa, e le toe oo foi i ai se faamatalaga. Ua alu lava le aso ananafi ma lenei aso, o tautau lava le vaalele.

Ia ae se i ou liliu atu se i fai se faafetai i lau Matagaluega, aemaise foi e na lagolagoina i le tapenaga o lenei foi Tala Faatatau Autu o le Tupe.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ou te tulai ma le faaaloalo mo se avanoa, e le o le vaalele..

FOFOGA FETALAI: Ia onosai mai lava le Minisita. Ia saunoa mai lau Afioga i le Sui Taitai o le Itu Agai.

Tofa Hon Lauofo Fonotoe Nuafesili Pierre Lauofo: E faafetai i lau Afioga, ona o se mataupu sa oo i ai ia lau folasaga lauga faalauaitete. O lea ua matau atu o lea e i lalo o le vaega o le Tala o le Tupe a le Matagaluega o Tupe.

O le mataupu lau Afioga i le Fofoga Fetalai, e mai le Tutotasi i le 1962 seia pai mai i le 1980, o le 50% o le tatou GDP sa maua mai i faatoaga. Ona sau ai lea e oo mai i le taimi nei, ua faasolo lava i lalo, e masalo po o le 10% po o le 12% lea ua i ai. E faafetai i fuafuaga ia o le toe lalaga mai o faatoaga, o lea la ua ou vaavaai atu i tulaga ia, ma isi polokalame faataatitia a le Matagaluega o Faatoaga faapea foi polokalame a lo tatou Malo. Ae o lea ua ou vaavaai atu aua o tulaga na e aoga mo le atinaeina o afioaga ma nuu i tua ma aiga, atonu e lavea ua i lalo o le faaupuga po o le faamalu o le Social Development. O lea la ua i ai ma le fuafuaga lea e pei ona aumai i i, i le Tala o le Tupe, o le maketi lea po o le fanua po o le a le tauga po o le Warehouse, lea o le a faatau i o i Otahuhu, ona o lea ou te vaai atu o lea e i le Tala o le Tupe a le Matagaluega o Tupe.

E momoli atu ai le faafetai e pei ona ou talanoa atu i le taimi ua tea. Atonu o se fuafuaga lea ua leva ona fuafua mai e le o tatou Malo. O lona uiga e le gata la o le a faaleleia le tulaga o faatoaga iinei i Samoa, ae o le a faapea foi ona auina atu ai le tele o fua o faatoaga e faatauina i le maketi lea. Aua e tasi lea avanoa lelei lava, o lea ua faatulai mai mo i tatou. O lona uiga o le tulaga lea o le auina atu o tatou fua o faaeleleaga e faatau i Niu Sila i le maketi lea a tatou, o lea o le faatau e tatou le maketi ma pulea e tatou, o se tulaga e faaleleia ai ma siitia le tatou export. O le fesoasoani tele foi lea i le faaleleia o le tatou tamaoiga. O fuafuaga lelei uma ia fuafuaga mo le auina atu o oloa

i fafo. E tusa la o le itu lena o le economic development, po o le atinaeina o le tamaoaiga.

E pei lava ona ou talanoa, o mea ia i lau matau e o faatasi mea ia e lua. O lea la ua oo i le taimi lenei o lea ua faatulai mai le vaegatupe lea, malo faafetai. Ae sa i ai na i fesili ia sa tuuina atu i le taimi sa ou lauga ai i le mataupu lea. I le tulaga lea, tulaga tonu lava o le a faagaoioi ai le tatou warehouse lea. E po o le a lesitala faakamupani, po o le a le faiga la o le a fai ai. Afai foi e faakamupani, a o ai le aufaisea. Ae pe i ai foi se sao a tatou ia le aufaatoaga Samoa. Pe i ai se tulaga e mafai ona faatau ni latou share, ina ia i ai foi so latou naunautaga o se mea o lea e own e latou, ia faapea foi exporters a tatou i Samoa nei. A o se fuafuaga manaia tele lea fuafuaga i lau vaavaai atu i ai. Ae pei o na i vaega na ua mafua ai ona ou toe tulai atu i lau afioga aua e tasi lea mea taua. Aua atonu o i, o le a toe tilotilo ai i le tulaga o feagaiga ia faava-o-malo o tatou ma Niu Sila ma Ausetalia mo vaega ia tau fefaatauiga. Atonu o le a toe faaleleia atili ia tulaga na, ina ia siitia pea le tulaga o tatou oloa o fua o faatoaga e faatauina atu i atunuu e mamao. O le fesoasoani tele foi lea i le tatou foreign reserves. O tulaga lelei uma lava na, o lea e matauina i lenei faamoemoe.

Ae o le autu lava ia o le fesili, o le a le finagalo o le Malo i le faatinoga o le operation? E pei o le fesili lena. Ma le faaloalo i lau afioga.

FOFOGA FETALAI: Ia se i tulai mai le Minisita o Faatoaga.

Susuga Hon Laauli Leuatea Polataivao Fosi: Ou te tulai atu lava ona o le mataupu lea e saunoa i ai le Afioga a le Sui Taitai, ona o au nei ma le Matagaluega o lo o nafa tonu ma le vaaiga o le tatou warehouse lea e i Otahuhu. O le faamoemoe foi ma le manatu o le tatou Malo i lena vaitau e fai le mea lea, e fesoasosani mo tatou oloa auina atu i fafo. O le Nofoaiga lea na uma nei. A o le Matagaluega na tuu e vaaia o le STEC, o le STEC sa fai ma commercial arm o le Malo, e agai i ai i latou e taumafai e faatino le mea lea o oloa auina atu i fafo.

Ou te faafetai o se faatofalaiga lelei sa fai e le Faigamalo lea na uma nei, ua amata, ua faatau le fanua, o lea e tutonu nei i Otahuhu, o la ua maua le fanua.

Pau le mea na tupu lau Afioga, na alu alu alu, ua le gafatiataulima ina e le STEC ona tauave le mataupu. Ona o tulaga o le tele foi o faafitauli, ma le tele foi o tuatuaanoa na tulai mai, o lea la na taofi ai mo sina taimi.

E tulai mai la le Faigamalo lenei o lea e poloka, ua le mafai e le STEC ona toe tauave le mea lea. Ona puna ae loa lea o se manatu ma se lagona i le Palemia ma le Kapeneta, ua tataua ona tatou tilotilo i le isi auala e sili atu. O i lea e fanau mai ai le faiga faavae fou lea a tatou Faigamalo fou, o le Export Authority lea. Import and Export Authority o lea ua aumai tonu lava lava e faaagaga, o le a tulai le Malo, e faagaoioi tonu lava le mea e fetai ma le fale

lea. Aua e le toe mafai e se Matagaluega e toatasi ona alu na o ia e tauave le mataupu. E tatau ona fai lelei se authority e vaai lelei ai ia tulaga uma o le faafoefoaina o le fale lea. E ofaga uma i ai exporters uma a le atunuu ma fai le va faafeagai ai e ave uma ai a tatou oloa nei i fafo. Ma faatulaga ai la le fale lea, i le tulaga e tatau ona i ai.

O le taimi leni, ua toeitiiti lava maea le itutino e faatulaga ai le faatuina o le authority lea. Ua pasia e le Kapeneta le faatulaga o se authority fou leni a lo tatou Malo, e auina uma atu ai a tatou oloa i fafo. O mea uma lava, o fualaaui aina, fualaaui taumafai mata, o tatou oloa uma ma mea tau Samoa. E le gata i faatoaga, a o mea taulima ma isi a tatou oloa gaosi. Ae pei ua amata e le Matagaluega o Faatoaga ma Faigafaiva, ona e pito sili ona tele oloa o lea e tatou te viga nei. O lea tou te saunoa mai... O le ivitu o le tatou atunuu na amata ai le tamaoaiga o Samoa o faatoaga, 1960 i le 1980, o le 70% na faatupe e Faatoaga ma Faigafaiva. O i ina lea e toe toso tatou te o i ai. Ae faafetai o lea ua faatu le fale lea, o lea toeitiiti lava maea atu le Export and Import Authority, ona faatulaga loa lea. O le tatou Matagaluega fou lea, e faatulaga ai mea ia. O lea ua outou saunoa, government to government level approach, and government to government level contact, e sefe lena.

O le taimi leni o lea e o lava na i o tatou tagata, exporters. E le faigofie le mea la e fai, o le o atu o la e faasasaga mai isi tagatanuu o la e nonofo i borders a Niu Sila, Ausetalia Amerika, ae a alu le Malo, e pei o lau tala lea e fai atu soo i le Maota, e tietie exporters i luga o le Malo, ona faigofie loa lea. A o le tulaga o le faafoefoaina, sa fai le faafoefoega muamua ua gau, lea e mafua ai ona toe atinae le mea lea ina ia mautu lelei ma sologa lelei le faamoemoe.

O lau tali atu lena, e i ai le faafoefoaina, e i ai foi le avanoa e mafai ai sea o tagata mai fafo. Ina ia maua le mea lea e saunoa i ai le Taitai o le Malo, tau tataese le Malo ma faiga pisinisi, ona o le tulaga lava lea, gau nei, gau taeao. Ae gau o ai lea e gau ai? E tietie i le atunuu. A o le faamoemoe lena, aua ne i o tatou o e fai pisinisi ona tatou faia lea o le political decision. It has to be commercial and business decision.

O le faamalamalama lena ma le agaga faaaloalo.

FOFOGA FETALAI: Ia se i tuu atu muamua le avanoa i le Sui Taitai leaga o ia e a na le mataupu lea.

Tofa Laufo Fonotoe Nuafesili Pierre Laufo: Lau Afioga i le Fofoga Fetalai, o le mea tonu lava lea o lea sa saili atu e fia maua i ai se malamalama. Aua o le Import Export Authority a tatou i Samoa nei, e pei e gata lava i tatou Tulafono Samoa. O lena e silafia e lau afioga. O Niu Sila, e ese foi a latou Tulafono, e pei o le mafuaaga lena na ala ai ona ou fesili, pe faafefea le faatinoga i o i Niu Sila. O lea ua maua atu, e pei e faapisinisi ea le faiga

lea ua tau maua atu i lau Afioga. Ona e i ai le tulaga foi lea o le sustainability, e i ai sea...

FOFOGA FETALAI: Se i tulai mai lau Afioga i le Palemia.

Afioga Hon Fiaame Naomi Mataafa: O le mea e fia faasao. O lea ua ou manatua nei, e na o le galo ia au, e le i i ai le sui usufono i le Kapeneta talu ai. A o la e malamalama lelei lava i ai Lautafi, Loau, Faimalo i le faavaeina o le mea lea. Atonu o lea foi ua fesoasoani atu le Afioga i le Minisita, ae tutusa lava agaga, e taumafai e taufaaola mai ia auala, e faafaigofie ai ona ave o a tatou oloa i fafo. Se i saunoa ane le aualii lena e faamalamalama ia oe ia le mea na tulai mai ai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e faamalulu atu i lau afioga i le Palemia, ou te le i sau i le Maota e aumai au e lou itumalo ou te lauga i le aualii ia. Ou te sau ou te lauga atu i le Minisita ma le Malo ma a latou faiga faavae. A o lea foi ua maua i le saunoaga a Laauli, ua sui le faiga faavae. O lona uiga e ese le tali e aumai i i, pe a ou lauga i le aualii ia. E pei o le tulaga lea, o lea ua ou manino, ae faamalulu atu i le Afioga i le Minisita o Tupe. O le \$3 miliona lea sa e taua, e pei lava o le NGO, pe a fai...

FOFOGA FETALAI: Ia se i toe tulai mai le Afioga i le Minisita, ona faauma ai lea o le mea lea. Tulai mai lau Afioga i le Minisita.

Susuga Hon Laauli Leuatea Polataivao Fosi: Faafetai. E leai lava se agaga e faalavefau. Ou te manatua lava le aso lea o ou saofai mai o i le mea la e saofai mai ai Lufilufi, maua ma Olo, saofai Olo i o i le pito la e i ai Peseta, na tatou finau ai i le mea lenei o le deficit. Na matuai luga ma lalo saunoaga foi a le sa avea ma Minisita o Tupe i lena taimi, o fea e te lua omai ai ma Olo ma lua faiga faavae e fai ai le mea lenei pe a faapea e te lua tulai mai, i lena taimi. Sa faapea ailoga e tupu. O le ma upu ma Olo na fai, afai i le alofa o le Atua ae manuia le faamoemoe, e fai foi e matou faiga faavae fou, we will not follow i tou mea ia e fai. Matou te tulai foi matou e fai a matou faiga faavae fou. O lea Fonotoe, ia e malie, e pei ona faaoioi atu le Afioga i le Tamaitai Palemia, ia outou finagalo malilie tuu maia le avanoa se i faagaoioi atu a matou faiga faavae fou. Sa avatu foi le avanoa tou te saasaa ai, ae matou aiaiuili. O a ni mea ua matou o atu o lelei, lea e faaauau, o a foi ni mea ua matou vaai e le o talafeagai, ia o lea foi e tau fonofono atu, ona fesoasoani mai lea i le fonofonoga. Ia o le agaga lena, e le o se isi lava itu, a o le manatu ina ia faaleleia. O la e faalogologo mai le aufaitoaga uma i Samoa, i le mea lava lenei, uma na toto sau nofo i le maketi, faufaulalai tautalo, \$5 i le tautalo, leai se isi e toe fia fai maumaga. A o le mea lea, na

ona palasi mai lava palasi atu, toe foi latou e toto mea ma lau mai, ae o le agaga lena export and import authority.

FOFOGA FETALAI: Ia, se i onosai mai lava le sui usufono o Faleata se i tuu atu lava le avanoa lea i le Minisita o Galuega.

Tofa Hon Olo Fiti Afoa Vaai: E puupuu lava le fesili, se faamolemole po o tou malamalama ea i nei mea e fai atu. Ia o le mea foi lea o la e luelue mai le ulu ae le o malamalama nei te i foi ua toe fesili mai se isi. Ma le faaaloalo lau Afioga.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ou te le iloa po o ai la e faauilavea i ai le Afioga i le Minisita po o faauilavea i le Minisita o Tupe po o... E leai na ona faamanatu atu Tulafono Tumau o le tatou Maota, ae o le mafuaaga lena o le fesili e fia malamalama.

FOFOGA FETALAI: Se i tuu atu lava le avanoa lena i le sui usufono mamalu. Malie lau Afioga i le Sui Taitai, o le avanoa lena o le Afioga i le sui usufono mamalu mai Faleata 3.

Tofa Lealailepule Rimoni Aiafi: Faafetai tele lava i lau Afioga i le Fofoga Fetalai, faafetai lou agalelei i si nei sui usufono. Se ona o lea ua taua e le Afioga i le Tamaitai Palemia o lea foi ua saunoa le Minisita, o le mea lea a manao loa e fai le pisinisi o e fai le pisinisi ae taatia le Malo. E pei lava ona faamanatu atu, e eseese atunuu, ma o le mea lea na promote e tatou faatasi, o le PBP model, e i ai le mea o le private, business private partnership, e fai faatasi. O lea faatoa uma nei ona saunoa le Afioga i le Minisita o Faatoaga. Export, import authority. O ai e faia? E fai e le Malo. E faipaaga le Malo ma le aufaipisinisi, o le sao lena o le tatou Malo. E laitiiti le tatou Malo, e le mafai e le private sector ona compete latou. O le NPF, UTOS, o kamupani ia a le Malo, lea e tele ina invest faatasi ma le aufaipisinisi e fesoasoani e avatu e latou le mea. E le mafai ona tuuaunua e le Malo le vaega lea. E oo foi la i le fale lea na fai i Niu Sila, na fai e le Malo. Mo ai? Mo le aufaipisinisi ma tatou. O lea ua taatia atu le tou, a o lea e avatu e fesoasoani. Aua a tatou fuafua i ai, e faamalulu atu i le kamupani vaalele lea a Fiti ma Niu Sila, e tai piliona le mea la e ave i ai e le Malo e run ai. Aisea? E taua. Ia ma le faaaloalo lava. Faafetai.

FOFOGA FETALAI: Faafetai. Malo. O se taimi... Ia se i tulai mai lau Afioga i le Tamaitai Palemia.

Afioga Hon Fiaame Naomi Mataafa: Lau Afioga i le Fofoga Fetalai, o le manaia ia o le tatou faasoa lea e fai, lea ua tatou o i faiga paaga i le Malo ma faiga faapisinisi. Ioe, e i ai le mau e le tatau ona faapisinisi le Malo, ae i ai foi le isi mau, e fesoasoani le Malo e faatu pisinisi. O le fesoasoani foi lea a le Malo na ave ai le loan i le hotel a Aggies. Ioe. E \$53 miliona. Ave e fesoasoani ai e toe faalelei, ae emo ane ua a? Faatau le hotel, totogi le faletupe e faapisinisi ae matamatafua le faletupe o atinae a le Malo lea e \$53 miliona lea na fai i ai. O ituaiga mea la ia tatou te mafaufau i ai, o fea le mea e ave i ai le tamaoiga o lo o fuafua mo le manuia o tagata uma. Ia, na o se faalautele o le tatou talanoaga lea e fai.

FOFOGA FETALAI: Faafetai. Ou te iloa o lea ua malie lau Afioga i le Palemia, o le auga atoa lena o mea uma. O le mea lea, ua tatou taunuu mai i le tatou taimi malolo, faataatiaese galuega a le Maota Fono mo le tatou malologa.

Na faataatiaese Taulumaga o le Fono Aoaio Faitulafono mo lana malologa masani i le itula e 3:47 i le afiafi ma toe faaauau i le itula e 4:20 i le afiafi.

FOFOGA FETALAI: Ou te faasilasila atu ua toe amatalia nei Taulumaga o le Fono Aoaio Faitulafono.

Ia, e i ai si manatu o le Nofoa e ao pea ona avatu i le paia o le Maota, e leai se agaga o le Nofoa e faatauagavale i saunoaga mamalu, aemaise foi lea itu o le Maota. E leai, e silafia e le Atua mea uma. Ae pau lava o lea, o lea ua outou silasila mai ua tulai faatolu, faafa le Palemia, le Taitai o le Malo. Ia e pei lava ona silafia e le Maota, e tali loa le Taitai o le Malo, ia o lena. E le o se isi la tulaga e faatauagafau i o outou finagalo faaalia, a o lea ua saunoa manino le Palemia aemaise foi o le Malo, e leai, e le o teena fautuaga. E talia mea uma, a o le agaga lava ia, o lo tatou te galulue faatasi ma ia aua ne i tatou fefoifoiai i a tatou galuega.

O le isi foi mea mo le silafia e le Maota, o lea ua i ai le tatou lafo, seiloga e maea tatou galuega o le Pepa o Galuega faatoa tatou malolo. O le mea lea, o le agaga lena o le Nofoa, e le o se isi tulaga faapea e faatauagavale i outou finagalo, leai. O le agaga lava ia ina ia tatou o i tulaga mamalu ma tulaga e masani ai, o lea ua tali faalua faatolu le Palemia ma le Taitai o le Malo. Ia ma o le agaga lena, ma o le tulaga foi lena e i ai. O lea foi ua i ai faiga faavae a le faigamalo foi i lenei vaitaimi, tatou talia. Ae tatou faufautua mo le agai i luma.

Ia e pei o le agaga lena ou te faufautua atu ai, ia, e leai e le o s isi lava itu, ae ua manatu o le a tuu atu le avanoa i le Minisita o Tupe e faauma mai lana

saunoaga, ona faaauau ai lea o le tatou galuega. E faasolo pea le tatou galuega, o lo o maua lava avanoa i se isi taimi, a o le taimi lenei, e pei o le agaga lena o le Nofoa, e le mafai ona tuua, e avatu pea mo le silafia e le paia o le Maota.

Se i tulai mai lau Afioga i le sui usufono mamalu mo Gagaiformauga 1. Saunoa mai lau Afioga.

Tofa Hon Faimalotoa Kika Stowers Ah-Kau: Faafetai tele mo lou avanoa lau Afioga i le Fofoga Fetalai. Ia ou te le o toe talanoa lava i se isi mataupu po o se kamupani po o ni vaalele po o ni faiga favae. Na pau lava le mea, leaga o lea o le a maea ma faaiuiu le saunoaga, ae pei o ita na ta tu lava i lota naunau lava i le mea lea ua taunuu mai i le tatou atunuu.

O lau fesili la i le taimi lenei, taatia lava nisi mea se tele, a o lou naunautaiga, ia faamuamua po o fea lea o le a ave i ai le tatou faamuamua. E pei o lea na avatu lata tuualalo aneleila ae leaga ua maea e le i tali mai pe aoga pe leai, le tatou \$200,000 o lea ua afatia le atunuu, ae o le a tatou faatali lava seiloga e fau ni ofisa ma ni... le tatou Komiti foi lenei. Ae a pe a malilie maia le tatou.. ua mafatia le atunuu ae faaalu alauni o tagata ia e fesoasoani i le mea lea e fai mai ai le atunuu po o le a le matou mea e mafai ona fai e fesoasoani atu ai. Ou te talitonu, o i e maua ai le fesoasoani tele mo le toagaogao o le aufaigaluega, aemaise o faamaumauga ina ia sao po o ai ua uma ona tui, o ai e le i... a silasila foi i le mop up lea na fai mulimuli ina ua uma ona fai le misela, na toe maua mai le isi \$2,000 a le Ministry of Women. Pei o lou lena naunautaiga, ave ia le tatou faamuamua i le mea ua tupu ona ua aafia le soifua o le tatou atunuu. Na pau lena o si ata toe tuualalo atu lava po o le a se finagalo o lena itu, a o faiga faavae ma na tulaga, ta te le toe fia talanoa i ai.

FOFOGA FETALAI: Faafetai. Ia se i toe tulai mai lau Afioga i le sui usufono mamalu mai Aleipata Itupa i Luga.

Afioga Fuaava Suluimalo Amataga: Faafetai i lau Afioga mo le avanoa. E momoli le agaga faafetai i le saunoaga a le Afioga i le Minisita o Tupe, ia o lea ua tau faaiuiu mai foi. Ae i ai isi mea ia sa taua i lana saunoaga e momoli atu ai le agaga faafetai i le pasene lea o le tefesite, lea foi sa taua i lau lauga, ua pau mai lea i le 25% i le 24%. Faafetai i lea lui ua tuuina mai. Oi, le 2.4%, lea ua agai mai le lelei mai le 2.5%. e pei o le tulaga sa avatu i se faamatalaga aua o lea ua taua ua pau le tatou tamaoaiga. O le uiga la o le faamatalaga sa ou avatua se faaitaiga i le vaitaimi o le 2008 i le 2009 o lou iloa po o se vaimea o le 6% sa i ai le pau o le tamaoaiga. A o le taimi lenei, e pei o se mea foi lele e pei e tau compare i ai, po o le a se tulaga lea ua i ai, po o le 1% ua pau i ai, po o le 20% po o le 50% le pau. Pei o se tulaga foi lele e tau benchmark i ai, ia e i ai foi se tulaga foi lele e i ai ni nai alert levels

foi ia o le tatou tamaoaiga, po ua red tatou i le level 3 ona o le Koviti-19, ia po ua ono oo foi le tatou tamaoaiga po o le GDP i le red. E pei o tulaga ia po o le a se protect ua i ai le GDP faamolemole. Ma le agaga faaaloalo.

FOFOGA FETALAI: Ia, faafetai o lea ua maua atu le finagalo o le sui usufono mamalu. Lau Afioga i le Minisita o Tupe tulai mai.

Afioga Hon MULIPOLA ANAROSA ALE MOLIOO: Faafetai i lau Afioga i le Fofoga Fetalai. Ou te talitonu foi ua matu i fau le tautega a le tatou Palemene, ua maua foi se faasiligamalosi tatou te faaauau ai aua le pasia aloaia o le tatou Tala o le Tupe. Ia, e talitonu o lea foi ua i ai ni faafesili, a o lea sa ou tapena o le a fai lau faafetai i lau Matagaluega ma tatou paaga o lo o ala mai ai tatou seleni. Ae ui i lea, ia atonu i le aotelega foi o saunoaga pei ona tanoa ai tatou sui usufono aemaise foi o lena itu o le tatou Maota, o lo o popole po o le a se vaaiga mamao. Tau lava ina ou faamanatu i le tatou Palemene, toe 5 masina maea le tatou Tala o le Tupe. I totonu o le tatou Tala o le Tupe o lo o i ai vaega uma ma faamanuiaga ua uma ona i totonu ma pasiaina aloaia i le tatou Tala o le Tupe, pei ona i ai le tatou \$5 miliona lea mo a tatou apitaga o turisi, ia o lea ua maea ona tufatufaina atu. O lo o i ai le tatou \$10 miliona ua uma foi ona approve aloaia i luga o le tatou Kapeneta, atonu o se aso o le vaiaso nei po o le vaiaso lea saunoa foi le Afioga i le Minisita e ana tonu le \$10 miliona lea agai i pisinisi, o le a faapena ona tufatufaina foi na faamanuiaga, i le taimi tonu lava lenei o lea tatou te mafatia ai le atunuu ona o lea ua i ai tatou positive cases. Ia, e le gata i lea, o lo o i ai foi le tatou \$1 miliona mo le tuutiitia o sauaga i tina ma tamaitai. O vaegatupe uma lava ia o lea e i totonu o le tatou paketi, o lea e manao e ave i tua, o le faamanuiaga lena mo tatou tagata o lo o vevesi i le taimi lenei ma fememeai, o le a se galuega a le Malo a o lea e i ai tatou alagatupe ia.

O nisi foi o isi vaega o lo o i totonu o le tatou paketi lea, o le tatou \$2 miliona o apitaga, pei ona o lea foi ua maea ona vaevaeina ma faamaape foi i luma o le tatou Kapeneta le \$1.5 miliona ia tuu atu i le tatou vaega lea o le ADRA mo tatou apitaga i tua i nuu ma alaalfaga, ma le isi \$500,000 mo le tatou CARITAS, ia ma le tele o isi tatou miliona o lo o i totonu o le tatou paketi. Ia aua la nei o tatou mafaufau tele ne i te i ua faapea ua tatou vaaimamao atu ua leai se tatou seleni, ua uma ona approve aloaia i totonu o le tatou Maota lenei le tatou Tala Faatatau Autu o le Tupe lea na tatou lufilufia foi ma ave i ai finagalo ma saunoaga ia Setema. Pau lava le mea i le taimi lenei, o le faamautu o faiga faavae ia tuu atu loa tatou faamanuiaga na, ae 5 masina e tatau ona faatino ai vaega ia.

Atonu o lea foi e taua e le Afioga i le sui usufono mo Gagaifomauga 1 ia Faimalotoa le tatou tupe lea e agai i le tatou \$200,000. Atonu o lea o lo o malaga i fafo le tatou Minisita o lo o feagai ma le Matagaluega o Tina ma Tamaitai, a o lea e alaala atu le Afioga i le tatou Palemia, o ia lea o lo o nafa

ma e le o malolo foi le tatou Komiti e faamautu vaega ia. A o le taua, o lea ua aumai le finagalo ma le manatu e lauilu ai foi le Komiti ina ia mautinoa ia i ai faamanuiaga lea e tuu atu i le mamalu o le atunuu. Aua o lea ua pisa mai isi vaega, se Mulipola, o afea e toe tufa ai isi tupe a le NPF? Ae ou musumususu atu, leai, o le a le mea o le a tatou o ai i le NPF, oka se mau miliona lea ua uma ona approve i le tatou Tala Faatatau o le Tupe, o lea e le i maea ona tufatufaina atu i le mamalu o le atunuu. O lona uiga, e le tatau ona tatou atuatuvaale, ae taua lava le oo mai foi o le faamai se i test ai foi po o le a le ituaiga level o le tapenaga ma le sauniuniga a Samoa o lo o i ai i le taimi lenei. Ia atonu o lea ua maea saunoa le Afioga i le Minisita o le Soifua Maloloina i le aotelega ma le aioiga ia galulue faatasi, ia tatou galulue faatasi ia puipui Samoa. E ui lava o lea ua i ai tatou cases, a o le tatalo foi lena a le tatou Minisita o Tupe, ia tatou galulue faatasi, aua o i tatou te iloa ai ua tele le le mautonu o le lalolagi. A le mautonu le lalolagi, e aafia le tamaoaiga o tatou. O lona uiga, o le malosi o le tagata e alu alu gata, e alu alu muta. Ae o le tulai mai o le tatou faigamalo e pei foi ona atagia foi le Suafa Faatuatua i le Atua Samoa ua Tasi. O lona uiga, a uma loa tatou metotia faaletagata, tatou lafoai loa i le Alii, o le Alii na te tapenaina i ana auala ma ana Ia metotia e le oo i ai le malamalama o le tagata e mafai ai ona tatou taumafai e foia le faafitauli lenei. O le faafitauli foi e le o se faafitauli na o Samoa, o le faafitauli o lo o aafia ai le lalolagi atoa. Ae aua tatou te popole.

Ia, muliaina sau faafetai e faaleoina atu i le matou Matagaluega o Tupe. Ia atonu o le Matagaluega o Tupe, o le ogatotonugalemu lea e lufilufia le tamaoaiga o Samoa. Ou te fiafia e faalogologo atu i fautuaga, o timaiga, e faufau ai le Matagaluega, aua o le tatou sa e faufaatasi. O outou finagalo e auai ma tuuina mai, e faapena foi ona taumafai ai le matou Matagaluega.

Ia, mo le silafia foi o lalo lava ia o le Minisita o Tupe, o lo o i ai foi le UTOS, o le NPF, o le SLAC, Faletupe o Atinae, o le tatou Faletupe Tutotonu o le Central Bank ma le SIFA. O vaega uma ia o lo o i ai lo latou sao taua i le tamaoaiga o Samoa.

E faaleoina le agaga faafetai i lou auvaa ona o le latou tulai mai e lagolagoina le tou Minisita. Ma e faaleoina foi le agaga faafetai i tatou paaga. I lau vaavaai lava ia i le tatou paketi, o le tele ia o le sao o tatou paaga o lo o agalelei mai pea ia Samoa. Ia, e mafai ai ona faatino a tatou fuafuaga, e mafai ai foi ona maua le tamaoaiga, ia se i lufilufi e le tatou faigamalo ua tulai mai, ina ia mautinoa ia oo le tamaoaiga i tua i nuu ma alaalfaga, aua o le tasi lea vaaiga taulai a le tatou faigamalo fou, ia faamanuiaina o tatou aiga, o tatou itumalo, aemaise nuu ma aiga.

Ia, o le a faaiu atu lau tapenaga. Lau Afioga i le Fofoga Fetalai o le Maota, e tatalo i le Atua ia faaaupegaina oe i meaalofa a le Agaga Paia ina ia mafai ai pea ona faatonufofau le tatou Maota Fono o Samoa.

Ia agalelei le Alii i lau Afioga i le Palemia, ia maua pea le filemu mai le Alii e te taitaiina ai le sa folau o Samoa, ae a le lagolago a lau Kapeneta aemaise foi Afioga a Minisita Lagolago.

Alofagia e le Alii lena itu o le tatou Maota, e faapena pea ona o tatou galulue faatasi ina ia mafai ai ona toai taunuu Samoa i se manuia mai i le Atua. Ia ae ola lou tagata faatauva, ia soifua.

FOFOGA FETALAI: Ia malo faafetai, ia malo saunoa i lau afioga i le Minisita o Tupe. E talitonu foi lea e faafofoga ma le totoa le paia o le Maota aemaise foi le faafogafoga mai o le paia o le atunuu i tulaga foi o lau saunoga i le aotelega o le tamaoiga o le atunuu.

Ia e talitonu foi o lea ua e saunoa manino foi ia aua le faapopoleina le atunuu aemaise lava o ni galuega faafuasei ia po o a foi ni tulaga faafuasei, o lea lava ua lava tapena ia le tulaga tau tamaoiga ma seleni ia aua lava ni mataupu faafuasei e pei foi o le faamai.

O le mea lea ia malo faafetai o lea ua manino le saunoga, ia e talitonu foi o lea ua manino foi ia le paia o le Maota i sui usufono mamalu, ia tatou agai i luma ma talatalanoa agai i luma ma o tatou galulue faatasi ia aua lava ia le tamaoiga o le tatou atunuu. O le mea lea malo le saunoa i lau afioga i le Minisita o Tupe.

Ia ua o tatou oo mai i le Minisita o Faamasinoga ma Pulega Tau Faamasinoga.

Tofa Hon MATAMUA SEUMANU VASATI SILI PULUFANA (Minisita o Faamasinoga ma Pulega Tau Faamasinoga): Lau afioga i le Fofoga Fetalai, ou te manatu e le toe taupaopoina faatupe sala i fala paia, o paia le avefa ma faiga le vaea o le Maota Fono. Ua mamalu foi o le malae o le faautugatagi i Tiafau nei, o mamalu tauave lava lea o Samoa mamala aua ua taoto a o se alaoo, aua o Samoa o se fue lavelave, ma o le vaofilifili e le maauuina e se tagata faatauva.

O le ala lea e afualalaga ai se leo e tumu i le faaaloalo i lau afioga i le Fofoga Fetalai aua e ta te tu lava i to, ae lia i pisaga e pei o le tala ia Fiamē ma Salevalasi. Aua o lea ua malumaunu, ma malutae le Maota i le afio o lau afioga i le Fofoga Fetalai.

Lau afioga i le Palemia, lau afioga i le Sui Palemia, ma sui usufono mamalu o le Kapeneta. Lau afioga i le Sui Fofoga Fetalai, faapea afioga i Minisita Lagolago. Lau afioga i le Sui Taitai faapea le maualuga o sui usufono mamalu, o lena itu.

E le faagaloina foi le tapuaiga mau a Samoa o faafogafoga mai i ou paia faale-Talalelei i aufaigaluega tofofi a le Atua i so o se fata faitaulaga. I mamalu faale-Malo i le afio o lau afioga i le Ao Mamalu o le Malo o Samoa ma lau Masiofo, afio lau afioga o le Sui o le Fono a Sui Tofia ma lou faletua, tainane le afio o le Faamasino Sili faapea le Matagaluega o Faamasinoga,

aemaise sui o Malo o lo o faipaaga ma agalelei mai i si o tatou atunuu. Tainane foi paia faaifogata o Samoa lavelave i si o tatou atunuu nei ma so o se tafa o le lalolagi, o lo o aumau ma saili matagi ai.

O le Afifio lava lea o Aiga ma Tama, o Tama ma Aiga, le Usoga a Pule ma Tumua, Ituau ma Alataua, Aiga i le Tai ma le Vaa o Fonoti. Tainane foi le tapuaiga a nai o tatou uso i Sasae aua Sua ma le Vaifanua o Fofu ma Aitulagi, Saole ma Saleaamua ma le Launiu na Saelua, tainane le Faatuiolemotu ma Tootoo o le Faleula ma Upu i le Manuatele.

Ae o le faamanu ma le faasagi ia Manuvao, o le Atua agalelei o lo o faavae ai si o tatou atunuu pele o Samoa, ia silisili lava lea i mea uma. E ui lava ina lutia Samoa i puava ona o le fememeai ona o le faamai lea ua i o tatou laufanua ae ua o tatou mapu lava i Fagalele talu le Atua auai na ia te i tatou.

Ia e momoli atu le faafetai i finagalo faaalua o sui usufono mamalu uma e pei ona sa faaalua i le tatou Fonotaga. O le mea e faafiafiaina ai se manatu, e le o ni finagalo maemaea, a o le tuualalo. Faafetai tele tuualalo, ae taua ma aoga e matimati ai le tatou galuega. Ae peitai o le Tala Faaopopo o le Tupe ua i lumamea nei, luma o le Laulauafono o le Palemene, e le o afea ai ia lenei Matagaluega.

Ia ae taatia mai, o lea ua faamauiina a outou fautuaga ma outou lapataiga, ua le o toe mamao foi e pei ona saunoa le Minisita o Tupe, toe 5 masina ia ona tatou oo i le isi Tala o le Tupe Autu, tala Faatatau Autu o le Tupe, ia ona o tatou talanoa ai foi lea i fautuaga.

Ae faapea ai se leo, ia manuia tele lau afioga i le Fofoga Fetalai, faapea le afioga i le Tamaitai Palemia, ma sui usufono mamalu uma o le Palemene o Samoa.

Susuga Maulolo Tavita Amosa: Lau afioga i le Fofoga Fetalai...

FOFOGA FETALAI: Ia malie lau afioga i le Minisita o lea ua faaiuiu foi le saunoaga ao lea e matau atu o tulai mai le sui usufono o Sagaga Nu.2 ia saunoa mai ia le sui usufono mamalu.

Susuga Maulolo Tavita Amosa: Ia faafetai mo le avanoa, ou te ava foi i le folasaga malu a le tamaitai Minisita. O le ala foi lea leai o le a le tuliaupuina tele ma toe ta tamamao i tua se taofi ona e pau lava le mea lea e tau popole i ai le sui usufono o lenei itumalo, e na ona saunoa mai o a outou saunoaga uma ma tuualalo, o lea e faamauiina.

Ia ae silasila foi lau afioga ma le mamalu o le Fonousu nei a le Palemene, e tasi lea o Matagaluega sa fai lava si mamafa i ai o lau folasaga, i lau folamua lea o lau lauga faataupou ona e aafia ai mataupu maaleale o lo o noatia ai le soifua filemu ia le va o itumalo ona o eleele lea e i le tuaoi, ia aemaise foi o lo o noatia ai ia le atinae o le Aoga lea o le Kolisi o Sagaga, noatia ai foi ia le atinae o le fanua lea e fuafua e fau ai se falemai o le itumalo.

Ia e pei lava ona ou... ou te ava tele i le folasaga a lau afioga i le Tamaitai Minisita, e pau lava lou tulai atu i le taimi lenei faamolemole, ina ia mautinoa o lena e te faamauina se malama lava po o se avanoa muamua mai pe a maea le Fono a le Matagaluega, o le a matou savalivali atu ai ma alii ma faipule, e follow up ia le mataupu lea. E leaga o mea e noatia ai atinae a le itumalo.

Ae faafetai tele lava mo lea folasaga ia ua uma foi se taofi o lenei itumalo. Faafetai lava.

FOFOGA FETALAI: Malo o lea ua maua lelei lava e le afioga i le Tamaitai Minisita, o lea foi ua faafogafoga ma le totoa le Maota. Ia o faaiuga o faamasinoga ia e pei ona naunau mai ai ia le sui usufono mamalu, ia lau afioga i le Minisita.

Tofa Hon MATAMUA SEUMANU VASATI SILI PULUFANA: Ia, e faamalulu atu, leai e le o galo ia te au e pei ona ou fai atu, o lea ua faamauina ae ona faapea atu lea o se tala, manuia tele lau afioga i le Fofoga Fetalai, faapea le afioga i le Palemia, ia ma sui usufono mamalu uma o le Fono a Samoa.

Ia manuia foi Ofisa Sili o Pulega o Matagaluega ma Faalapotopotoga Tumaoti a lo tatou Malo, ae faapitoa lava lau faafetai i le Matagaluega o Faamasinoga ma Mataupu Tau Faamasinoga, malo le galulue malo le tautua.

Ia manuia tele le faafogafoga a Samoa, soifua ma ia manuia.

FOFOGA FETALAI: Ia, malo faafetai, malo le sausaunoa i lau afioga i le Tamaitai Minisita. Ia o lea lava foi ua manino e le o i ai lau Matagaluega i totonu o le Tala Faaopoopo o le Tala o le Tupe.

Ia ae faafetai o lea lava ua e tulai mai e sausaunoa, ia ma faamau lelei ia mataupu e pei o lea na laga mai le sui usufono mamalu o Sagaga Nu.2. O le mea lea ia tautuana ane ma lau afioga ia le tulaga lena ia ma le agaga faaaloalo.

Ia o lea ua o tatou oo mai i le isi Matagaluega e le o i totonu o le Tala Faaopoopo o le Tupe le Matagaluega o Aoga. Tulai mai lau afioga i le Minisita o Aoga.

Afioga Hon SEUULA IOANE (Minisita o Aoga, Taaloga ma Aganuu): Lau afioga i le Fofoga o le Fono, lau afioga i le Palemia ma lou auvaa, le usugafono mamalu o le Fono Aoao Faitulafono a Samoa.

O lau vaai i le felanulanuai o tatou laei ma laei, e eseese uma lava. A o lou talitonuga, e tasi pea le pemitā na mafua ai ona o tatou ulufale i le fale lenei, o tatou o sui usufono filifilia mai i itumalo e 51, o tatou e omai e fau le Malo ia manuia ma fau ia lelei. E tasi ia lo tatou faamoemoe, e tasi lo tatou loto, e tasi ia lo tatou fatu, e tasi lo tatou faasinomaga, ia manuia Samoa.

Lau afioga i le Fofoga Fetalai, ou te tu ae maniti ou tino, e taumasalosalo lava pe e le o mauili o lou itumalo lea e faapepepepe mai i ou autafa, e tulituliloa lava po o fea o i ai ia le latou sui usufono na fili mai. I le Afio o le Tonumaiepea ia Tauiliili, Susu le Aiga Sa Moeleoi, lo la toalua o Taatiti ma Tuaiiaufai, faapea le Alataua. A ou oo i le la itu, Afio mai le afioga Nofoga o Faalupega, Tapaau ma Aiga, lau Tofa Folasaga o Oe o le Fofoga o Papa.

A ou latalata mai i le mea e goto ai le la, e Afio ai le Tama o le Malo o Gisa, tainane Siilata, Afualo ma Maiava, o Tama a le Usoalii. Susu Seuula, Afio le Aiolupotea ae a le Alo o Lilomaiava, Afio Tuifaiga, Alalatai lau Tofa Momoemausu, aemaise ia lo tatou Falealataua.

Ou te fia momoli foi moomooga i le vasega o le au Sa Levi a lou itumalo. Ou te talitonu, e le o misi au i a outou tatalo, faafetai tapuai.

Lau afioga i le Fofoga Fetalai ou te fia faamalo foi i Pulega i mamalu ma paia faale-Malo, faale-Talalelei, faale-Aganuu e pei ona tapuaia o tatou faiva i lenei aso.

Lau Afioga i le Fofoga Fetalai, e tasi lenei Matagaluega e le o lavea i le Tala Faatatau Faaopoopo o le Tupe ma e ou te manatu foi e le umi se taimi e tataua ona ou tu ai i luga, e faatoa umi lava pe a oo ia Iuni, aua o la faatoa faaopoopo ai nisi tupe mo le matou Matagaluega. Ae ona e le tuuina i lalo ia le agaga faafetai i sui usufono, o i latou o e na lagolago mai i lenei Matagaluega, na momoli mai le latou tofa, sa fagota i le tuasivi ma fagota i le moana, e saili mai se ai mo lenei Matagaluega.

Ma e fai au ma sui o le susuga i le Minisita Lagolago le afioga ia Agaseata, faapea le Ofisa Sili o Matagaluega o Aoga, Ofisa Sili o le Iunivesite Aoa o le tatou Malo, Pule Faatonu ma le Ofisa Sili o le Vaega e latou te pulea Faailoga Taualoa, o latou na o lo o i lalo o lau Matagaluega.

E tele nisi atinae taua ma manatu aoga, ua mafai ona maua e le Matagaluega e ala i la outou faatofalaiga, e matimati ai ma fau ai le faulalo o lenei Matagaluega. E tele mataupu na faailoa mai, ma e na ona ou pai lemu i ai vaeane lo outou mamalu ona ou toe nofo ai lea i lalo.

Sa afea i nisi sui usufono mamalu ia le utiuti o tatou faiaoga. Afioga e, ua i ai le faiga faavae a le Matagaluega mo nei itu. Sa afea i nisi sui usufono mamalu ia le utiuti o tatou faiaoga. Afioga e, ua i ai le faiga faavae a le Matagaluega mo nei itu. Sa afea i nisi sui usufono le toe faaopoopo o nisi Asiasi aoga. Afioga e, ua taatia nei i luma o le PSC, le toa 5 Asiasi aoga fou ua sauni mo le galuega.

Na aafia i nisi sui usufono mamalu le taua o le TVET, ma le PSET i le taimi lenei ua galulue faatasi ai le APTC ma le NUS e tuu i totonu o latou fuafuaga ia le TVET, ina ia iu mai ia tamaiti aoga, ua omai mai le agavaa lea e o ma latou i tua, e galulue ai i aoga ia ma faasoa foi i alalafaga e pei ona faasoa mai nisi manatu taua, ina ia atinae lava le itumalo ia, e fai se gaioga e faaleleia ai le itu lea.

O le PSET, o le vaega la ua galulue ai le SQA e toe faaoa ia o tatou tagata faigaluega, ua mafai ona toe o atu e aoao ina ia siitia le level e omai ma latou i tua, e faagaioi ai ia galuega. Sa ma faasoa ma se tasi sui, faapea mai sana faamatalaga, e le o mafai ona au ia le level o tamaiti ia i tua, e omai e faataitai ia galuega. Ua tali mai ia le SQA, o iuga o latou fuafuaga, ia iu mai tamaiti i le level 3, ma le level 4.

O tulaga i mea tau faleaoga, e pei foi ona manaomia foi e nisi o tatou sui usufono mamalu, o lea lava ua i ai faataatiaga a le Malo, e faamaite lava e nuu, le itumalo, tapena se fanua, ave se tusi i le Matagaluega, saili fofu atu i a tatou atunuu ia e lagolago mai, e fesoasoani mai, ona faatupe loa lea e le Matagaluega, totogiina o faiaoga, aemaise le tapenaina o mataupu.

Ua aoga tele ia le Aoga Faataitai, ua matauina ma le totoa, i le taimi foi a o ou i ai au i tua i le galuega, e iu mai tamaiti ia i le Aoga Faataitai, e omai ua popoto e tautatala, popoto e pepese, popoto e fai numeru. Ao le vaega lea e omai sao lava Year 1, toetiiti lava uma le tausaga, o la e lava e tau faaoleole lava e tautala ma fai se upu.

Sa ou alu i le laugatogi a le AOG i Faleasiu lata mai nei lava. O le mea na maofa ai, na nonofo le aufaauu lea e tai 4 tausaga, ae tu i luga le tamaitiiti e 3 tausaga, o ia lea na faia le lauga e faafeiloai ai malo, faafeiloai uma tagata sa i totonu, e le gata ina uma ona faaSamoa, ae toe liliu ane le ula lea, toe liliu i le Gagana FaaPeretania. E matautia ia o le taua ma le sao o Aoga Faataitai, i le tapenaga lea e taumafai atu i ai a tatou aoga.

O le vaega lea o le OGG, One Government Grant, ua faaavanoa mai vaega lea, e faatau ai aseta a aoga, ina ia lava totoga aoga, i mea e galulue ai, faatino ai, aemaise lava lenei vaitau ua o tatou poloka i le Koviti. Ua tatau ona tofusua aoga uma ma tekonolosi faaonaponei e oo atu ai lesona i aoga taitasi. O lona uiga, o la e lava ua i ai le vaegatupe, e tua i ai aoga ma faleaoga, e fesoasoani i a latou fuafuaga ia.

O le... Sa i ai se tasi sui usufono na faapea mai, pe aisea ua multiple choice ai ia suega a le tausaga 8. Manatua foi masalo o le taimi lea o lea e tatou te aoga uma. O le taimi lena na fai ai selections, e select ai tamaiti e o i le Kolisi a le Lotu o isi Kolisi mauualuluga lava a le Malo. O le taimi lenei, ua leai se selection e toe faia. E uma loa lau Year 8, e otomeki lava ona e alu e te Year 9 i le Kolisi a lou itumalo. O lona uiga, ua na o se faiga ua faataatia e le Matagaluega e aveese ai tamaiti i le Tausaga 8 ae see atu i le Tausaga 9.

Ua le pei o aso ia sa matautia le galulue o faiaoga, e commit lelei faiaoga ina ia lelei ia aoga e faaauau ai aoga a latou fanau.

O le totogi o faiaoga sa fesiligia e nisi, i le taimi lenei e le faigofie i le Matagaluega ona ao mai data ma tulaga eseese o faiaoga. O lo o i ai le galuega a le Matagaluega e tau faapotopoto mai ia informations uma ia, ia ona faaalu loa lea e pei ona faataatia e le faigamalo i luma o le tatou laulauafono. O le totogi na o faiaoga. Aoga Faataitai ia lea ua uma ona fai ai se tala.

Ou te manatu, e pau ia o le aoatetelega o ni mataupu na laga mai e sui usufono taitasi. E pei foi ona ou manatu ma ou talitonu au ia, o la outou faatofalaiga, o se oloa aoga mo le Ofisa o Aoga. O nisi o finagalo na aumai i lena vaiaso, ma faapipii loa i le Matagaluega e galulue ai mo le taimi nei aemaise lava le afaina o tatou i le faamai.

Lau afioga i le Fofoga o le Fono, ma le mamalu o le tatou usugafono, e pau lea o se tapenaga ua oo i ai. Ae e pei foi ona malie i le saunoaga a le Minisita e le i mavae atu nei, o lea lava e faamaumau uma manatu.

Susuga Maulolo Tavita Amosa: Lau afioga i le Fofoga Fetalai...

FOFOGA FETALAI: Ia malie lau afioga i le Minisita se i tuu atu le avanoa i le sui usufono mamalu o Sagaga Nu.2, ia aua e pei o ia lea sa tele i i ana saunoaga. Saunoa mai lau afioga i le sui usufono mamalu.

Susuga Maulolo Tavita Amosa: Faafetai mo le avanoa lau afioga, e faamalulu atu foi i le mamalu o le tatou Maota nei, e laga foi se tootoo ae o na e silafia uma, o le vaega e pito i umi lea o lau folasaga sa fai i ai e mo mea ia o aoga ia faaauau i tulaga faamatataeseese le TVET ma le PSET.

O le upu moni lava e ese ma le manaia o le folasaga i le faalogologo atu. Ia e le tau selu atu leaga o lau afioga o le matuaofaiva o le polofesa faafiaaoga. Faamalo le faatoatoa e pei o lo outou malaefono e tusa ma mataupu sa tau lalaga atu e le tatou Fonousu nei.

E na o le lua lava nai mea ia ou te fia pai i ai, ia ona e manumanu foi i le tatou taimi. Muamua, ina ua maea lau folasaga i le Maota i le aso na sosoo ai, ae amata ona tali mai ia nisi foi i le NUS, faafesootai le SQA talisapaia le mea lea sa taumafai atu ai faafetai.

E pau lava le mea e toe fia faaopoopo atu, ona o saunoaga a nisi o afioga i Minisita, i a latou fuafuaga alualumamao i atinae e manaomia ai foi ia agavaa faatekonolosi e toe foi mai lava i le Matagaluega o Aoga, ina ia maua atu i i ia le ituaiga atamai lea, lea e mafua ai ona faataua e lou nei sui usufono le tulaga e tau o le TVET ma le PSET.

E pau lava le mea sa tau laga mai e latou i tulaga ia, ona e fou foi tainane o lea ua taoto ia outou faiga faavae ia, faamalo atu i la outou Matagaluega le tapena o lea ua ou vaai ai i nisi o a outou policy documents e uiga i mea ia ua maea tapena pau lava le mea e toe ina ia faatino. Ae e pei o le tulaga lea ua tau maua e tuu atu i ou tafatafa, ona e fou ia le tausaili mai o ni trainers. E i ai le popolega i tulaga 0 totogi, ne i fua laugatasi ia latou qualifications ma isi vaega foi o tagata faigaluega a le Malo, ia e ono aveva ma disincentive le tulaga lena e unaia ai nisi o alo ma fanau o le atunuu e aveva ma faiaoga o tulaga ia tau aoga tau TVET.

Ia e pei pau lava lea o se mea e toe tuu atu i tafatafa o lau afioga, ae faafetai tele lava mo lea tulaga ua e folasia.

O lona lua, ia e leai se agaga e faataumatatao, e tautala lava ma le faaaloalo i Suega ia o le Year 8, ia afai la e pau lava le aoga o lea suega ina ia see ese ma toe alu i le Kolisi e le o toe faaogaina i se isi lava mea, e le o se avanoa la nei e toe silasila ai pe o toe aoga lena suega? Pe le o le isi lea faamamafa o le tofogi o lena suega? Pe afai e le o toe i ai se mea e faaoga ai?

Ia aua o le upu moni lava, e faaeteete foi i le tulaga e toe foi maia sau tala a la e faafofoga mai ia la outou Matagaluega, i le tulaga mo mea o National Exams. E talitonu e malamalama foi le afioga i le Tamaitai Palemia, ia ae tuu atu i tou tafatafa afai o le tulaga lena, toe liuliu le tofa pe o toe talafeagai nei suega i le Year 8 pe afai e na ona faataunuu, multiple choice e silafia uma. E faafofoga mai foi sui o Matagaluega na aoga uma lava e fai e na o ni multiple choice, ia ae o le a faamuta ai i i sau faamatalaga.

Ae faafetai tele lava i lau afioga i le Minisita o Aoga, ia faafetai foi mo le folasaga manino, ia aemaise foi o le avanoa ua tuuina mai e lau afioga i le Fofoga Fetalai, ae ia manuia ia le tatou Fono.

FOFOGA FETALAI: Ia saunoa mai lau afioga i le Minisita o Aoga.

Afioga Peseta Vaifou Tevagaena: Lau afioga i le Fofoga Fetalai...

FOFOGA FETALAI: Ia se i onosai laitiiti mai lava se i tuu atu le avanoa i le sui usufono o Faasaleleaga Nu.5.

Afioga Peseta Vaifou Tevagaena: Ia talu ai ona e tasi lea vaega sa tele i ai lau lauga i le aso foi sa avatu ai se manatu o lou nei sui usufono. O le tulaga maualuga o lea ua ou faalogologo atu, faafetai foi o lea ua talia ma amanaia e lau afioga i le Minisita se tuualalo i le tulaga lava lea e tau o Aperenitisi ona o lea e matau atu, e talitonu foi e ala ona tulai mai tulaga nei po o nisi foi o faafitauli i alo ma fanau oe a uma mai ia latou aoga, ia ona e le o atoatoa ia tulaga foi nei e faatino ai tulaga nei faa-Aperenitisi. E pei foi ona talanoa atu lau afioga i le Minisita, o le Aperenitisi lava ia, e 2 lava ia vaega taua. O le aoaoina ma le faatinoina aua e tele la o aoga i atunuu i fafo, o le Aperenitisi lava ia e le tuufaatasia skills. E le mafai ona tuufaatasia ia skills e i ai le au palama, faieletise, faakamuta, skills eseese.

Ae ou te faafetai o lea ua maua tulaga lea e saunoa i ai lau afioga, e pei foi ona ou talanoa atu, o totonu lava ia faa-Aperenitisi e tatau lava ona i ai se fale e faatino ai skills nei. E tatau ona i ai se fale e tapena e le Matagaluega, se fale foi lenei e aoaoina ai ia alo ma fanau i le palamaina oe i le faatinoina o se tala faataitai o le tosoina o le vai. Ia...

Tofa Hon Leatinuu Wayne Soialo: Lau afioga i le Fofoga Fetalai pe maua se avanoa.

FOFOGA FETALAI: Ia se i tulai mai lau afioga i le Minisita pe a... se lagolago i le Minisita o Aoga...

Tofa Hon Leatinuu Wayne Soialo: Ia faafetai atu lava i le afioga i le sui usufono ua afea le vaega lea o le aperenitisi. Ia sa i ai lava le agaga ana sau i le taimi sa fai mai ai le lauga, e pei e foliga mai e le i alu agai i le aperenitisi ae alu agai i le standard, i tulaga ia. Ae lelei pe a ou fesoasoani atu ia faasaoia ai foi le taimi o le Minisita.

O lo o i ai le polokalame a le Matagaluega o Pisinisi, Alamanuia ma Leipa, o lo o faatinoina ai aoaoga ia faa-aperenitisi. O lea o lo o faatinoina, o lea foi faatoa uma ona fai le latou graduation. I vaega ia, e 8 ni vaega o lo o vaevaeina i ai le Aperenitisi o lo o faatinoina lea i totonu o le National University of Samoa, ia faapea foi ma vaega ia i autafa. O lo o i ai le kamuta, fau meafale, gaosia o totoga o masini, palama po o le fai paipa, o le souamea, inisinia o afi taavale ma masini, fai moli eletise, faipusa aisa ma le ea malulu. E faapea ma le inisinia faaeletise. O tulaga ia o lea e faatino i lalo o le polokalame a le MCIL. E mo le silafia e totogi e le Faigamalo le 50% o aoga ia faa-Aperenitisi, ona totogi lea e le falefaigaluega a le o lo o alu e aoga i le Aperenitisi le 30%, ae totogi e le tamaititi o lo o alu e aoga le 20%. A uma la ona faauu lea i le faaiuga o le tausaga pe a uma ona aoaoina i le tulaga lea. O lea e fesoasoani atu ai, mo le faasaoia o le taimi o le Minisita o Aoga, o lo o faatinoina le polokalame lea i tausaga uma. O lea la ua i ai isi ua faaauu ua mafai ona ave vaega ia e 2 i le taimi e tasi, ia ma faaauu ai pe, mo le aoaoina foi e up skill a tatou fanau. E po o i latou foi ua i ai a latou galuega, ae toe fia maua le aoaoina i tulaga ia. O le agaga lea e fia fesoasoani atu ai i lau Afioga.

FOFOGA FETALAI: Ou te iloa o lea ua manino, le tulaga lea, ona o lea ua tapa le Minisita o Pisinisi Alamanuia ma Leipa, ona o lea e faatino tonu ai le tulaga lea. Ou te talitonu o lea ua manino lau afioga, o lea lava e faatino e oo mai i le taimi nei. A o le TVET ma le PSET o lea ua lauga ai ia le sui usufono o Sagaga Nu 2, ia o lea ua faafogafoga mai le Minisita o taumafai e faatino.

Lau Afioga i le sui usufono mo Faasaleleaga Nu 5 pe i ai se isi mea.

Afioga Peseta Vaifou Tevagaena: E faafetai i lau Afioga i le Fofoga Fetalai. Ua e iloa foi le sui usufono lenei e ava tele. Ae o le manatu na avatu, na avatu sao lava i le Minisita o Aoga, ou te le i avatua i le Afioga i le Minisita o Leipa ma Alamanuia. E pei ona avatu sau fautuaga foi ma faasoa ai e fafo foi ma le Minisita, ona o se matou foi tuualalo atonu e taua ma aoga. E pei o le agaga lea, o lea sa avatu sao lava, ae momoli atu le faafetai i lau Afioga i le Minisita o Aoga, e masalo o le a faagata ai foi i i, se manatu, aua o lea ua tali mai le Minisita, ua lava ia lea. Ma lou faaaloalo lava.

FOFOGA FETALAI: Ia tulai mai lau Afioga i le sui usufono mo Salega.

Afioga Fepuleai Faasavalu Faimata Sua (Salega 1): E faafetai mo le avanoa, e talu ai o lea ua oo le saunoaga a le Minisita i Aoga Amata. O au le isi sui usufono sa ou tuualalo atu foi i vasega ia o Aoga Amata.

E matau lava i nuu i tua aemaise lava lou itumalo e i ai Aoga Amata a Ekalesia, ae lagona foi le matauina o anavatau a le Faimalo e totogi uma e le Malo ia faiaoga a Aoga Amata. O sau tuualalo atu, pe i e manaia le tuufaatasi o Aoga Amata i lalo o le faamalu o Aoga Tulagalua, ia tasi ai lona pulega. Ma ia tasi ai foi ma faigofie i le pulega ma le Minisita, aemaise o le Faigamalo ona faatupe le totogiina o faiaoga. Ma e lelei foi lea o le tasi o le Pulega, e laugatasia uma ai Aoga Amata ma Aoga Tulagalua.

O le vaega lona lua lau Afioga i le Fofoga Fetalai, ua matauina e le i ae aoga ona o le taimi lenei o le faamai. Ae lagona le faanoanoa e lou itumalo, tulou le Minisita o Galuega, lo ma itumalo fai faatasi. E tasi lo ma kolisi, e oo mai i le taimi lenei, e le i ola lava fesootaiga faaneionapo e faaoga i ai le zoom lea e faaoga e tamaiti aoga ma faiaoga. Na ou talanoa atu i le tausaga na tea nei, e uma lelei le tausaga e leai se mea o ola. A o le taua ia o le taimi lea ua i ai tatou, e nonofo mai lava faiaoga i Salafai, ae fai atu fono i inei i Tumua, ae o la e faigofie ia fesootaiga.

O le ala o lou toe tulai atu lau Afioga i le Fofoga Fetalai, e toe silasila lau Afioga i le Minisita o Aoga, pe le toe faleleia ia lea vaega. Aua o le taimi taua lea o lea ua ae aoga, a o la ua o ane faiaoga o le Kolisi, e taua foi le fesootai mai a o la e fesootai atu. O le toe tuualalo atu lea ma le agaga faafetai.

FOFOGA FETALAI: E mo le faasaoina o le taimi o lau Afioga, se i tulai mai lau Afioga i le sui usufono mo Aleipata Itupa i Lalo.

Afioga Faleomavaega Titimaea Tafua (Aleipata Itupa i Lalo): E faafetai i lau Afioga i le Fofoga Fetalai, e mo le faasaoina o le taimi o lau Afioga i le Minisita, leaga sa lavea i lau lauga le tele o vaega ia. Ae ou te malamalama lelei, e leai se vaega e tasi, o le Tala o le Tupe, o aafia i le vaega lea. Ae faafetai, o lena o le a e faamaumauina i lalo, aua le agai i luma o le tatou Fonotaga. Ma le faaloalo, faafetai lava.

FOFOGA FETALAI: Ia tulai mai lau Afioga.

Afioga Sulamanaia Fetaiai Tauilili Tuivasa: E faafetai lava i le Minisita o Aoga, e le selu atu. O lea ua e malele foi e le o lavea i lau Matagaluega se tupe faapoopo, a o le Maota lenei e talanoa lautele i le tamaoaiga o le tatou atunuu, aemaise le tulaga lea tau aoga. Sa ou talanoa i asiasi aoga faafetai

tele lava. O lea ua e tali malamalama o lea ua faaopoopo, o le isi vaega sa ou tatalo atu ai, o puleaoga. O lo o i ai faiga faavae a le tatou Matagaluega e pei e fuafua le totogi o le puleaoga i le toatele o tamaiti. E na ona tuu atu lava i ou autafa, e le iloa po o le isi mea lea, o le toatele lava o tagata e le fia o i nuu i tua, o puleaoga, se i tulou lava ia...pe fia omai lava e pule i totonu i Apia i aoga ia e toatele e tele ai le totogi. Ae pei o le tuualalo sa avatu, o le puleaoga lava o le puleaoga, pe toafia lava tamaiti i lea Aoga Tulagalua. E tutusa lava le pule la e i Fagaloa ma le pule lea e i Malifa. E pei e faapena se vaai, ae faafetai tele lava o lea ua e tali mai i nisi mea sa tuuina atu i asiasi aoga, ma totogi o faiaoga. Manuia le Fonousu a lo tatou atunuu, lau afioga i le Fofoga Fetalai.

FOFOGA FETALAI: Ia tulai mai lau afioga i le Minisita.

Afioga Hon SEUULA IOANE: Lau Afioga i le Fofoga Fetalai, e momoli atu le faafetai tele i felafolafoaiga foi i lenei vaega o le aso. Ua aafia ai le Matagaluega o Aoga, Taaloga ma Aganuu. O le fesoasoani mai a le sui usufono mai Aana, i le uiga o le suega lea a le Tausaga 8, ua i ai faataatiaga a le Matagaluega, e amata mai suega ia i le Year 2, Year 4, Year 6, Year 8, o lona uiga, o lea o le a faasolo i luga i le Year 10. O suega ia e i totonu i i, e pei o diagnostic test, e tau ina saili ai le agavaa o i ai tamaiti i lea taimi i lea taimi, aua ne i umi o tuulafoaina.

E faafetai i le Minisita ia Leatinuu mo le faamalamalamaina o vaega ia. Ia faafetai foi i lau Afioga i le sui o Faasaleleaga, e sao lelei lava lou fofoga. O le aoga foi o le fesoasoani mai a le Minisita, ua mafai ai ona faaopoopo se isi malamalama e uiga i le galuega a le SQA, ina ia tuu i luga le level lea, mo le faafetauiga ma galuega a si o tatou atunuu.

O le saunoaga e pei ona fai mai i Aoga Amata, a mea o le auga lena o faigamea. Ou te manatua i le vaitau a o i ai le Faigamalo lea, sa alu atu ai foi i tua le latou asiasiga i nuu ma itumalo ma atinae. Sa i ai la sui o le matou nuu. E taape mai, ae omai sui faapea, o le feau a le Malo, ia amata ona fausia Aoga Faataitai. Sa i ai la le sui o le Matagaluega o Aoga na alu atu ai, ona alu atu lea o le teine lea ma talanoa, fai mai, Seuula, e manaia ae aumai la outou Aoga Faataitai i totonu o le Aoga Tulagalua. Ou fai atu, o ai e ita i lena mea. O le mea la o la e i ai, o tamaiti lea o le a sauni e omai i le tausaga fou i le Tulagalua. E i ai isi aso e aumai ai e faatutu i le laina a tamaiti e faamasani ai, i le va latalata lea. O lea e saunoa mai le sui usufono, e tuufaatasi, ina ia totogi e le Malo. Ae peitai, o lea foi e i ai alafua a le Malo e saili ai po o le a le tomai lea e i ai faiaoga, e le mafai ona totogia e le Malo, pe a fai e te i lava ua aumai i totonu, ma faapea, tatou o i totonu e totogi ai tatou e le Malo. E leai, e i ai foi fuafuaga ma faataatiaga e tataua ona mulimulitai ai. Ia i ai ni faiaoga ua iu mai i le Aoga Faafaiaoga, ia lelei le

lotoa ma soagalemu le mea e i ai tamaiti. Ona mafai loa lea ona faatu se Aoga Faataitai.

O le taimi lenei o lea ua alu i tua le polokalame a le Ofisa o Aoga e faaalu i luga o le media, o le zoom, ina ia tofusia aoga ma lesona. E le gata e vaai ai le utiuti o faiaoga, a o le taimi o le faamai. O lea la e tali nei, po o le a se update, aua o lea e tau amata i le vaiaso lenei ona tau faaalu i tua. O lea foi ua ma talanoa ma le Minisita o Fesootaiga, e 30 aoga ua trial i ai, ina ia mafai ona tali mai i le mea lea. O lona uiga, e tataua ona faatotoga, pe ua i ai se TV, pe ua i ai se laptop, i totonu o le aoga e faigofie ai.

O puleaoga, e sao lelei le sui usufono, ona o le faataatiaga lea e i ai nei, e fua le tofogi o le puleaoga i le aofaiga o le roll o lana aoga. Atonu o lea e faafofoga mai le PSC ma le Pulega, aua foi lou finagalo ua faaalua.

Ona ou manatu lea, e alofa foi i le tatou taimi. O le tausaga lea ua tea nei, i le masina o Tesema. Sa valaau mai ai le Ofisa o Pisikoa ia te au, ou te alu atu matou te faamanatuina le 60 tausaga, talu ona faavae le faiga lea a Amerika, i ana auaunaga o le filemu, po o le peace corp. Ona matou o atu loa lea, ae i le amataga po o le 1960, o i ina na faavae ai se faiga lea a Amerika e fesoasoani ai i atunuu tau atiae, i lana Human Resource lea. E le avea ni tupe ae ave tagata. O i la i Mitican i le taimi lea o lea e Peresetene ia John F Kennedy o ia lea na faia le faaupuga lea i le aulaiti lea o le a sauni e malaga ese, fai mai. Amerika aua tou te fesili mai po o le a le mea e fai e le Malo mo outou, ae fesili outou po o le a se mea tou te faia mo le Malo.

Lau Afioga i le Fofoga Fetalai, aemaise o le usugafono mamalu, o le tele o nisi finagalo ua faailoga, e le gata ua aumai le fesili, ae aumai ma le tali aumai ma le faataitaiaga. E manaia tele, o se feau mafanafana foi lea i le loto o le Minisita o Aoga, e le gata i le faatumai, ae toe aumai ma le faataitaiaga lelei, o lea o le a fai i lou itumalo le TVET lea. O le a fai so matou fale, e le faatali seia o atu le Malo. Ia galue oe, faatino oe, e pei lava ona ou fai atu, o tatou ua tasi le loto, tasi le agaga, ia manuia lo tatou atunuu.

Lau Afioga i le Fofoga Fetalai, ia manu ou faiva faapea lenei usugafono mamalu, i le alofa ma le agalelei o le Atua. Soifua.

FOFOGA FETALAI: Ua faamalo saunoa i lau Afioga i le Minisita o Aoga, ou te talitonu o lea ua maua lelei le agaga o le faafoefoeina o lau Matagaluega. Aemaise foi o nisi foi o manatu taua ma fautuaga taua na laga e sui usufono mamalu. Ia faafetai o lea ua mautinoa ua faamauina e lau Afioga aua le agai i luma o alo ma fanau a le atunuu, i le tulaga tau aoaoina. O le mea lea, malo faafetai.

Ua tatou oo mai i le Minisita o Fesootaiga, tulai mai lau Afioga i le Minisita.

Afioga Hon TOELUPE POUMULINUKU ONESEMO (Minisita o Fesootaiga ma Faamatalaga Tekonolosi): E faafetai i lau Afioga i le

Fofoga Fetalai, mo le avanoa o lenei usugafono mai Falealili 1, e fofoga ai lenei Palemene mamalu i tulaga foi o le auaunaga, lau Afioga i le Palemia ma le Faigamalo, galuega a lenei Matagaluega.

E fia piiama lenei itumalo i le talosaga molia i le taeao ua sola, na faafetaia ai e lau Afioga le alofa taumulimuli o le Atua ia Samoa, aemaise lona Palemene ma le Faigamalo. O lenei ua tatou tuvae, ua maea le 6 masina muamua o le Faigamalo, o tumau le agalelei o le Atua. E ui lava ina lutia i faafitauli ae o le agaga lena o le ola, o le ola faatuatua i le Atua pe a oo i faafitauli. Ia tumau le viiga i le Atua e oo i le faavavau.

E faatulou i le paia o le Maota o Samoa, i le afio o lau Afioga i le Fofoga Fetalai ma sui usufono mamalu o itumalo taitasi o le Palemene. Afio lau afioga i le Palemia, afio afioga i Minisita o le Kapeneta, tainane le afio o le Sui Taitai ma le mamalu o sui usufono o lena itu o le Maota. O sui na filifilia mai e itumalo e 51. Tainane le mamalu o le Ofisa o le Fono, lau susuga i le Failautusi, ae a le mamalu o Ofisa Sili o Pulega o Matagaluega a le Malo, o lo o lima ma vae i ai feau ma galuega a lo tatou Malo, faafetai.

E faatulou foi i le faafogafoga tapuai a si ou itumalo o Falealili 1. O le na auala mai ai le pule a le Atua ua ou tulai ai i lenei Maota o Samoa. Tulou le susu i Susuga o faafeagaiga taulagi o lo o faafalelemalu i Fata tapuai o lo tatou itumalo. E faatulou le faafogafoga tapuai, afio Tapaau ma Aiga, mai lava i Poutasi ma Fagamalama, Lalofau ma le Atimalama seia paia Falefasa ma Falepunaoa. I le afifio o Alalagafa ma la oulua Nofu ma le mamalu o Tauagaeseese ia Falealili.

E tainane foi le tapuaiga malu Pulealua, o Saoao ma Tamaitai, Faletua ma Tausi, e oo lava i tinifu ma le malosi o le tatou itumalo. Tulou.

O paia o Samoa o lo o tapuai mai i ona tulaga faalupe, mai mauga tetele seia paia mauga iti, tulou tulouna lava.

Ae le i oo la se tala e tusa ma le valaauina, e momoli ai le tofa o matafaioi a lenei Matagaluega, e fiala lava i lenei ituaso. Aemaise o lenei Fonotaga mamalu, o lea ua atoa tootoo o le Maota. Aemaise lava o lea ua seei ma atoa tootoo o Falealii i le Maota o Samoa. E faafetai o lea ua seei le Afioga ia Fuimaono Maiava i le Paeaiga XVII lenei. Ia manuia ou faiva.

O lenei ituaso lau Afioga i le Fofoga Fetalai, e fia faamanatu i le Palemene le taua o lenei Matagaluega. E manatu o lo o nofo silafia le tulaga pagatia o lo o i ai o tatou uso a tuaoi i le Pasefika i le faaletonu o le infrastructure aemaise lava o le fesootaiga. O le ala lea, aemaise foi o lenei vaitau i le faamai. A o feagai le Kapeneta i le la vaiaso ma fetufaaiga ma faaso po o le a le tulaga o le a fai. O le fesili ogaoga lea. Aua o le mea moni lava, e le mafai ona tatou toe alo ma le faamai. E pau lava le tatou galuega o le tapenapena. I ia tapenaga e taua le fesootaiga.

O le mea lea e lagona ai le fiala o lea o lo o faalogologo ma le totoa i le Palemene ma le Maota o lo o i ai le agaga taua, o le faatauaina o tatou fesootaiga. E i ai nai faiga faavae ua faataoto e le Faigamalo, e talitonu e tali

ai nisi o fesili e pei ona taoto i finagalo o sui usufono. (1) O lea ua toe silasila le Faigamalo e tatala le faaaogaina o tatou satellite. O a lava satellite e mafai ona faaaogaina, aemaise lava i tulaga o lo o i ai, nisi o faleaoga, o falemai ma tulaga e le o oo atu i ai ma faaletonu ai fesootaiga. O lea ua tatala le avanoa e faaaoga ai ia fesoasoani a le tatou submarine cables aemaise lava ua o tatou silafia le faafitauli i Toga. Ua mavae atu nei le 2019 na motu ai le cable, na atoa le vaiaso ma masina o faaletonu fesootaiga. O le ala lea e toe silasila ai le Malo i lea vaega taua. Aemaise foi o le silasila ina ia maua avanoa tutusa i tatou Kamupani o Fesootaiga, aemaise lava Kamupani tau atiae, ina ia maua avanoa e atiae ai ma faaleleia atili ai le auaunaga. E 2 vaega, e le gata i le tamaoaga, a ia tapue silafia mai alo ma fanau a Samoa lava ia, ia tulaga tau fesootaiga.

O lona 3 lau afioga, o le Faigamalo e silasila i lana auaunaga ia siitia. E pei lava ona tau amata se tala, i le tulaga o le taua o le fesootaiga, aemaise lava lenei vaitau.

O le mea lea o se taumafaiga lena, e manatu mo le agai i luma, e tau amatamata ai se galuega amata a lenei Faigamalo, i le tulaga o tatou Fesootaiga.

I finagalo faaalua o sui usufono, e manatu o le mea muamua na laualuga, o le tatou coverage i telefoni aemaise lava i nuu i tua. E pei lava ona silafia, o lo o faatino galuega a le Pule Faatonu, e asia ai vaega uma o le atunuu e fuaina ai le gafatia o le oo atu i ai o le coverage mai a tatou Kamupani telefoni. Ma e taatia mai foi le Lipoti e tai 6 masina ma aumai le Lipoti. Ae peitai ua faatonuina mo lenei vaitaimi ina ia siitia, ia taumafai e aumai i masina uma le Lipoti. O le agaga lava ia lau Afioga, ina ia siitia le auaunaga a Kamupani telefoni i so o se tafa o le atunuu. Sa faaletonu foi nisi o mea faigaluega a le Matagaluega, na faaletonu ai le auaunaga. Ua maea ona faaleleia lea vaega, mo monitoring systems ma taavale e faatino ai lea vaega, ma ua maea faatino.

Atonu o le toe mataitu ma vaavaaia lelei foi ia le faatinoina o auaunaga, ina i siitia lea vaega.

O le vaega lona lua, o le tulaga e tali tutusa lava, o le tatou internet. I nuu i tua ma le tele o vaega o le atunuu, aemaise foi i aoga. E pei foi ona faaali finagalo o nisi o sui usufono i le afioga i le Minisita o Aoga. O lea ua i ai, o le agaga foi lena o lea ua ave ai le avanoa i Satellite ina ia faatuina i nisi o aoga, ina ia mafai ona oo atu ai le coverage aemaise lava, i le tulaga tau internet. O le mea la lea, o nisi na o fuafuaga a le Malo o lo o faataatia.

I le tulaga i aoaoga, e pei ona saunoa foi nisi o sui usufono, masalo ua outou silasila, o lo ua aumai i totonu le tauofoga sa faatino. O le tulaga sa i ai i le taimi ua sola ma aso ua mavae, sa faaaoga le SNBH, e tele tupe e tuu i ai ae le o tino mai, aemaise foi o se system e le o lelei vaaia mo lenei taimi. O lea ua agaga le Faigamalo e tender i tua i a tatou Kamupani telefoni lea vaega. Ina ia mautinoa, e le gata e maua le fesootaiga, ae ia i ai se maintenance

responsibility e tuu atu i tatou konekarate mo le faatinoina o lea vaega. A o faatino lea vaega, ae o lo o faatino ai se fuafuaga alualu mamao ina ia mausali lea infrastructure e taua mo aoaoga ma le agai i le lumanai.

E pei ona ou taua e lua vaega e faaaogaina tatou satellite, aemaise o aoga o lo o i ai le fibre e mafai ona connect i le fibre pe a faigofie ona oo atu i ai. O le tatalo ia tatou lavapapale, o lea faatoa 6 masina. Ou te talitonu e le i afa lenei tausaga ua tataua ona i ai se suiga lelei mo le tatou connectivity mo aoga. E faapena foi i le study centre, mo le silafia, e ui lava e le o i lalo o le Malo ae o le a tilotilo i ala talafeagai e mafai ai ona fesoasoani i study centre. O le naunautaga e aoga uma lava, mo le tatou atunuu.

E faapena foi i tatou computer lap, e maua foi nisi o talosaga a sui usufono, i computer laps. E pei ona taoto i faiga faavae, o tatou computer laps o le faatotogaina o tatou aoga o le matafaioi lea a Komiti Aoga i le tulaga o lo o i ai. E le o tuua ai le tuu mai pea o le talosaga, ae tuu atu i Kamupani ma business community mo lea vaega pe afai e faatinoina.

E i ai nisi o sui usufono sa aumai foi se fautuaga e ala i le Regulator ma le tulaga i le smart meter. E fialia lava e fesoasoani atu, lau Afioga i le Minisita o Galuega. Masalo o lo o manino, i le tulaga lava ia i le galuega a le regulator e tilotilo uma i itu e 2. O le itu o le auunaga, a le Kamupani aemaise foi o le faamalieina o le customer i le tulaga o le tau e tataua ona i ai.

Lau Afioga i le Fofoga Fetalai, o le faasea i le tulaga ua..

FOFOGA FETALAI: O se taimi ona faaauau lea o le saunoaga a lau Afioga i le Minisita. Tulai mai lau Afioga i le sui usufono mo Faleata Nu 3.

Tofa Lealailepule Rimoni Aiafi: E faafetai i lau Afioga mo le avanoa. E leai e fai foi se malologa a le Minisita, e faafetai foi i le saunoaga manino. O lea na saunoa i le faatauaina o fesootaiga. A o le taimi lenei, o le mea pito sili lea ona aoga le faaaogaina. O le tulaga lea e i ai, ai seiloga e fai se taua lona 3 a le lalolagi, ona afaina lea o fesootaiga a Samoa. O le taimi nei e 3 marine cables ia e i ai, o lo o i ai foi le satellite o la e provide mai e latou, mai luga o ISIS ia e fai e providers ia e i ai nei. A o le mea lea i aoga, ona o lea na taua e faapea, sa ave le tuualalo i lau Afioga i le Minisita, ae le i maea le Paeaiga talu ai, sa matou taamilo. I le taimi lenei ua soo le 2AP, soo le digital TV ua soo foi telefoni, toetiiti lava. O le mea lea e tupu, e i ai mea e vaivai ai le Vodafone ae malosai ai le Digicel. O le talosaga lea sa i ai, e galulue faatasi e go locate.

A faapea o le pou a le Vodafone lea e i ina, o atu i ai masini a le Digicel e fesoasoani i ai ina ia mafai ona go locate. Aemaise lava i Salega e pei ona saunoa Fepuleai, o i ina i Taga, i le matie lena e i ina, o i ina ga i ai le fuafuaga e faatu ai le pou, a o le faigata ona ae i luga. O lea sa o ai tama e vaai i le taimi lea, ae pei o le uiga lena o le fesoasoani, o lea e tau pei e ...e moni o le satellite, ae i ai foi vaivaiga na ala ai ona opt tatou i fiber cable. Ae o lo o

i ai lava le avanoa i le taimi nei, e televave ai le oo atu aemaise i aoga. Na matou taamilo, e i ai aoga o la e ola ai Vodafone, ae le o ola ai Digicel. Ona matou talanoa loa lea, e le gata i le faatuina o latou masini i le mea e maua ai le signal, a o le fesoasoani e go locate mea ia e lua, ia galulue faatasi ia le Digicel ma Vodafone, ina ia mafai ona televave le auaunaga lea i aoga. Ma le faaloalo lava.

FOFOGA FETALAI: Atonu o lea ua faafofoga mai lau Afioga i le Minisita.

Afioga Hon TOELUPE POUMULINUKU ONOSEMO: E faafetai tele i lau Afioga. E fiafia lava e maua fautuaga faapea, i le Afioga i le sui usufono mo Faleata Nu 3. E pau lava le agaga foi lea... e moni o la ua...e pei sa tali ai foi i le Fonotaga talu ai, e moni o la ua i ai le connectivity ma tulaga faapena e go locate, a o totonu o le faleaoga e le o ola. E mafua mai o le ki o le modem ua ola, e o mai latou, o atu na i faiaoga leua le ki le toe ola. O le tulaga lena, e leai so latou silafia, ae le faapipiia foi i le modem o ai e vili pe a leaga, o ai e vili pe a le ola. O le agaga lena, o le a mamao tele tatou i le tele o le connection ma le connectivity a o basics laiti lea o lea e tau agai atu i ai. O le mea lea e faafetai o lea ua faamauina uma. Atonu a tilotilo foi i le tulaga lea, atonu o lea lava e i ai lava le interest o le Afioga i le sui usufono i mea tau cable, a o le tulaga tonu lava lea na tupu ia Toga, ua motu le cable sa i lalo o le taele o le ogasami ma motusia ai fesoootaiga. O le mea lea a tatou faalagolago i le isi mea, tatou tapena foi mo le isi mea. E pei lava o le tatou CT Scan, o lea o le a 2 la e i ai, e pei e fesoasoani foi lea a faaletonu le isi ae o la e spare le isi. O le mea lea e faafetai ai i le Afioga i le sui usufono.

I le tulaga lea i le tatou smart meter, ia o le tulaga lena lau Afioga i le Fofoga Fetalai. Ua silasila foi ma le totoa le Pule Faatonu ma le Matagaluega, e ao ona faamalieina itu tau consumer, i lou faataua lea o le iunite, alu lau seleni tu mai ma le aofai o iunite e tataua ona i ai. O lo o galulue le Software company e tau foia lea faafitauli. O lea ua atoa le masina o tau foia. O lo o faatali pea ae le i i ai se agaga o le Pule Faatonu e taofi lea vaega. Na pau le mea ia faamalieina le mamalu o le atunuu i le tulaga e tataua ona i ai.

Ia e manatu na pau lea o le tulaga sa i ai i le tele o finagalo o le tatou Palemene lau Afioga. Pau le isi vaega e le i i ai se isi sa saunua i ai ae ao lava ona faailoa o le auaunaga a le falemeli. O lo o ua siitia le auaunaga a le falemeli, siitia foi le tulaga o tupe maua, aemaise foi ia toe agai le faigamalo i le faaiuga sa i ai i le tulaga foi lea o le tatou PBP e pei ona i ai, ina ia lelei tapena ia vaega ae le i agai atu i le lumanai.

Ia pei na pau lea lau Afioga i le Fofoga Fetalai. Ae le i nofo i lalo le sui usufono mo Falealili, ia e fia momoli le agaga faafetai...

FOFOGA FETALAI: Se i onosai mai lava lau Afioga i le Minisita o Fesootaiga se i tuu atu lava le avanoa i le Minisita o Galuega.

Tofa Hon Olo Fiti Afoa Vaai: Lau Afioga i le Fofoga Fetalai, ae le i maea le saunoaga a le Afioga i le Minisita, e na ona ou tulai atu lava e faaopoopo atu i le tulaga lava lea o le smart meter pei ona manino ma malamalama uma le saunoaga a le Afioga i le Minisita, e faamalulu atu foi i se tuai laitiiti mai e pei ona i ai le faatonuga a lau Afioga ma le Pule Faatonu, ae o lo o i ai lava le tulaga lena o le tau fuafua mai, ona o lo o tatou faaaogaina le south wear a le kamupani lea mai Amerika pei ona ou talanoa atu ai. E i ai lava nai popolega lau Afioga i le Fofoga Fetalai i le vaega lea, ina ne i alu alu le system lea ae faaletonu mai Amerika le fuafuaina ma le set up ina o tatou smart meter ae faaletonu, lona uiga e gau le EPC i le tulaga o le pepe faafuasei foi lea o smart meters ia. O lea foi e maua mai nisi o le mamalu o le atunuu, o isi lava smart meter e alu alu lava freeze luga o fuainumera foi ia, ia ona alu alu lea o isi consumers, fai mai e alu alu lava lea e toe ola mai a ua negatives ua leai ma se latou iunite o totoe ai, na o le ola mai lava pe loa ona o le faaletonu o lena. O isi foi la consumers e faapea mai e freeze pe lua tolu fa aso o freeze, display fuainumera, ae ola mai, o la e tumau lava le aofaiga o latou iunite. E fai lava la si faaeteete tele i le taumafaiga. O le taumafaiga e taua foi i isi itu, but, o le tulaga lava ia, e ao lava ona tatou tilotilo i se tulaga faapena leaga o lea ua faasoo totonu o le taulaga i le smart meter. O lona uiga a i ai ni tulaga faaletonu ona o le polokalame mai le south wear mai Amerika i le kamupani lea, o lona uiga la e tele se faaletonu o le a oo i ai le tulaga o tupe maua ma le faagasologa o galuega a le tatou Pulega. Ae faafetai tele i lau Afioga i le Minisita. E faamalulu atu, o lea lava e... matou te faigaluega foi nanei e tausaili mai le mea o lo o finagalo i ai lau Afioga.

FOFOGA FETALAI: Se i tulai mai lau Afioga i le Minisita.

Afioga Hon TOELUPE POUMULINUKU ONESEMO: Ia, faafetai. Faafetai i le... Ou te manatu o le mea taua lea i le faigamalo lena lau Afioga, o le galulue soosootauau. Faafetai i lau Afioga i le Minisita mo le saunoaga matagofie e fesoasoani ai foi i le tatou galuega.

Ae le i nofo i lalo le sui usufono o Falealili lau Afioga i le Fofoga Fetalai, e fia maua se avanoa e faafetai ai i si ou itumalo i le tapuaiga aua foi galuega ma le tauavameaina o le tatou valaauina, le Alii e, faafetai. Faafetai i le itumalo mo le tapuaiga, faafetai mo tatalo ua ae manuia ai foi lena taumafaiga i lena vaiaso.

Lau Afioga i le Fofoga Fetalai, o le tatalo a Falealili, ia maua lau tofa mai le Atua aua le faatautaia o le sa o Samoa e ala i lana Palemene. E faapena lau Afioga i le Tamaitai Palemia, ia faamanuia le Atua i le tofi aua le

valaauina e le faigofie, aemaise lenei vaitau i nisi o faafitauli ua feagai ma i tatou. Ia, o le tagata faatuatua lava ia e fiafia i faafitauli e luitauina ai le ola faatuatua.

Le Kapeneta ma le mamalu o le Palemene, ia maua la outou tofa aua le galuega ua valaauina ai i lenei vaitau o le soifuaga. Lau Afioga i le Failautusi ma le paia o le Matagaluega, faafetai mo mea uma, maua lo outou malosi aua le galuega a le Malo.

Ia, le paia i Ofisa Sili o Pulega o Matagaluega aemaise o Faalapotopotoga a le Malo, malo le tautua atunuu. E leai e le vale lo outou tau, e tauia outou i le lagi aua lo outou soifua auauna mo Samoa ma le tatou atunuu. Manuia lenei aso, manuia le tatou Fono. Faafetai.

FOFOGA FETALAI: Ia, ua faamalo saunoa i lau Afioga i le Minisita mo Fesootaiga, Tekonolosi faapea foi le Fono Aoa. Malo lava saunoa ma faailoa foi le tulaga ua i ai le Matagaluega ma galuega, ia malo lava faafetai. O lea foi ua maua nisi o mataupu sa laga e sui usufono mamalu, ia, o lea ua oooo lava i ai lau saunoaga. O le mea lea, faafetai tele lava mo mea uma, o lea ua tapena, o lea foi ua faafofoga ma le totoa le Maota i tulaga ma mea sa laga i latou saunoaga.

Ua tatou oo mai i le Afioga i le Minisita mo Punaoa Faalenatura ma le Siosiomaga ma Tagata Asiasi Maimoa mai Fafo. Tulai mai lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER (Minisita o Punaoa Faalenatura ma le Siosiomaga): Lau Afioga i le Fofoga Fetalai, na ona ou piiama e faatulou ma faatalofa pei ona faaleo e sui usufono mamalu o le Maota, aua sa ma faiga o Samoa i ona tulaga faalemalo, tulaga faakerisiano, faaleaganuu.

E faatulou foi ma faatalofa faapitoa i le usugafono a le Palemene nei i le afio o lau Afioga i le Fofoga Fetalai, afio lau Afioga i le Tamaitai Palemia ma le Kapeneta, Sui Taitai o le Itu Agai ma sui usufono mamalu o le Palemene faapea Ofisa Sili o Pulega o Matagaluega ma Faalapotopotoga Tumaoti a Samoa. Talofa, talofa lava.

Lau Afioga i le Fofoga Fetalai, o lea ua maalo le iuofe a le tautai o le mafua taulafo i matavao eseese, sa lauiliu e sui o le Palemene aua le taulafo a le atunuu, malo le tofa, malo uta. Ae o le laolao ua maua lau Afioga i le Fofoga Fetalai, o le a taumafai e tali atu ina ia ulutonu le lafo e tusa o finagalo sa faalia e sui usufono mamalu.

Muamua lau Afioga, e le i paia i se lauga a sui usufono mamalu le vaegatupe o lo o fatalosagaina e lenei Matagaluega mo galuega a le Ofisa o le Minisita. Ou te talitonu la, o lo o ua outou talia lenei talosaga.

O fautuaga, manaoga ma fesili na puai mai e sui usufono o le Maota, o le a ou otooto atu i lona aotelega. Lau Afioga i le Fofoga Fetalai, o le a ou amata

mai i le vaega o eleele. E tele nisi o sui usufono na faaalua finagalo, e pei o Falealili 2, Aleipata Itupa i Lalo, Safata 1 ma le 2, Sagaga 2, Faleata 1, Aana Alofi 2, ma isi lava sa afea i a latou saunoaga vaega o eleele.

Lau Afioga i le Fofoga Fetalai, o le aotelega o talosaga ma manaoga, o le fia maua lea o ni eleele mo afioaga ma alaafaga ona ua tele ina tuamaota afioaga i fanua o lo o i lalo o le Malo.

Lau Afioga i le Fofoga Fetalai, o le taotoga o lo o i ai nei eleele o Samoa, e 81% o lo o i lalo pea o eleele faaleaganuu, e tusa e 1.5% o ia eleele o lo o lisiina atu aua atinae i vaega eseese. E 15% lau Afioga i le Fofoga Fetalai eleele o lo o i lalo o le Malo, pe tusa lea ma le 103,000 eka, e aofia ai le 21,000 eka o lo o i lalo o le SLC. E 6,598 eka o lo o i lalo o le Esetete Tausi, ma le 75,000 eka o lo o i lalo o le Matagaluega a le vaega o eleele i lalo o le Matagaluega a le Punaoa ma le Siosiomaga. Lau Afioga i le Fofoga Fetalai, o lo o faatumauina pea le puleaina o eleele faaleaganuu i afioaga ma alaafaga faapea aiga, ma o lo o taoto i lalo o le Faamasinoga o Fanua ma Suafa. Pau lava le vaega lau Afioga i le Fofoga Fetalai o lo o vaai e le Matagaluega, o le resitalaina lea o fanua pe a maea ona faia faaiuga a le Faamasinoga faapea foi fanua a le Malo ma fanua umia saoloto.

Lau Afioga i le Fofoga Fetalai, e fitoitonu se vaivaiga i eleele o lo o i lalo o le Malo, ona o le vaega tonu lea sa tele i ai finagalo faaalua o sui usufono mamalu o le Maota. A o le i oo i se tali atu foi e tusa ai o finagalo faaalua o sui usufono o le tatou Maota lau Afioga i le Fofoga Fetalai, e ao ona faatepa ma fai foi se tala i le afua mai ona aveese atu eleele o Samoa, eleele faaleaganuu ona umia ma maua ai eleele a le Malo.

Lau Afioga i le Fofoga Fetalai, i le omai o papalagi ma i latou mai fafo, o lea na amata ai ona... ma kamupani i le vaitaimi o le 1830, 1840 faasolo mai ai, lea sa faia ai ma i latou o kamupani, aemaise foi o nisi o aumai mai o Malo mai fafo sa latou faatauina ai fanua. O nisi na lisiina fanua, o lea na alu ese ai le tele o fanua lea e i ai nei. Peitai lau Afioga i le vaitau o le 1890 na amatalia ma faatinoina ai land goods po o faamasinoga ia o le iloiloina o fanua, lea e i ai le tele o fanua ua faamaoti mai i totonu o eleele o le Malo. O le tele o nei eleele lau Afioga, o vaega eleele aupito i lelei lea o Samoa. A silasila i ai o le tele o fanua o lo o i ai nei i lalo o le Malo po o fanua sa atinae e latou sa omai i lea vaitau, o eleele lafulemu, o eleele e lelei le palapala, o le tele foi lea o tuamaota o afioaga ma alaafaga. O se faataitaiga e amata atu i le fale Vaimauga i tuamaota seia paia Falelatai, o le tele o lo o i ai nei o lo o faapea ona atiaaina nei eleele.

Lau Afioga i le Fofoga Fetalai, i le tulai mai o le Malo o Niu Sila i le 1918 i le 1914, o lea na faasee ai nisi o vaega eleele nei sa i lalo o Siamani ma vaai e le Malo o Niu Sila. I le tulai mai o le tatou Malo i le tausaga e 1962 i le tutoatasi lau Afioga i le Fofoga Fetalai, o lea na faamatuu mai ai le tele o eleele sa i lalo o Niu Sila po o le RSE, le reparation estate, ma faatuina ai le Esetete Tausi. O nisi o vaega tele o nei eleele sa tuuina atu i lalo o le tatou

Malo. O eleele la nei lau Afioga o lo o i ai nei i lalo o le Esetete Tausi ma lalo o le tatou vaega a le land board. I le tulai mai foi lau Afioga i le Fofoga Fetalai o nisi foi o aafiaga o le Esetete Tausi i le vaitau po o le 1980, o lea na oo mai i le 1990 ma faatuina ai le kamupani a le SLC, nisi o eleele ona o aitalafu a le Esetete Tausi. Lea na faatuina ai le kamupani a le SLC, faamatuu atu i ai nisi o eleele ma le naunautaiga foi ina ia mafai ona faatau atu ona o le manaoga o le tatou atunuu i lea vaitau, ua manaomia eleele.

Lau Afioga i le Fofoga Fetalai, o le tulaga lea o lo o taoto ai nei o tatou eleele, o se vaega o eleele o lo o i lalo o le Matagaluega o le Punaoa ma le Siosiomaga. O nisi o vaega eleele o lo o i lalo o le Pulega a le SLC, ma nisi o vaega eleele o lo o i lalo o le tatou vaega o le Esetete Tausi.

Lau Afioga i le Fofoga Fetalai, e oo atu i le Matagaluega ua silia ma le 400 talosaga a tagata taitoatasi a lo tatou atunuu, e le gata i lea o afioaga ma alalafaga, talosagaina le fia maua o ni fanua, e faatoa ma nofoia ma faia ai atinae. I le taimi nei ua tapena e le Matagaluega ma o matou galulue faatasi ina ia mafai ona tali atu i nei manaoga, ma ia faatulaga foi aua se leleiga mo le tatou atunuu.

O le silasila a le Afioga i le Tamaitai Palemia ma le Kapeneta lau Afioga i le Fofoga Fetalai, e toe faatulaga auunaga o lo o feagai ma faamatuu atu ai eleele mo atinae, aemaise o nofoaga mo i latou e manaomia. Lau Afioga i le Fofoga Fetalai, o se tasi o anavatau a le Vaega Faaupufai a le Faatuatua i le Atua Samoa ua Tasi a o tapenaina le faiga palota, o le faatino lea o auala e mafai ai ona toe faamatuu atu nisi o eleele e le o faaogaina mo afioaga ma alalafaga. O lo o ua amata nei lea galuega, ma o le a galulue faatasi ai le Matagaluega o Eleele, Punaoa ma le Siosiomaga ma le Vaega a le SLC ma le Esetete Tausi, o le faamoemoega ina ia mafai ona faatino lea vaega.

Lau Afioga i le Fofoga Fetalai, ua faatalatalanoaina foi nei le toe teuteuina ma le silasila a le Matagaluega i le Tulafono o le LTRA ma ua amata atu i le Komiti o le GLAC ona faatalatalanoaina ma silasila i vaega e ao ona toe iloilo ma teuteuina ai lea Tulafono.

Lau Afioga i le Fofoga Fealai, ona ou see mai lea i le vaega lea o le fesuiaiga o le tau. E matauina ua lava tapena ma ua lava malamalama foi le tatou Maota nei i le aafiaga o le fesuiaiga o le tau, e le gata o afa, o lologa, o le fesuiaiga o le aafiaga o le tafia eseese o eleele, aemaise vaega tu matafaga. Ua faailoa foi e le Malo e ala i ana...

Tofa Lealailepule Rimoni Aiafi: Lau Afioga i le Fofoga Fetalai...

FOFOGA FETALAI: Ia se i fai se malologa a lau Afioga i le Minisita, ia se i tulai mai lau Afioga i le sui usufono mamalu mai Faleata 3.

Tofa Lealailepule Rimoni Aiafi: E momoli atu lava le faafetai tele i lau Afioga i le Fofoga Fetalai mo le avanoa. Muamua, e avatu lau faamalo ma

lau faafetai i lau Afioga i le Minisita. Malo lava faafetai. Faafetai i lou tulai mai, ia manuia lou tofi. Na pau lava o lea, ona o lea ua e see ese ma fanua, ia faafetai tele. Atonu o le a taatia ia i i lea mataupu tatou te le toe talanoa pe toe oo i ai. Ae faafetai o lea ua faamalamalama e lau Afioga le tulaga. Faafetai lava o lea ua aumai manino le tulaga o fanua faaleaganuu, fanua o le Malo, fanua lisiina atu ia ma tulaga uma i le talafaasolopito mai o fanua. Faafetai lava o lea ua nofo manino ia tulaga, atonu o le mea lea sa naunau i ai ae faafetai o lea ua taatia. E momoli atu le faafetai o lea foi ua maua ai le malamalamaga o tatou uma.

Pau lava lea o le mea lea lau Afioga ona o le vaega mulimuli o lau saunoaga, lea e faapea mai ai, e moni a au i le tou manifesto foi lea po o le tou fuafuaga lea ina ia toe faafoi fanua e le o faaaogaina i nuu ma afioaga. Ia, e pei o le vaega lea pe mafai ona faalautele i ai le saunoaga a lau Afioga, e faapefea la nuu ia pei o matou ua leai ma ni fanua ua avatu lava ma avatu ai. Aua o lona e te silafia si o matou nuu i Vaitele ua leai lava ma se mea o i ai, ia, pe faapefea ona fai, pe mafai ona toe fao mai, pe mafai ona toe faafoi mai.

E le gata i lea, faafetai tele lava i lau Afioga i le aveeseina o le mea lea sa fai i le flea maketi. Faafetai tele lava i lea vaega, e le o se mea matagofie mo i tatou le tulaga lea na i ai, faafetai ua aveese. Ae o le tulaga lona o lea e fia fesili ai i lau Afioga, ia atonu e manaia foi i le vaavaai mamao i ai, a o lona faigata lona, i le faiga e faatino ai. E faigofie finagalo ma manaia i le faalogologo ma faaoso ai i luga lagona, a o le faatinoga la o le mea faigata pe a fua ina ia tutusa uma nai nuu ma itumalo o aafia i tulaga ia. Ma le faaloalo lava. Faafetai.

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Ia se i tulai mai le Afioga i le Minisita o Faatoaga.

Susuga Hon Laauli Leuatea Polataivao Fosi: O si mataupu lava laititi lava o mea e fia faamalamalama ona o le tausisia lava o tatou Tulafono Tumau, ona o le sui usufono lea o Faleata 3, e le i lauga. E faafetai lava i le tofa i lau Afioga i lou loto faamagalalo mai i le taeao o lea ou te vaai lava o lea e te loto faamagalalo lava ua afiafi lava o fai lau faamagaloga. Ia, e pei na ona ou faamanatu atu.

FOFOGA FETALAI: Faafetai, o lea ua maua le agaga o lau Afioga i le Minisita. Ia onosai mai lau Afioga i le sui usufono mamalu, o lea na muamua mai le sui usufono lea o Vaimauga 1 ona sosoo atu lea ma le sui usufono mamalu.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, e momoli le agaga faafetai i le tulai mai o le Minisita. E le o po foi se lilo i lenei foi tamalii ua leva foi ona galue i totonu o le Matagaluega. Na pau lava lou fiafiaga ona o lo o tuufesili pea le atunuu, e le gata i Samoa nei a o atunuu i fafo, aemaise foi o matou aiga e vilivili mai i fanua lava faaleaganuu po o lea ua nofoai lava pei ona saunoa ai foi nisi o sui usufono. Ae faafetai lava o lea ua saunoa manino lau Afioga i le Minisita, o lea lava e malupuipua o tatou fanua faaleaganuu, e 81%. O le agaga faafetai lena o lou sui usufono. O lea ua manino lava i totonu ole Maota lenei aua e toatele foi nisi na o talai, o fea fanua ia ua ave e Saina, e pei e faapena se lagona. Ae faafetai i lau Afioga i le Minisita i le talatalapipi mai o tulaga na aumai ai o tatou fanua ma oo mai i o tatou vaitaimi, e pei o le mea foi lena o lea e inaina ai lava lenei sui usufono o Vaimauga i o matou eleele.

O lona lua o faafesili i lau Afioga, o lea e taua o le kamupani o le SLC. O ai lena e shareholders i lena kamupani? O lea e fou i lau faalogo o lea e fai mai na uma loa tuu atu loa i le kamupani. Mataulia a tau loa le kamupani e i ai tagata e i ai shares i totonu? O lona uiga lena o lou malamalama, faapea ita ia o le SLC o le Corporation a lo tatou Malo, a o lea e fai mai o le kamupani. Pei e fou foi i lau faalogo le tulaga lea pe mafai ona e faamanino, leaga o totonu o le Maota lenei o lea e faamaumau a tatou faamaumau. E alu aso sau aso, ae i ai foi le tuuaiga sa i ai i le isi vaitaimi, fai mai o le SLC o le kamupani a... ia e le o po se lilo, tuuaiina ai foi nai isi tamalii, sa i ai le Palemia fai mai o le kamupani a Tuilaepa ma nisi. Ae pe mafai ona e toe faasao lea lafoga poo se mea o se Faalapotopotoga a le Malo po o se kamupani a nisi pei ona tau fai atu ai faamolemole. Faafetai i lau Afioga i le Fofoga Fetalai.

FOFOGA FETALAI: Faafetai, o lea ua maua le finagalo o le sui usufono. Ia se i tulai mai lava le Afioga i le Minisita e lagolago mai i le pitolaau a le Malo.

Tofa Hon Leatinuu Wayne Soialo: O le a ou fesoasoani atu leaga o lea ua lavea mai le kamupani a le SLC i le lauga foi a le sui usufono. Ia mo le silafia, o le kamupani tumaoti lena a lo tatou Malo, lea e faaigoa ai le tele o kamupani tumaoti a lo tatou Malo po o lalo o le SOE. Lea la e i ai le kamupani lea a le SLC o lo o resitala ai i lalo o e sa i ai i lena vaitaimi, e tai pei o le Afioga i le Palemia, e pei foi o le Afioga i le Minisita sa i ai i lena vaitaimi, Faumuina Liuga, ia faasolo mai lava lea, afio mai le Afioga ia Lautafi e le i suia, ia lea foi ua ou sau au, o lea foi e le i suia. Ae masalo pei uma lava ua tataua ona sui, ua tataua ona aumai ia au le tatou kamupani. Ia ma le faaaloalo lava faafetai.

FOFOGA FETALAI: Ia, o lea ua manino lea tulaga. Se i tulai mai lava lau Afioga i le sui usufono mo Faleata 1.

Tofa Manuleleua Paletasala T. Tovale (Faleata 1): Faafetai lava i lau Afioga mo le avanoa. Faafetai foi i le Afioga i le Minisita ua tau lamalama faaii lana saunoaga i lenei afiafi a o lea ua oo atu i le vaega tau i le tau, ae o lea e le i oo atu sana saunoaga i le tulaga pei ona ou taua i lau lauga i le la vaiaso. Ina ne i faapea le atunuu ma Samoa ai e leai se gataifale o lenei itumalo ma lenei nuu. O lo o i ai le gataifale i tai i le togatogo lea na ou taua i lau lauga lea e i ai le auala lea e oso atu i talaane o le SMI e tau i tai. Faafetai lava i le Afioga i le Palemia ma le faigamalo lenei ua tulai mai ua le taunuu le uafu lea na tuu e fai i Vaiusu. Faafetai lava ua le oo le uafu, aua o le mea tonu lava na ala ai ona mafua ona laga atu tagata ia faatau tai i le togatogo i tai, ona sa i ai le latou mafaufau ma le latou fuafuaga, o i lea o le a oso atu ai le auala e tau i tai i le uafu. Ma sa i ai le latou manatu o tulaga o mea tau pisinisi. Peitai ane la lau Afioga i le Fofoga Fetalai, o lea ua le oo le faiga o le uafu. Ou te le iloa foi po o le a la le mea a tagata lea ua latou faatauina le vaega lea o le a fai i ai. Pe oo lava ona o e fai ni latou pisinisi, a o lea ua le oo le mea na mafua ai.

O le mea la lea e tatalo atu ai i lau Afioga i le Minisita ma le Malo, ona o i tonu lava i le vaega lea lea sa tua i ai lenei nuu ma lenei itumalo i figota. O le mea la lea e tatalo atu ai i lau Afioga i le Minisita, ia o le Tala Autu o le Tupe i le isi 6 masina lea o le a sosoo atu, e pei lava ona ou fai atu, pe le mafai ona toe... aua o le taimi lenei ua le mafai ona toe maluelue tagata ia ua latou faatauina eleele ia. E pau lava le avanoa o lea e maua ai, o le Malo e mafai ona ia toe faatau maia eleele ia mai tagata ia ona taatia lea o le togatogo. Aua o le mea moni lava sa ou faalogo lava i le la vaitau o tulai mai le Malo ma le Palemia foi le Afioga ia Tuilaepa, sa tele lava ina saunoa faapea, o le mea lava e oo i ai le sami ma le vai, o le mea na e pule ai le Malo ae pei o le matou vaavaai lena, e oo lava i le togatogo, o le sami, a o lea ua tanu e tagata. E pei o le ala lea o lou tulai atu, ina ia silasila ane le Malo i le tulaga lea ma le Tulafono lea na talanoa ai le Malo ua tuanai atu.

O le mea la lea i lau Afioga, a faapea e i ai se finagalo o le Malo e lava se seleni e toe faatau mai ai eleele ia mai tagata ia, ona mafai lea ona faaavanoa lena vaega o le togatogo o totoe mo si o matou itumalo ma si o matou nuu. Ae a leai foi, ia a o i ai ni eleele, o lea e faalogologo atu o lea e tele eleele a le Malo lea e i ai, pe le mafai ona toe fesui ai ma tagata ia ua faatauina eleele ia, ina ia faamalieina ai latou, ae taatia pea le togatogo lea ma le vaega lea o loo tua i ai le itumalo ma le nuu.

Ia, o se faamatalaga lea ma se talosaga i lau Afioga i le Minisita, faafetai tele i lau Afioga i le Fofoga Fetalai mo le avanoa.

FOFOGA FETALAI: Ia, mo le faasaoina o lou taimi lau Afioga i le Minisita se i tulai mai le sui usufono mamalu mai Aleipata Itupa i Luga.

Afioga Fuaava Suluimalo Amataga: Faafetai i lau afioga i le Fofoga Fetalai mo le avanoa. Ia e i ai foi ia le agaga faafetai tele i le afioga i le Minisita ona o lea ua tali nisi o fesili sa laga e lou nei sui usufono aemaise foi o lou uso a sui usufono mai Aleipata Itupa i Lalo lea na taua ai le toe 35% fanua o lo o totoe ma le 46% pe o fea o i ai.

Ia ae faafetai o lea ua saunoa manino faafofoga lo tatou atunuu aemaise lava latou o papaaao i atunuu i fafo ona o lea lava e tau aumai le feau lea, ua leai le tele o tatou fanua faaleaganuu. O lea ua mautinoa o lea e tumau ia le tatou 81%. Ia o atugaluga ia sa i ai ia aemaise foi sa ou taua lava ia le afioga i le Palemia sa o matou galulue ai, e faaeteete i le tulaga lea i i ai ni tulaga e tuumauualaloina ai le galuega sa faapea ona gapatia ai, ia ma le afioga foi i le Tamaitai Palemia a o matou galulue ai i lea matata.

Ae faafetai o lea ua aumai manino ia faiga faavae a le tatou Malo, i le tulaga lea o le 15% lea o fanua lea e i lalo o le Malo public lands o lea faapea o le a fai se faiga faavae foi lea ia e faamatuu i nisi o afioaga. E pei o lea ua avatu finagalo o nisi foi o sui usufono ia ona e tai pei o Vaitele le faiga foi lea ona o lea ua faatau motu ia le tele o fanua nei, o le foi sa aunoa nisi o faipule foi nei, i Falealili. O sau tuualalo faamolemole, ia i le faiga faavae lea ua tapena i ai ia le tatou Malo, ia e manaia foi le silasila i le faavaa lea e i ai ia eleele o Falealili. E manatua Falealili e sau mai lava i Togitogiga ia e tau mai i i tuaoi ma Lotofaga. O eleele uma ia o lea e i lalo o le Matagaluega o Siosiomaga.

Ae o le faiga lea i le maliliega ao i lalo o Niu Sila i le 1933, e mafai ona faaaoga eleele ia mo le itumalo o Falealili lava ia. O lea na ala ai ona faatu i le maliliega lea, le Komiti o Eleele o Falealili. Masalo o la e silafia e le sui usufono o Falealili 1 ma Falealili 2 la e i ai tupa o tupu ma ee o le itumalo o la e i totonu o le Komiti lea.

Ae o le tulaga e pei e agai se faamatalaga, e tatou faaaoga le faavaa lea e pei e trial ai se tulaga i le tatou agai atu i isi foi alalafaga o lo o i ai eleele o le Malo. O le aiaiga lea e mautu i le feagaiga lea, e na o le Falealili e mafai ona faamatuu atu ai eleele foi ia tulaga tau lisi ma tulaga uma faapena. Ae o le faigata o le mea na ala ai ona to'a mai i se maliega autasi, ona e toatele ua faitio, ua toatele foi ia... aemaise latou o faauluulu ai ia afioaga, e pei ua ave uma e latou eleele, ia ao le lautele, aua i lalo o le agreement lea ma Niu Sila 1933, o soo se taulealea, se matai, e i ai lona entitlement i eleele nei mo se lease. Ia o atugaluga na sa i ai i le taimi lena i le Komiti, ua pei ua o uma foi i tama matutua eleele ae ua leai ni mea e toa i ai le toatele o le itumalo.

E pei o se tulaga lea e fai ma faavaa ia e silasila ma tapena i ai le faiga faavae lea ua tapena i ai ia le tatou Malo ma le agaga faaaloalo faafetai.

Afioga Niuava Eti L. Malolo (Vaisigano 1): Lau afioga i le Fofoga Fetalai pe maua se avanoa.

FOFOGA FETALAI: Ia se i tulai mai lau afioga i le sui usufono mamalu o Vaisigano Nu.1.

Afioga Niuava Eti L. Malolo: Ia faafetai ia ou manatua lava ia le autu o lenei aso i le Tusi Faitau Aso i le Ekalesia a le EFKS fai mai aua ne i galo. Aua ne i galo ae matau atu tailo te i ua sese lau faalogo atu i le lisi a le afioga i le Minisita o la e galo Vaisigano Nu.1. O le ala la lea o le faamanatu atu aua ne i galo Vaisigano Nu.1.

O le... e auau lava lou lagona i le tiute foi o lo o feagai ma le afioga i le Minisita, ona o le tagata ma lona faasinomaga. O le fanua ma lona tapuafanua. O le ala lea o le naunau o le agaga foi lea e tauanau i fanua nei ona e ese lava ia le itumalo lenei. O le itumalo lenei e lumamaota i fanua nei o le tatou Malo, tuamaota i fanua o le tatou Malo, e autafa maota i fanua o le Malo, i le isi pito, o fanua foi o le tatou Malo.

O le ala lea e apaapa ma tautaualemau i le afioga i le Minisita o le tagi lena a lenei itumalo. E alu atu lava i le gataifale e tau i le tuaoi o Auala ma Asau, atumauga ona tifa loa lea e tau i atumauga ona tifa loa lea o le alu i lalo. O eleele ia lea sa i lalo o le WESTEC.

A silasila foi lau afioga i le Fofoga Fetalai i le mea sa i ai le portledge i le ili laupapa sa tautua ai le atunuu i le fia o tausaga e le i i ai lava se mea na gase i le tautua ma le vaavaaai a lenei itumalo aemaise o si ou nuu ma le afioaga lea i Asau. O le ala lea e lagona ai... e oo foi i le mea sa i ai tane tetele a le Mobil i le mea sa i ai le falepuipui i le pito i tai o le mea e i ai le uafu.

Ua taatia uma fanua nei i lalo oi ua ave uma i le mea o taatia ai fanua nei i lalo o le tatou Malo. O le ala lea o le tauanau pea a lenei itumalo. Leaga ua tupu le nuu, ae ia toe faafoi mai nai fanua, pe 300 ni eka e amata ai, ia ma tatou tautua atu ai i le tatou faigamalo e toto le niu, toto le ulu, toto le tamato, ia ma ni nai apu e toto ai, e tautua ai, ma le mafai ai ona toe o ia tatou fanua ia ma le tele o... o le ala lea o le apaapa atu lau afioga i le Fofoga Fetalai. Manuia lau afioga i le Minisita, manuia lau afioga i le Fofoga Fetalai, faafetai.

FOFOGA FETALAI: Ia malo i lau afioga i le sui usufono o Vaisigano Nu.1. Ia saunoa mai ia le sui usufono o Aana Alofi Nu.2.

Afioga Aiono Tile Gafa: Faafetai atu i lau afioga i le Fofoga Fetalai ia mo le fia faasaoina lava o le taimi o le afioga i le Minisita e tusa ma tulaga lava ia o fanua. E talitonu le taofi, sa maea le saunoaga a le afioga i le Minisita o

SLC i le taimi ua sola, ae o lea ua saunoa lau afioga i le Minisita o Eleele ou te iloa o le laina tutusa lava lea.

E na o le fia faaleo o le agaga faafetai o lenei itumalo. O la ua maea ona fuaina fanua, tuamaota o lenei nuu ioe, malo faafetai. O la ua amata ona tau alu le galuega aua le galueaina ma faatoa fanua ia. E tai 2 eka, ua uma foi ona uia tulaga e pei ona lesitala ma amata ona totogi lisi. O la foi ua lau afioga i le Fofoga Fetalai, ua maea foi ona ui ai auala i totonu o taloto i totonu o fanua. Ae o le Talosaga, ona o lea ua agai auala nei i totonu, ae e i ai lava ia le auala lea e agai atu i luma, ao vaega uma lava ia o fanua ia. Ian a o le Talosaga e taoto atu.

O lea foi e i ai ia le faamoemoe i isi fanua lea e i uta pe 200 eka, lea e faapea e fuafua a uma le vaega lea, ia ona fua foi lea i nisi o le matou itumalo e le i oo i ai ia lea faamanuiaga. Ia ae e pei o le agaga lena e tulai atu ma le faaaloalo lau afioga i le Fofoga Fetalai, e momoli atu le agaga o le faafetai i le tulaga lea, aemaise o galuega maeaea e pei ua mea ona faatinoina ma le agaga maualalo, malo faafetai.

FOFOGA FETALAI: Ia tulai mai ia lau afioga i le Minisita ia ma faauma mai loa lau saunoaga.

Afioga Hon TOEOLESULUSULU CEDRIC POSE SALESA SCHUSTER: Faafetai lau afioga i le Fofoga Fetalai mo le avanoa. E avatu le faafetai i sui usufono ua faaalua. E pei o le vaega lea na ala ai ona ou taumafai atu i se faamatalaga o le aotelega, o lea ua i ai uma ia vaega e le gata o Talosaga o afioaga ma alalafaga ae o itumalo foi. O lea foi la ua faavasega aua a tatou talatalapipi vaega eseese uma o eleele o afioaga, ia o le faigata lea i totonu o le tatou Maota.

Ae lau afioga i le Fofoga Fetalai e na ona ou faapai malu atu ia afioga foi i sui usufono mamalu, ia o lea ua maua ma e pei ona avatu i se agaga maualalo lau afioga i le Fofoga Fetalai, o lea foi ua faaali e le uso i le sui o Faleata Nu.3. o le tapenaga o lo o fuafuaina nei, o fanua ina ia mafai ona maua nei ia ogatasi e le gata i fanua o i lalo o le Malo, ia ae ao foi ona silasila i nisi o fanua i se auala e maua ai se toa i lo tatou atunuu.

Ae e le o mafai ona maua ia le iuga i le taimi nei, ae o le galuega lea o le a galulue ai ia le Kapeneta ia ma le tatou Malo, ina ia maua se toa lau afioga. Ae faamalie atu i sui usufono uma o lea ua faamau uma ia vaega eleele, ia aemaise foi o lo o silafia e le tatou Matagaluega, vaega tonu i le tele o afioaga e pei ona saunoa le sui usufono o Vaisigano Nu.1, ia o le tele lava o afioaga foi lea ua lumafale i le sami, ae tuamaota i fanua o lo o lalo o le tatou Malo, ao faapea ona faatupulaia pea ia le faitau aofai o afioaga ma alalafaga.

Lau afioga i le Fofoga Fetalai ona ou see mai lea i le vaega lea o le fesuaiga o le tau.

Lau afioga i le Fofoga Fetalai, ua nofo malamalama ia lo tatou atunuu i aafiaga o le fesuiaiga o le tau, tetele timuga, sau afa, afaina ia vaitafe. Tele lologa, ua tafia eleele, aemaise lava i vaega tu matafaga. Ua maea foi ona faatamiloina ma faataatia ma feutagai le Malo ma afioaga taitasi uma i le tausaga e 2005 ia ma le tausaga 2016. Sa faataamilo ai polokalame a le Malo i le faatauaina lea i le silafia o afioaga ma alalafaga o aafiaga o le a oo i ai ia o latou afioaga ma alalafaga i fesuiaiga alualu i luma o le tau.

Ua faatulaga mai ai foi nei fuafuaga po o Community Intergrated Management Plan po o le CIM Plan i le faapuupuu. Ua lausilafia uma ai e afioaga ma nuu taitasi, vaega e ao ona silasila i ai, e fuafua i ai mo le alualu i luma. O nei foi fuafuaga alualumamao lau afioga i le Fofoga Fetalai, o lo o faataoto mai ai vaega o afioaga ma alalafaga taitasi e talafeauga le fai ai o taligalu. O vaega e talafeauga le fai ai o talivai. O faasino mai ai foi vaega o afioaga ma alalafaga, e ao ona relocate po o le amata ona vaavaai mamao, i le siitia i nofoaga saogalemu.

O le naunautaiga lau afioga ona e tatou te... e tou te saunoa ma talanoa i fesuiaiga o le tau, ae a oo loa ina faatino, lau afioga e mumusu tatou e fai le mea sao. Ae o le fuafuaga lea o lo o tapenapena i ai, ina ia mafai pea ona oo i lo tatou atunuu, pe fau se fausaga e tali ai le manao i le taimi lenei, ae o le isi 5 tausaga o le isi afa, o le isi lologa, o le isi tsunami, e aafia ai vaega ia.

O lea la lau afioga i le Fofoga Fetalai e faapuupuu ai se faamatalaga, o lea ua faaoo mai finagalo foi i seawalls, ia o talivai i nisi o afioaga. O la e pei ona maua foi i le saunoaga a se tasi o sui usufono, ia o lea sa i ai ia climate funds foi. Ia e moni o tausaga sa i ai ia e tele lava ia climate change funds sa mafai ona faatino ai nisi o taligalu i le maea ai o suesuega, ia e i ai ia le LDC Funds, o le adaptation fund. Ia e i ai foi ia polokalme o lo o faatino ai nei ia taligalu ma talivai i Vaisigano e ala lea i le EWAC ia ma le TCF.

Lau afioga i le Fofoga Fetalai mo le tala atu i afioaga o lo o i ai poloketi e faatupe ai ia vaega, e le o i ai se seleni e faataoto a lo tatou Malo i le taimi nei. Ae o le fuafuaga ua i ai le Matagaluega, o le a ou toe asia ia tatou CIM Plans ma toe asia ia afioaga o lo o aumai Talosaga, ina ia toe fuafua ma faatulaga se polokalame e sailia ai ni seleni, ia pe o le vaai foi i le mafai e faatupeina mai i totonu o le tatou budget. Ae mo le taimi nei o lo o tapena ai le Matagaluega ma ia faataoto lea fuafuaga mo le alualu i luma ia mafai ona faatino. Ia ae avatu ai pea le tuualalo i le tatou Maota nei, e ao lava ona seu silasila i aafiaga o le fesuiaiga o le tau ona e i ai lava aafiaga e uma foi ona fau, ia toe aafia.

Lau afioga i le Fofoga Fetalai, ona ou see mai lea i vaega o le puipuiga o le siosiomaga e pei ona taua mai e le sui usufono o Faleata. Ia o lo o i ai foi polokalame e taua ia le puipuia ma le vaaia lelei o tatou siosiomaga aua a mafaia ona o tatou puipuia ma faaoga lelei, ia o le tatou siosiomaga lenei, e toe fanau mai ai ia atinae e faatino ai ia lo tatou manaoga ma le ola soifua o le tatou atunuu.

O se faataitaiga lau afioga i le Fofoga Fetalai, ia o le tele o le tatou naunau e atinae ia lo tatou atunuu, ua soona ta ai ia vaega atumauga apovai. Ia o le afaina o lea vaega, o lea ua silafia e lo tatou atunuu, ia ua tele o le sau lava o le tamai timuga lologa, sau ia le tamai timuga lologa. E ao foi la ona tapenapena i ai le Matagaluega ia ma faailoa pea i lo tatou atunuu e ao ona o tatou galulue faatasi, ia aua e fai e le isi ia le papovi i luga o le vaega apovai, e le afaina ia, ae o le tagata o lo o nofo i le vaitafe pe o le vaega tumatafaga, ia o latou ia o le a faapea ona tele le afaina, mai nei atinae.

Ma o le naunautaiga o le Matagaluega lau afioga i le Fofoga Fetalai, ina ia mafai ona fefaasoai ma galulue ina ia puipui ma faaleleia, ia mafai ona atinae ia lo tatou atunuu aua se lumanai manuia, a ia faia ai se auala ia gafataulimaina aua alo ma fanau i le lumanai.

O lo o i ai fuafuaga ma tapenapenaga foi i le faasaoina o vaega eleele vailaloa e aofia ai togatogo. Ia ma nisi o vaega lau afioga i le Fofoga Fetalai, o lo o faatinoina foi iinei le polokalame o le toe totoina lea o le vaomatua ua tapena e le Matagaluega o afioaga ma alalafaga aemaise o itumalo e taua foi ia latou o le a faapea ona galulue ina ia toe mafai ona toe toto.

Lau afioga i le Fofoga Fetalai, o le taua foi o lea faanaunautaiga e pei ona silafia foi e nisi o le tatou Maota fono nei, ia ua i ai foi fesoasoani i vaega ia e tau o Govern Credits. Ia a mafai ona faasao le vaomatua ma toe toto le vaomatua o se afioaga pe o se atunuu, ia e i ai foi ia le taofia po o le faasaoina o ia vaomatua, e mafai foi ona maua ai ia ituaiga seleni po o fesoasoani e atinae ai ia afioaga ma alalafaga o atunuu taitasi.

Ia ona see mai lea lau afioga i le Fofoga Fetalai i le vaega sa faapea ona fesiligia e nisi o sui usufono i le aafiaga o manu ma laau faalafua. Ia o lo o tapenaina nei ia se tasi o poloketi a le Matagaluega, e faatatau lea i le faaitiitia o nei meaola pe o invasive species i totonu o le atunuu. Ma e talitonu o le a silasila foi ia ma tuu ai ma aafiaga ia ua matauina, o puua aivao o manu ninii, ia o faapasi, o nisi lava o laau ma meaola o lo o faapea ona aafia ai e le gata i le soifua manuia o le atunuu, ae o le atinae e faapea ona faatino. Ma e o le galulue soosootauau ai i le Pesticides Board ia le Matagaluega o Siosiomaga ma le Matagaluega o Faatoaga.

Lau afioga i le Fofoga Fetalai ia ona ou see mai lea i le vaega lea e pei ona faaalua foi i nisi o faalavelave foi. O lo o galulue foi ia le vaega lea a le Disaster Advisory Committee ia ma le Emergency ma le Management Act ina ia toe poipoi ma toe tapena ina ia mafai ona tali atu i se auala vave ma se auala lelei ia aua lava ia mafatiaga e le gata o faamai ae o nisi o aafiaga o faalavelave faafuasei aafia ai ia le tatou atunuu.

Lau afioga i le Fofoga Fetalai, ia ona faaiu mai lea i si au Pulega lea o le Turisi. Ia e pei ona saunoa ia le afioga i le Tamaitai Minisita o Tupe, ia lea...

FOFOGA FETALAI: Ia mo le faasaoina o le taimi a lau afioga i le Minisita, ia tuu atu le avanoa i le afioga i le sui usufono o Sagaga Nu.2.

Susuga Maulolo Tavita Amosa: Faafetai lava mo le avanoa, ia e puupuu lava si au fesili i lau afioga. Manaia ma matagofie le manino o lau folasaga. Ne i mea ua le toe maua se isi avanoa lau afioga i le Minisita. O le a ou le toe oo atu i tuamaota o le afioaga lea o Malie o lena ua e saunoa o lena ua faamau i lau lisi. O lea foi ua uma ona ou faaleo i le Minisita o SLC.

Ae pau le mea lea ou te fia fesili atu ai, po o faamau ane la ia le matou itumalo i le puipuiga o le matou gataifale aemaise lava ua aafia i le mea o le siisii o le sami, ia ua malemo atu ai ma le togatogo, ua amata ona musu le pasi lea e taamilo i le pito i tai o Afega. O Afega ma Malie ua matua afaina lava i le tulaga o le siisii o le suasami ia ma suiga o le tau. Na pau lava na ne i mea ua faamau na o eleele i uta i le vao, ae e le faamau ane ia lou itumalo i tai i le sami faamolemole ua afaina tele.

Ia ma le faaaloalo lava.

FOFOGA FETALAI: Ia faafetai, ia o le mea sili lea ua manatua e le sui usufono mamalu ia lo latou gataifale, ia faamau ane lau afioga i le Minisita,

Afioga Hon Lautafi Fio Selafi Purcell: Lau afioga i le Fofoga Fetalai...

FOFOGA FETALAI: Ia se i tulai mai ia le sui usufono mai Satupaitea...

Afioga Hon Lautafi Fio Selafi Purcell: Leaga o lea sa ou Talosaga i le afioga i le Minisita fia maua se malamalamaaga i tupe ia sa fai ai ia taligalu ia e aafia i le siisii o le tai. O lea e pei ua leai se tupe ae sa i ai tupe. Sa i i i le Matagaluega lea o Siosiomaga. O latou la ia e faia taligalu i mea o nuu foi ia e pei o lea na tau papai i ai le saunoaga a le Minisita. Pe sa fai se lisi foi lea ina ua uma le tsunami i ai latou e priority.

Ia ua le iloa la pe o fea ua fai i ai lena lisi? Aua o le mea lea ua tulai mai, pei o lea na ou fai atu na ou sau loa i totonu o le Palemene ave loa lau tusi Talosaga ina ia tagai i i... ia ae fai mai, e le o aafia ia aseta a le Malo i le siisii o lou itumalo. E na o fale e le aoga i aiga na e i tua, ia o lalo la i le fund lea, le Climate Change Fund.

Na ou alu ou talanoa i le Tamaitai Palemia i le taimi lea sa i ai, pe o fea o i ai lena fund? Ae o le saunoaga ua leai se fund. O lea la ou te faalogologo atu i le afioga i le Minisita, pe o... lea o le a toe silasila i te i ua o tatou nofonono lava, a la e i ai ia le world fund na aemaise lava ia tatou i le region lea i le Pasefika e aafia ma e le gata ai i inei, e toe aafia lava e tau i le faavavau i le mea nei o le siisii o le sami i luga. Ae lea ou te talanoa atu i le tamai tsunami lea na oso i le po o le Aso Faraile, ia ae taape uma ia ulo a nai ou nuu se i tulou le e tu ia latou umukuka foi lea i luga o le sami, e amata le kuka o la e i luga o le tainafi le ulo, ia ae uma ae, ia ua tataa mai ulo i le aualatele ua sau le sami aumai ave i o e alu ai lava ia lenei mea.

Ia o lau Talosaga i lau afioga i le Minisita, ia se i tagai ane pe toe i ai lava se avanoa e toe maua mai ai se tupe ia aua o lea e fai atu nei ia Olo ia faapea Olo ia o taligalu na e fai e le vaega lea. Ia ae o lea e Talosaga atu i lau afioga maua se avanoa e maua ai se taligalu mo si ou itumalo. Ia malo faafetai.

FOFOGA FETALAI: Ia faamalo atu i le sui usufono, ia o le a fai sina tatou malologa ia ona e sauni mai lea lau afioga i le Minisita e tali mai ia ma faauma mai ai ia lau Matagaluega.

Ia o le a faataatiaese galuega a le Fono Aoa, ia mo se malologa.

Na faataatiaese Taulumaga a le Fono Aoa Faitulafono mo lana malologa masani i le itula e 6:26 i le afiafi ma toe faaauau i le itula e 7:03 i le afiafi.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono. Faamalo le onosai i le tatou Maota, e le o toe tele se vaega o totoe o le tatou galuega.

A o le i toe amatalia a tatou taulumaga, e i ai si faasilasilaga taua mo le silafia e tatou Komiti Faa-Palemene. Ina ia tusa ai ma aiaiga o tatou Tulafono Tumau, o le a usuia le uluai fonotaga a Komiti Faapalemene ua taua i lalo i aso ma taimi ua faatulagaina e faapea;

1. Komiti o Tulafono Tumau, Mataupu Tau Faiga Palota, Talosaga ma Tofiga faale-Faavae, Aso Lulu, 2 o Fepuari 2022 i le itula e 10 i le taeao.
2. Komiti o le Vaega tau le Va Fealoai, Aso Lulu, 2 o Fepuari 2022 i le itula e 1 i le aoauli.
3. Komiti o le Vaega tau le Tamaoaiga, Aso Tofi, 3 o Fepuari 2022 i le itula e 10 i le taeao.
4. Komiti o le Vaega o Atinae Esee, Aso Tofi, 3 Fepuari 2022 i le itula e 1 i le aoauli.

Malo faafetai.

E faataatiaese tatou Taulumaga mo le tatou malologa, o lo o saunoa le Afioga i le Minisita o Punaoa Faalenatura ma le Siosiomaga, faatasi ai ma tapenaga o lana lisi mo manaoga o sui usufono mamalu e pei ona faatoai i ai i latou talosaga i eleele.

O le mea lea ou te tapa ma le faaaloalo lau Afioga i le Minisita mo le faaauauina o lau saunoaga.

Afioga Hon TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. E avatu foi le faafetai i lau Afioga ma le Ofisa o le Fono mo le tapenaina foi o le malu afiafi e tali ai foi le sua ma taumamafa le mamalu o le Palemene,

aemaise sui usufono mamalu o le tatou Malo o lo o faapea ona tatou faatasi ai. E avatu le agaga faafetai i lau Afioga ma le Pulega. Lau Afioga i le Fofoga Fetalai, a o le i amatalia se tali, e faafesili atu lava i lau Afioga i le tulaga o lisi lea e te taua...

FOFOGA FETALAI: Ia, o lena ua e faafofoga i talosaga ia na tuuina atu, o lena ua e saunoa o lena ua faamau i lau lisi, o le lisi lena lea e faauiga atu e le Nofoa.

Afioga Hon TOEOLESULUSULU CEDRIC POSE SALESA SCHUSTER: Ia faafetai lau Afioga. Sa faapea ai o lea ua e finagalo ou te faalau atua le lisi ae faafetai o lea ua maua le finagalo o lau Afioga, e moni ai le saunoaga, o lea ua faamaumau uma, ma o le tele foi o nisi o talosaga o lo o faamauina e le Matagaluega e faaoo atu i ai i sui usufono ae le gata foi i lea o afioaga ma alaafaga.

Lau Afioga i le Fofoga Fetalai, ona e i ai nai fesili ia na faatoai mai ae le i malolo le Fono, o le tali lava o lo o ua faamauina, ma o le a oo atu i ai le iloiloga ma le tapenaga a le Matagaluega pe a feiloai ma afioaga o lo o i ai. O le tulaga i le vaega lea pei ona saunoa i ai le sui usufono mo Satupaitea. E lelei pea le toe faailo o le tatou climate funds lava ia sa faapea ona faatino ai le tele o galuega, e particular lava ma specific afioaga sa faatino ai, ae pei ona faailo atu, o lea ua toe i ai le fuafuaga ina ia mafai ona maua se isi fesoasoani. E faamalie atu foi i le Afioga i le sui usufono atonu e silafia foi e lana afioga, ua leva foi ona i totonu ole Kapeneta. E leai se talosaga e lua vaiaso e fai ai, aemaise lava ia i latou o lo o i ai faalapotopotoga nei e i ai seleni tetele, ia e tele i le tai lua tai tolu tausaga o tapena proposals ma assess ia ona mafai lea ona maua mai, ae le o tuua i ai le taulogologo ma le tapena a le tatou Matagaluega. E faamalie atu foi i le Afioga i le sui usufono ona o lea faatoa tolu masina talu ona ou seei mai ia a o lana talosaga e pei lava ua 12 tausaga ae le i faatinoina. Ia atonu o le a taumafai i ai lenei Minisita i totonu o lenei 5 tausaga pe afai ua le mafai ona fai i le isi 10 tausaga talu ai.

Ona ou faaiu atu ai lea lau Afioga i le Fofoga Fetalai, e faafetai atu, e le i laga e nisi se vaega i le atinae o turisi, ae pei ona silafia o le tasi lenei o atinae sa faamoemoe i ai le tatou atunuu i le taimi foi o sologa lelei, a o aafiaga ua tulai mai i le Koviti-19 i le taofia o feoaiga, ua tele foi ina aafia ai e le gata o faletalimalo, a o atinae ma aiga foi o lo o faamoemoe i ai i nei atinae. Ae le o tuua ai le galulue pea ma le taumafaiga a le Pulega o Turisi, ina ia toe tatala ifo tatou alavaa ma toe faatinoina nei atinae ae o lo o i ai i se tulaga lelei ma o lo o faapea ona faatinoina ai pea, ia i ai foi fesoasoani e pei ona faamatuu atu i tatou kamupani, o tatou atinae o turisi.

Lau Afioga ona faaiu atu ai lea o se faamatalaga. Se i ou afe ae i si ou itumalo o Aana 4, Fasitootai, Vailuutai, Faleatiu, Satapuala ma Etena Fou, e afifio ai le Aiga Taulagi ma Satuala, afifio ai alo o Tamaalelagi, Tamaitai

tasi o Aana ma le Taofia, alaalatai ai Aana na saeseese i le faleaana ma le Falefasitoo. I le afifio o faafeagaiga o lo o faatunapaulia i le tatou itumalo aua le folafolaina o le Afioga Paia a le Alii. E avatu le faafetai, faafetai tatalo, faafetai tapuai mo se lumanai o Samoa. O lo o galue pea ma faatuatua i le Tapaau i le Lagi e faasino ma faatonutonu mai se vaivai o le auauna aua se manuia o Samoa aemaise lo tatou itumalo.

Faafetai atu foi i afaigaluega o le Matagaluega o Punaoa ma le Siosiomaga, ma le Pulega a Tagata Tafafao Maimoa mai Fafo mo le fautua ma galulue mo se lumanai o Samoa. Lau Afioga i le Fofoga Fetalai, soifua ma ia manuia le Fonousu a Samoa.

FOFOGA FETALAI: Ua faamalo faafetai malo saunoa i lau Afioga i le Minisita. Ia se i tulai mai lau Afioga i le Tamaitai Palemia.

Afioga Hon FIAME NAOMI MATAAFA: Lau Afioga i le Fofoga Fetalai ma le mamalu o le fonotaga a le Palemene, ia, sa ou amatalia atu le tali a le Malo, ma ua faapena ona faagasolo atu.

Ou te manatu lau Afioga i le Fofoga Fetalai, o le a taualuga atu le matou Itu nei i le saunoaga a le Sui Palemia ona maea ai lea o le matou pitolaau. Faafetai.

FOFOGA FETALAI: Malo faafetai. Ia, o le fuafuaga lava lena sa fuafua atu e le tatou Nofoa, ae malo faafetai i lau Afioga o lea ua faailoa atili mai. Ae malo faafetai i lau Afioga i le Minisita o Punaoa Faalenatura ma le Siosiomaga, faamalo mo le folasaga. Faafetai foi o lena ua mautu lelei lau lisi aua talosaga a sui usufono mamalu o le Palemene aua nai o latou eleele.

O le mea lea malo faafetai. Ia o lea ua saunoa manino le Afioga i le Palemia, o le a lafo atu i lau Afioga i le Sui Palemia e te faaiu maia saunoaga a le tatou Malo.

Afioga Hon TUALA TEVAGA IOSEFO PONIFASIO (Sui Palemia): E momoli atu le faamalo ma le agaga faafetai i le tauaofiaga matagofie a le Palemene i lenei itula o le aso. O le viiga o le Atua e le faaitiitia ona o Lana puipuiga faifaipea ia Samoa aemaise lenei vaitaimi o le faamai. Ua felanulanuai foi Lona alofa aemaise o Lona filemu e ala mai lea i saunoaga ma tuleiga matagofie i le Palemene ua faapea ona faafofoga i ai Samoa talu mai le tauaofiaga o le Palemene i lenei vaiaso lea ua mafai ai ona maua e i tatou le lagisoifua, le lagimama, maua e i tatou se fesilafaiga matagofie i lenei itula o le aso.

Lau Afioga i le Fofoga Fetalai, ou te muai faatulou i le Maota i Tiafau aua o lele ua malutauee le paia o le Fonousu a Samoa. Afio ia lau Afioga i le Fofoga Fetaali, afio le Taitai o le tatou Malo, afio lau Afioga i le Tamaitai Palemia, afifio Minisita o le Kapeneta, Minisita Lagolago. Afio le Sui Taitai

o le Itu Agai aemaise sui usufono mamalu o le Palemene o Samoa ua tauaofia i lenei afaifi.

Ia tainane foi le Sui Fofoga Fetalai ma le Failautusi o le Fono, faapea Ofisa Sili o Pulega o Matagaluega a le Malo ua mafai ona faatasi mai i totonu o le tatou Palemene i lenei afaifi. E i ai le manatu ma se lagona, o le a le tolovaaina le upega, aua e le ogemaa le sami, e le oge lavelave foi le vaofilifili o Samoa. O le a ou le toe atuluaina le au tosi a le tufuga ta tataua ina nei logo i tiga le taliaua, aua o ou paia ma ou sa Samoa e le mafai ona ou auuaina faaia ivililo, ona o ou paia e mai le vavau seia o oi le faavavau.

Ae ao ona ou faatulou ma ou faatalofa atu i le paia o Samoa, i lau Afioga i Le Ao Mamalu o le Malo, lau Afioga i le Sui o le Fono a Sui Tofia. Ou te faatulou foi i le Faamasinoga, le Faamasino Sili, le Afioga i le Peresetene aemaise le vasega o Faamasino mamau, ae a le tapuaiga a Samoa, Tama ma Aiga o Aiga ma latou Tama, Tumua ma Pule, Ituaia ma Alataua, Aiga i le Tai ma le Vaa o Fonoti.

E le faagaloina foi le tapuaiga, aemaise le faigamalo a Tutuila ma Manua, Sua ma le Vaifanua, Fofu ma Aitulagi, Saole ma Saleaamua ma le Launiu na Saelua.

Tulouna foi le motusa i le afio o le Laau na Amotasi, Faatuiolemotu, Tootoo o le Faleula ma tama a le Manuatele.

E le faagaloina foi le faafofoga tapuai a auauna a le Atua i so o se fatafaitaulaga i totonu o le tatou atunuu. Malo tatalo, malo tapuai. Ia, e ui lava ina soua le tatou Malo i futia ua sola, ae o lea ua sao ma uli le sa o Samoa, ua tatou aulia mai lenei tausaga ona o a outou talosaga sa outou faasaga oge ai i le Atua aua Samoa ma lona manuia.

Lau Afioga i le Fofoga Fetalai, ou te fia ave lava se taimi puupuu i lenei itula tatou te tomanatu ai i le Faavae o si o tatou Malo, e Faavae i le Atua Samoa. Ta te maofa ma ota mitamita i lenei Faavae. E talitonu e leai se Samoa sa soifua mai, o lo o soifua ma o le a fananau mai se i tulou o le a le lagona lea lagona, o le mitamita i lona Faavae. Ou te talitonu e le o se tofa ma se utaga na sailigofie, atonu foi sa sailigofie i se faatofalaiga a nai toeaia i na vaitaimi, ona o le musumusuga a le Atua. Ae faafofoga foi i le tulaga lea, o Amerika, e faapea latou ma le latou tagavai, In God we Trust. Tatou te faamoemoe i le Atua. O Ausetalia, Advance Australia, Agai i Luma le Atunuu, e le o taua se Atua. Fai mai Niu Sila, God Defend New Zealand, Le Atua puipui Niu Sila. Ae faapea mai foi Peretania, God save the Queen, Le Atua laveai le Tupu Tamaitai. Ae faapefea tagata. A o Samoa, ua aumai atoa e Samoa le Atua ua faavae ai Samoa. O le a lona uiga? Ua aumai e o tatou tuua le filemu, le poto, le agaga, le mamalu o le Atua atoa ai ma ana poloaiga tatou te tausia ina ia tumau ma maumausali lo tatou Faavae.

E malie foi i le faalogologo atu i le po anapo i nisi foi o saunoaga i le 10% lea sa taua faapea e taofi e le konekarate se i maea le fausiga o se auala po o se fale, a i ai se faaletonu e le toe maua le 10%. Ae a leai se faaletonu e toe

ave le 10% a le konekarate. Lea na saunoa ai le Tamaitai Palemia anapo, o tatou tatou te fiafia tele e fafau ae tatou te le fiafia e tausī. O i ina na ou alu ai i le fale ma ou mafaufau, tulai mai le fesili i lou mafaufau, o tatou tausī ea le Faavae lea na agai i ai o tatou tuaa? Ia, o le uiga lena o se tala i lenei itula, o tatou tuaa na latou faatu ma fauina, maua Malo. O tatou, e tatou te faaaau ma tausī le Faavae o le Malo. E manatua pea ma faafetaia le sao o i latou sa asaina le gasu o le taeao ma le lavelave o le vaofilifili, aemaise i latou na muaimalae i totonu o lenei Palemene ma tausī Faavae i le malae o Tiafau. Ia, o le tatou taimi lenei pei ona maua i le tele foi o saunoaga, tatou galulue faatasi, faatea ma faatuatuanai futia ua mavae.

Ia, le aofia o le Palemene mamalu, o a ni mea ua faaletonu, tatou faasaosao, o a foi ni mea ua piopio, tatou faasao. A o a foi ni mea ua malepe, tatou lipea, tatou faaleleia le agaga lea e toe avatu ai se tuualalo, se i tatou toe tomanatu tasi lava i le tatou Faavae. O le mafuaaga foi lena ua ala ai ona tatou potopoto i totonu o le Maota lenei. Ia tatou talosia ia ma manatua pea agaga o i latou ua faailagi le folauga, aemaise suli ma feoi o lo o faapena ona soifua mai, augatupulaga mai e na mua ia i tatou. Ia, omai laia tatou osiosi le Faavae, tatou galulue pei o le poloaiga a Iesu, ia tatou fealofani, tatou galulue ma tatou feoeoeai ma tatou fegalegaleai. O le finagalo lea o le Atua, o i le tatou Faavae tatou te maua ai le tasiga lea.

Lau Afioga i le Fofoga Fetalai, o le a fanatonu ia le malama ma vili tonu le ifi a Maina e tusa ai ma le mafuaaga ua ou tulai atu ai. Ou te tulai atu e tali atu i nisi foi o saunoaga matagofie e pei ona laga mai i finagalo o sui usufono o le tatou Palemene. Ou te talitonu o le a ou le ootoina atu tulaga o sui usufono lea na saunoa mai, ae o le a avatu loa i se aotelega se manatu ona e talitonu ua uma ona faafofoga le Maota nei aemaise foi le atunuu e pei ona outou tofua saunoa i manaoga aemaise foi finagalo na faaalua e agai mai i lenei Matagaluega. Mo le sialfia, o lenei Matagaluega o lo o i ai foi le fesootaiga, e galulue faatasi ai ma le Matagaluega o Leoleo, lea na saunoa le Afioga i le Minisita e tali atu i nisi foi o finagalo na faaalua po o fesili na tuuina mai. Ia, e faapea foi le Matagaluega o Pisinisi, Alamanuia ma Leipa, o lo o faapena foi ona i ai le sootaga ma le Matagaluega lenei o Tiute ma Tupe Maua i tulaga foi o laisene pisinisi aemaise le tulaga o le resitalaina o pisinisi mai fafo. O se taimi ona ou oo lea i ai.

O le fesili na tuu mai e tualala mai i se tulaga o se fautuaga po o se tuualalo foi na agai tonu lea i le masina faata po o le pusaoloa lea ua taua o le X-rays scanner. O isi fo sa saunoa mai i le tulaga o taifau sosogi se i tulou, o lea foi na oo i ai le Afioga i le Minisita o Leoleo, e uma ou toe faalauteleina atu se isi vaega.

Na agai foi saunoaga i fualaa faasaina po o aisa ia o lo o taua i le faa-Peretania o le metaphelame e faapena foi auupega po o fana faasaina. Ia, sa i ai foi finagalo e talosagaina le faapau o tiute o taumafa lelei ma fetai mo le soifua maloloina. E talosagaina foi le tau o tiute mo meaai taumafa e fia

tuuina i lalo ua taugata le soifuaga. E faapea foi ma le tulaga o le TIMS po o le Tax Invoice Monitoring System, le masini lea o lo o faamaumau ai le faatauina o oloa, ia ma maua ai le record po o faamaumauga, o faamaumauga e iloa e le faatauoloa mo se faaitaiga, o le faamaumauga foi lena e pick up mai e le software po o le masini o lo o i tai i le tiute. Ia, ma se tasi o vaega pei ona faataua i saunoaga, o le tulaga lea i le puipuia o tatou tuaoi po o le border security. O le isi lea vaega o lo o nafa foi ma le Matagaluega lenei o Lafoga ma Tupe Maua.

O le a amata atu se faamatalaga lau Afioga i le Fofoga Fetalai i le masini lea o le TIMS. O le TIMS ua uma ona faamanino atu, lea foi na toe saunoa i ai le Tamaitai Palemia, e leai se fuafuaga a le Malo e aveeseina lea polokalame, ae o lo o faatino muamua i ai ni iloilogia i lalo o le vaega patino o le Tulafono e uiga i le TIMS ma le mafuaaga o lona faatulai maia. E manatu le Malo e ave le faamuamua o lenei polokalame mo pisinisi tetele, e pei foi ona saunoa nisi o sui usufono, o i lea e alo ai le isi faipisinisi ia aua ne i iloa ai le aofaiga o lana faatau ua fai, po o tupe o lo o ia aoina. Lea foi na saunoa nisi o sui usufono e faapea, o i lea o lo o i ai le tulaga foi lele o le faitogafiti. Mo le silafia, atonu o le mafuaaga tonu lea na ala ai ona ae se tofa i le Malo talu ai ina ia aumai le TIMS iinei i Samoa ina ia mafai ai ona aua ne i mafai ona toe alofia e se isi le tulaga o le lafoga, aemaise lava le lafoga lea o le VAGST. Ia, o lo o i ai foi le faanaunautaiga i le Malo ua i ai nei i nisi foi o fautuaga sa tuuina mai, e ao ona silasila le tatou Malo e ave le faamamaavega i nisi o pisinisi laiti, pisinisi e le i malolosi lelei, pisinisi o lo o taumafai aemaise lenei vaitaimi o le faamai, lea ua tatou tuanai atu le misela, e pei o i ina na amata mai ai le puapuagatia ma le faigata ai ma le tele o pisinisi, aemaise lava pisinisi laiti.

Ia, e le toe fai atua se tala i le vaega o le soifua ma le taugata o le soifuaga o lo o i ai, o lea ua manino le faaaliga a le Miniita o Tupe, ua aumai foi le lapataiga, e ono faigata le tulaga o le tatou tamaoaiga tatou te agai i ai. O le isi lena itu sa sailasila i ai le Malo, e ao ona iloilo le Tulafono ina ia aua ne i aafia i le aafiaga o pisinisi laiti, aemaise foi o pisinisi laiti, aemaise foi o pisinisi tetele. Ia, lea sa tuuina atu ai loa le fautuaga a le Matagaluega i le Kapeneta. Sa tapena uma tulaga ia ma avatu ai se fautuaga i le Kapeneta, e silasila e faapafala pe tuusaunoaina foi lafoga a pisinisi e le o ausia e latou le \$200,000 o le latou income i le tausaga po o se latou tupe maua e aoina i le tausaga. O lona uiga o pisinisi uma e \$200,000 le latou tupe maua i lalo, o le a faapena ona tuusaunoaina le tulaga, e le aoina pe faamalosi le i ai o le masini e aoina ai latou tupe, ae o le a i ai le tulaga foi lele masani, o le a tuu pea i le faipisinisi e faaoo mai e faatumu lana form ma declare pe faailo foi le tulaga o lana tupe maua i lea tausaga ma lea tausaga. Ae a i ai foi se taimi ua toe malosi le pisinisi laitiiti, o lea lava e i ai le Tulafono. Ma o le mea lena e fia faailoa atu, o lo o i ai pea le Tulafono o lo o faapea ona faamalosi i le taimi nei e le o aveesea. Ae o le mea lea o lo o silasila i ai le

Kapeneta, ia o nai suisuiga lava foi lea o le Tulafono Faatonutonu ina ia mafai ai ona faatino le tualga lea o le faapafala o le i ai o le masini i totonu o pisinisi. I le taimi la lenei, ua toe tapena le Matagaluega i le Tamaitai Pule ma le aufaigaluega e avatu le pepa i le Kapeneta e tusa ai foi ma faatonuga na tuuina mai i le matou Matagaluega e le Palemia ma le Kapeneta ia matou tapena lelei ma vaai uma i aafiaga o pisinisi nei pe a sui le Tulafono lenei e faapafala ai le TIMS i pisinisi laiti. Ia masalo ua le toe mamao ona aumai lea o se faaiuga maumaututu a le Kapeneta, o le a faapena foi ona faalauaitele, faasalalau ma manino ai foi le atunuu aemaise le aufaipisinisi i le tulaga o le a i ai le tatou TIMS. Ae o lo o i ai lava le agaga, e ese le aoga o lea masini. O le aoga muamua, e le sasi ai po o se tulaga foi lele e fai atu le vaega o tupe e \$20,000 lau tiute a o la e fai mai le faipisinisi, e leai na o le \$10,000. E le toe i ai se feteenaiga faapena, aua o la e i ai le maliliega i le faipisinisi faapea le Matagaluega a le Malo i se maliliega o le a faapena ona tutusa ma manino i le aoina o tupe mai tupe maua.

Ia, o le tala puupuu lena e uiga i le tatou TIMS, ma e tatalo atu foi i le aufaipisinisi., o le agaga o le Malo, ia maua pea tupe maua a le Malo, ma e le aoga ona i ai tulaga o le alofaga i se mea faapea, e manaomia le tou lagolago, e manaomia le tatou galulue faatasi. O le taimi lenei ua amata ona tatou oo i taimi faigata, lea ua tulai mai, ma e pau lea o le Matagaluega a le Malo e faalagolago i ai le Malo e ese mai ana paaga masani e maua ai se tupe e faasoa i le tatou atunuu ma faatino ai galuega a le tatou Malo. Ma o le tatalo lea i le TIMS, ae faamalo le onosai.

Ia, o le masini lenei, o le masini faata lea e taua i le faa-Peretania o le X-rays Scanner, o le masini e matautia lona aoga, e matautia foi lona functions, i mea e mafai e le masini ona ia faatinoina.

O lau talanoa atu i le masini ma lavea atu ai ma le tulaga i fualaau faasaina, o auupega malolosi, o fana aemaise foi o le saogalemu i le tatou tuaoi i le va faale-Malo po o le tatou border security, leaga e pei o i ina, o le a tatou iloa ai le matagofie foi o lenei masini lea o le a aumai.

O le masini po o le faata e ati le vaai, ma e tatou te mananao uma lava e aumai le masini ona o finagalo ua faaalua e au ai foi lo tatou Malo. O le mea lea e numera tasi i se Faigamalo, o le puipua o ona tuaoi mo le saogalemu o ona tagata. E faataua uma lava saunoaga na tuuina mai.

O le masini lenei o le a siitia ai le auaunaga a le Matagaluega o Tiute ma Tupe Maua. O le faa-atili ai ona mausali ia puipua o tatou borders. O tomiai faapitoa o lenei masini, e faailoa ai oloa o lo o i totonu o pusaoloa po o containers. Po o se pusa faamomoli foi e aunoa ma le tatalaina o se pusa. O lona uiga e ati le vaai a lenei masini. E iloa ai oloa faasaina, e i ai fualaau ma vailaau, auupega malolosi po o nisi foi o oloa e aumai faanana ia po o oloa foi o lo o aumaia faasolitulafono.

O le masini faata e pei ona ou fai atu e ati le vaai i le uamea e 30 milimita lona mafiafia. E mafai foi e le masini ona matau lanu eseese e faailoa mai i

le tagata lea o lo o vaaia le masini, o le lanu lea, o le lanu lea o le pauta, o le lanu lea o le laulaau. E faapena le capability po o le agavaa o lenei masini.

O lona uiga, e leai se isi e mafai ona toe faananaina se mea, o le a manino i le vaai a le masini aemaise o le tagata lea o le a vaaia le masini, e leai se mea e toe lilo.

E tau lava ina ou soso atu i le tulaga lea o le procurement po o le process lea na suanoa i ai se isi o sui usufono. E faapea ua maea le procurement ua aumai foi le NOL, po o le No Objection Letter mai le ADB ina ua ioe latou i le Tauofoga lona lua, ae peitai e le o manino po o le a le tulaga o lo o tupu i le tatou masini. Sa saunoa foi nisi fai mai ua toe retender, e le o sao le tulaga lea. E mo le silaifia o le ADB, o latou ia o lo o fund ina le masini i lalo o le poloketi lea o le uafu o lo o faatino i le taimi nei.

O le Tauofoga muamua, na maea ma mautu le Kamupani i le Tauofoga muamua. Sa i ai le Kamupani mai Niu Sila sa faamanuiaina. Ae peitai na manatu le Matagaluega i lona taimi, ua i ai se fenumiai o vaega patino po o specifications. O le masini ua le tusa ai ma manaoga o le Matagaluega e faatino ai le latou galuega. O lea na toe fai ai loa le Tauofoga lona lua ma malo ai loa se Kamupani mai Saina. O nei mea na faatino ae le i tulai mai le tatou Faigamalo.

O le eseese sa tulai mai ona sa manatu le Matagaluega e aumai le masini le faata lea, e aumai faatasi ai ma se loli, e mafai ai ona tow le masini i luga o le loli, ma feaveai le masini, e avatu i Sataoa, o Satitua, ave i Salelologa, aumai i i, i le Matagaluega o Aoga, e mafai foi ona feaveai le masini. E aoga e aumai i tua e siaki ai pusaoloa nei.

A o le fautuaga na tuuina mai, e le tagata e i ai le tomai faapitoa, po o le konesale. Ia aua ne i aveese atu lenei masini i fafo atu ma le uafu. Ioe, e mafai lava ona feaveai le masini i totonu o le uafu, pe a faapea e i ai se tulaga foi lea ua mana'o e move atu i i, toe move atu i i. Ae le mafai ona ave le masini i tua mai o le uafu ona o mafuaaga nei.

Sa i ai le offer na aumai e le ADB latou te fauina se fale faapitoa e tuu ai i totonu lenei masini. A o le a le mafuaaga? Ona o le masini lenei, o lo o i ai i totonu o le masini, e pei lava o isi masini faata, le vailaau lea o lo o taua o le radioactive, e pei o vailaau ia e i totonu o x-ray ia o lo o i le falemai. O le upu faakemisi lava ia o le radioactive e masalo o unstable nuclear. A faapuupuu e pei o le radiation lea o lea e mafua ai ia tulaga ia, o lea e fai ai pomu, ia faapea ai foi...ma cause ai le tulaga o le kanesa. O faaeteetega ia ala ai ona fai e fale lea, ina ia house ai ma tamau ai totonu le masini lea, ia aua nei liki mai i fafo. Mo le silafia a liki i tua le mea lea, o lea na saunoa le Minisita o Faatoaga ma Faigafaiva, e aafia ai le DNA o le tagata. E aafia ai le DNA cell, o lona uiga e le toe maua ni suli. E na o suli tautua e mafai ona faamaonia. O popolega na sa i le Kapeneta, o le mafuaaga lea, lea na toe faatonuina ai loa e le Kapeneta le Komiti o Tauofoga, se i toe silasila i ai. Sa faapea foi ona faatonu e le Komiti le Auditor, po o le Suetusi Sili a lo tatou

Malo ina ia fai se suesuega i le vaega patino ia po o specification pe sao ma nisi tulaga o le masini, atoa ai ma le tonu ma le sao o faatinoga o le tulaga o le Tauofoga muamua ma le Tauofoga lona lua.

E mo le silafia ua maea le suesuega a le Suetusi o lo o faatali le Kapeneta mo se pepa e tuuina mai totonu mo le iloiloga faaii a le Kapeneta.

O le faamatalaga lea e tusa ai ma le tatou masini, ae faafetai o lo o auautasi le tatou Palemene, e ese le aoga, a o faafofoga mai po o faalogologo mai foi nisi o i latou, o fuafuaina le aumaia o ni drugs po o vailaau faasaina ma auupega malolosi, e pei ona taua, o le fana gutulua, o le fana sefululua, o le tala moni lava, o le vaega lea o lea o lo o ave i ai le faamuamua a le Matagaluega nei.

FOFOGA FETALAI: Ia fai se malologa a lau Afioga i le sui Palemia, ae tulai mai le sui usufono mo Faleata 3.

Tofa Lealailepule Rimoni Aiafi: E faafetai i lau Afioga i le Fofoga Fetalai i lau faaaloalo maualuga i lenei aso. E faafetai lava mo le avanoa, ona e leai se avanoa e...E taua tele le mataupu lea e talanoa i ai le Minisita. O lea e maua, ua maea uma foi ona aumai le tusi, ua tatau ona aumai le masini lea, mobile e feaveai solo. E faigofie ai foi, ou te iloa o le finagalo foi lea o le Matagaluega sa i ai. Ae o le mea lea e pei ona saunao le Minisita, ua faapea mai o se fautuaga a se konesale o lea ua toe sui ai lona finagalo, po o le finagalo o le Kapeneta. O lea la ua le mautonu ai lou tagata, o lona uiga o le taavale lea na pasia muamua ma aumai lava le NOL mai le ADB e le i faaaogaina se konesale. Pe afai foi ua pasia, o le a le mea e le aumai lena mea mobile e faaaoga i lenei taimi, a o talitali ai le isi mea fix na e te finagalo i ai po o le a se isi mea. Ae o lena ua maua lena masini ua pasia, o lena ua ...ae le faatea mai loa, o lena ua maua le funding, maua le mea e aumai ai. aumai loa e faaaoga i lenei vaitau ua tatou feagai ma...O le mea pitosili lea ona taua i lau Matagaluega. O lau Matagaluega e 2 mea e pito sili ona taua, lena e fai e lau Afioga. O le border control ma le aoina o lafoga. Aemaise lava le border control i le taimi lenei. E le gata o mea e aumai faanana a o faamai e i lalo uma o le border control. Ae o lena ua i ai lena masini, ua uma foi ona fai suesuega a lena Malo sa i ai, ma fai uma, maua le tupe e aumai ai, ae o lea ua toe taofi. Ae afai o lena ua pasia lena masini mobile, aumai loa lena mobile e faaaoga, aua o lea e tele uafu, e tele mea e ono ave i ai. Ae taatia ai le isi masini lea e faatupe e le Malo, ona lua ai lea o tatou masini. Faafetai.

Afioga Hon TUALA TEVAGA IOSEFO PONIFASIO: Malo faafetai, e pei o le naunautaiga lena ia tatou uma lava, ua tatau ona aumai. E le o i ai se tulaga e faapea ua faatuai se mea ona o nisi tulaga lea ua ou faailoa atu i le sui usufono mamalu. O lo o i ai tulaga o popolega. O masini foi nei, e ao

ona vaai i ona tulaga o lona calibration po o ni tulaga e ono tulai mai. Ona tu foi lea o le tatou masini, e pei o mea faapena o lo o silasila auiliili i ai le Kapeneta. Atonu ua uma ona outou pasia le tulaga lea, ae pei ona saunoa foi nisi o Minisita, e ese foi la matou vaai i ai. E matou te faaeteete. A talanoa loa i le \$2 miliona, e le ni tamai tupe. E le aoga ona aumai le masini ae aumai ae pe taeao, o le faaeteetega lena. Aua e faaletonu loa le masini, ia o i ina e sao mai loa fualaaui nei. O le masini a aumai, e manatu le Malo nei e le tatau ona break down le masini lenei.

E pei o le tali atu lena, a o ita foi ia ua ou fia vaai i le masini. Ma le isi mea, e talu ona tulai le tatou Malo e leai ma se mea o tupu i o i le Custom. O lo o sologa lelei le faatautaia o le tatou green lane, aemaise le taliina mai tua o tatou oloa. O le Matagaluega foi lenei o le tasi lenei auunaga e ese le galulue punouai. O lau tala moni lava, tatou te malolo uma i le Kirisimasi, ae o lo o faigaluega pea le Ofisa sili o Pulega o Matagaluega ma le Matagaluega. O le mea lea ia tatou onosai, ua le o toe mamao ona aumai lea o le masini.

E masalo e o faatasi ma le masini lenei, e pei ona fesiligia le tulaga o taifau sosogi nei. I le taimi lenei ua maea saunoa le Minisita o Leoleo, o lo o vaavaalua foi ma le tiute i le tulaga lea o le detec ina po o le suega lea o fualaaui faasaina nei, pe o nisi mea e mafai ona sosogi e taifau nei. O lea ua uma ona saunoa le Minisita i le tulaga ua i ai. E toe 2 taifau ia e totoe. E tasi le taifau o lo o faaogaina e leoleo, tasi le taifau o lo o faaogaina e Tiute ma Tupe Maua.

E mo le silafia, o si taifau lenei, ua matua si mea. O le 14 nei o tausaga talu mai ona galue, ae 4 tausaga talu mai ona litaea. O lona igoa o Fling. O le tala moni lava ua fai ifo lona malosi, ae o lo o faatalitali le Matagaluega faapea foi le Matagaluega o Leoleo i le polokalame lava lea, e aumai ia Niu Sila ma Ausetalia, ina ia toe maua ai ni avanoa mo nisi a tatou taifau sosogi fou. Sa faapea foi e faatino aoga i le tausaga na tea nei, ae o lo o tulai mai le faamai, pei o le isi lena mafuaaga ua tuai ai ona faatino aoga.

O le Matagaluega o Tiute ma Tupe Maua, o i latou ia o le frontliners, e taunuu mai i ai le tulaga o fualaaui faasaina. O containers o mea uma lava, o lo o i ai le special unit i tai.

FOFOGA FETALAI: Se i fai sina malologa a lau Afioga i le sui Palemia. Tulai mai lau Afioga i le Minisita o Galuega Tetele.

Tofa Hon Olo Fiti Afoa Vaai: E faamalulu atu i le Sui Palemia, ona o lea sa matou vavao foi i le Paeaiga talu ai i le Faigamalo lea sa tuanai atu. Sa o latou faapea ai o le a aumai ea taifau robot foi ia, o robot dogs. Pe na e maua atu ni mea faapena i le Ofisa pe sa i ai pe leai? Ae o le alu o le tele o le taimi s felafolafoai ia i le taua o lea mea, ae fai mai o lea o le a aumai i le tausaga na se i mavae atu nei, tailo po o i ai ni mea faapena pe leai. Ae aoga tele foi e sogisogi i mea ia o drug ma mea faapena.

FOFOGA FETALAI: Tulai mai le sui Palemia se i tali le fesili a...

Afioga Hon TUALA TEVAGA IOSEFO PONIFASIO: Ou te faamalulu atu lau Afioga i le Fofoga Fetalai, i le tulai mai o le Minisita, ou te alu atu i le Ofisa e leai ma se mea o totoe i totonu o le Ofisa na o kapoti la e tutu mai. E faamalulu atu ai, ou te le i maua e faila po o se faamataga e uiga, i nei robotic dogs, po o robot ia e omai e sosogi ia le tulaga o fualaa.

FOFOGA FETALAI: Ia se i tulai mai lau Afioga.

Tofa Lealailepule Rimoni Aiafi: E leaga o lea e alu i tatou faamaumauga, ou te le manatua pe na i ai se taimi na talanoa ai lea mea o le robot, po o le a le mea le saunoa i ai le Minisita iinei i le Palemene. E leai se vaitaimi, a o se taimi foi na talanoa ai se mea faapea, e o mai e fai se galuega faapenei. Ma le faaaloalo lava.

FOFOGA FETALAI: O le a le igoa o le mea?

Tofa Hon Olo Fiti Afoa Vaai: Lau Afioga i le Fofoga Fetalai e masalo e le i Fono i le aso lea na tulai ai le Minisita o Tupe Maua sa ona faasilasila ai le vaega lea.

A faapea e le i Fono, o lona uiga sa tofa i le taimi sa fai ai le faaaliga lea a le Minisita talu ai.

FOFOGA FETALAI: Se i tulai mai le sui usufono mo Satupaitea.

Afioga Hon Lautafi Fio Selafi Purcell: Tau lava ona ou sau i le Palemene ou te fono lava i Fono uma, a sue foi i tatou faamaumauga, e le taitai ona misi sau Fono. Ou te le i faalogo o talanoa le mataupu lea i robot dogs po o a po o ni hotdogs po o a mea ia ua talanoa mai ai. E faafefea ona omai nei masini mai le masini e sogisogi. Se o le tama lea o Olo, ua ou le malamalama i le tala.

FOFOGA FETALAI: Tulai mai le Minisita o Faatoaga.

Susuga Hon Laauli Leuatea Polataivao Fosi: E fai si taua ona o le talanoaga lea e taua e Olo na matua vevela ai lava le Fonotaga sa fai, ona o le mea lava e tau ua le lava a tatou taifau moi.

A o lea ua ou faalogologo ma lou alofa i le Sui Palemia, ua fai ifo le malosi o Fling. Ae ou te faamaonia, sa oo le saunoaga a le Afioga ia Tialavea i i, i masini ia. Ona ua tau i ai se lagona e i ai le taimi e vaivai ai le taifau, ma le

oo le malosi o lana sosogi i le mea e i ai. Ae o le polokalame la o robot dogs ia na tau aumai, ou te faamaonia.

Ae na ona faapena atu, leaga ona o tulaga foi ia. Ae o le measili o la e tau atu le Afioga i le Sui Palemia, e leai ma ni faamaumauga o le robot dogs i totonu o le Ofisa, ae sa talanoa i le Palemene.

FOFOGA FETALAI: Ou te iloa o lea foi ua manino lea tulaga. E i ai se fesoasoani le sui usufono o Anoamaa Nu 1.

Afioga Alaiasa Moefaauouo Malagaitutogiai Sepulona Moananu: Sa ou fono foi i le Fono lea, e le i talanoaina ai se mea faapea. A o lea foi ua tau le suafa o le sa Minisita o si ou uso tuofe le afioga i le Minisita. Sa le tatau ona apaapa i ai le talanoaga o fai nei. Ae ai lava o ni latou talanoaga ma le Minisita ma le faiga faavae a le Minisita i na taimi i tua i le fale e fai ai tatou taumafataga. Ae le i i ai se mea faapea i totonu o le Maota. Ma le faaaloalo.

FOFOGA FETALAI: Ou te manatu...E i ai sau fesoasoani?

Tofa Hon Lauofo Fonotoe Nuafesili Pierre Lauofo: A fai foi e sao na taua e le Minisita lea talu ai ia ia ituaiga taifau ropati. O la ua faiaina i le palota ia Lealaiasa ma alu atu ai lava ma na mea. Ae tatou o ia i se isi mataupu.

FOFOGA FETALAI: Ou te iloa o lea ua manino lea vaega. O le mea sili, e leaga e le o nofo mai foi le sa ia taua i totonu o le Maota. O le mea lea, ia faauma maia lau saunoaga lau Afioga i le Sui Palemia.

Afioga Hon TUALA TEVAGA IOSEFO PONIFASIO: Lau afioga i le Fofoga Fetalai, o lo o i ai foi se avanoa e manaomia ai se scanner mo le va lea o tatou ma le tatou tuaoi i Tutuila. Atonu o i o le a faaoga ai le tulaga ia o ropati. Se i fai muamua i ai se sailiiliga. O le isi mea e fia faailoaina, o tulaga ia e pei ona taua e nisi o sui usufono, o le faasalaga ma tulafono foi. O le mea o lo o vaavaai i ai le Matagaluega lenei ia matou work plan, e ao ona matou toe vaavaai i le review o nisi o Tulafono, ina ia fetau le taimi ma le tulaga o lo o tulai mai. Ma o Tulafono foi nei, e tatau ona review faalelei ina ia malupuipua ia Tulafono. Aemaise lava i le tulaga lea o le aumaiga o oloa i totonu o le atunuu. E silafia foi e le Palemene o le Matagaluega lea o Tupe Maua ma Lafoga, e galue lava i luga o le Tulafono, e faatulafono uma lava mea uma. A faapea o nisi e omai i le Minisita ma talosaga mai i lea mea ma lea mea, e faamalie atu leai e alu lava le tatou Matagaluega i luga o le Tulafono. O lo o tilotilo foi e faaleleia nisi o Tulafono, e i ai le Tulafono lea o Business License po o Laisene Faapisinisi. O lea o lo o i ai le matou fesootaiga ma le Afioga i le Minisita o Leipa ma Pisinisi ma Alamanuia, aua

o latou lea e faatinoa le tulaga i le lesitala, e faapea foi le tulaga lea o le issue ina po o le tuuina atu lea o le certificate lea o le FIC po o le Foreign Investment Certificate. E ok atu loa latou ona avatu lea i tai i le vaega o le Tiute, o i ina e tuuina mai ai le laisene o lene pisinisi. E tapa uma lava faamaumauga, e leai ma se mea o pau. Na ou maua foi nisi o saunoaga i le aso. E faapea o Saina ua omai Saina ua nonofo ma o tatou tamaitai Samoa. E le sese lea tala, e masalo o le mea vave lava lea ina ia mafai ai e le Saina ona maua sana pisinisi faa-wholesale, ae lesitala i le teine Samoa ia pisinisi faa-retail. O mea ia, ou te iloa o lo o i ai se tapenaga mo le alu i luma o le tatou Malo, ina ia fai se fuafuaga lelei o lenei mea. Ua tele foi manatu o le atunuu ua tuuina mai ae ou te talitonu, e i ai se taimi o le a silasila i ai le Malo i le aotelega o le puipuiga. O mea uma lava ia o lo o tatou atugalu ai, o tatou fanua, o tatou pisinisi, ia ma mea uma lava faapena. Ou te iloa o le isi lene galuega tele a le tatou Malo, o se latou policy aua le fuafuaina lelei o le tulaga o le aufaipisinisi mai fafo.

Na logo mai au e le tamaitai e le Ofisa Sili o Pulega o le Matagaluega, e leai lava se laisene o tuuina atu faapea i se Saina mai fafo, po o se Arapi mai fafo po o se palagi e le o se tagata nofomau i Samoa, po o se tagata Samoa e fai ai sana wholesale pe fai ai sana retail. E tou te talitonu foi i ai i le tulaga lea, ona o lo o mausali tulaga o le Tulafono.

Mo le alu i luma o le a i ai na i fesuiaiga o le Tulafono ina ia tali ai ma faamalieina ai manaoga o lo tatou atunuu e tusa ai ma tulaga pisinisi ma latou laisene.

E toe foi mai lau talanoa i le tulaga na fesiligia ai le pau o tiute i vaega ia o taumafa faapea foi nisi o oloa o aumai i totonu o le tatou atunuu. E mo saunoaga na agai mai i le mataupu lea, ia malo faafetai. Ua faamauina tuualalo ma fautuaga sa tuuina mai e toe silasila i ai le Malo, i le tulaga lea o le tiute o meaai, aemaise o taumafa o lo o manaomia ai le Soifua Maloloina. Ae mo le silafia, e 20% le tariff maualuga ua tuuina atu mo taumafa suamalie e tele ai le suka, sukalaki o le keke, e syrups ma lole. Ona e i ai le manatu, o taumafa nei o lo o faatupulaia ai le NCD po o faamai e le pipisi. O le tele o mea suamalie, o le mafuaaga lene ua tuu ai i luga le tiute i le 20%. E le o se tiute tele le 20% ou te iloa ua talafeagai. O le tiute foi lea, ua ou faaogaina o lo o apply i tulaga o taumafa e i ai le gao, o mamoe, o puua, ma mulipipi. O lo o i ai foi le tariff lea e 20%.

O le agaga lene, e i ai le naunautaiga e le faapea o le fai lava o sia mea ma faapau i lalo le tiute, e leaga o i, e fai i ai le fuafuaga o tupe ua faatupulaaina e ausia e le Matagaluega i lea tausaga ma lea tausaga.

Mo le silafia e 20% le maualuga o le tiute o lo o tuuina i luga o fualaaui aina po o vegetables ia ma fualaaui taumafa mata po o fruits. O le mafuaaga foi ua ala ai ona tuu e tiute i i, ona e i ai le talitonuga, e i ai le mafuaaga na faavae ai le manatu o le Matagaluega, o le a tatou o ia e aumai fualaaui aina

mai fafo, ae taumafai e encourage ma faalototele o tatou tagata e toto fualaa nei i Samoa.

O le agaga lea, ae o fautuaga uma ma timaiga ua tuuina mai, e faailoa atu, o lo o galulue le tatou Matagaluega i le taimi nei e toe iloilo le tulaga o le harmonization o le tatou tariff po o le harmonized system o le 2022, o i ina e toe faapaleni ai le tiute e apalai i lea oloa ma lea oloa.

E fai vaavaai foi le Matagaluega i le Lipoti o le tamaoaiga o le atunuu. E fautuaina lenei Matagaluega i ana fuafuaga ma le aoina o ana tupe. I le fai vaavaai lea i le Matagaluega o Tupe, ia faapea foi le Bureau of Statistics, o faamaumauga ma fuainumera aemaise le fautuaga mai le Faletupe Tutotonu. O i e fua i ai le tamaoaiga o le tatou atunuu, ona faapena loa ona way up ma faapaleni lelei le tulaga e apply ai le tiute po o le tariff.

E masalo o le tala atu lea e tusa ai ma le tiute, lea na talosaga mai ai nisi o sui usufono e faapau.

Lau Afioga i le Fofoga Fetalai, o le tali puupuu lea o le a faauma atu ai ma sau faamatalaga i lenei afiafi. Ou te talitonu ua vela le fala, ae o le naunautaiga lau afioga i le Fofoga Fetalai, o le tatalo foi lea e a le sui usufono, ia alofagia pea lau Afioga e le Atua e tusa ai ma faatautaiga o le sa o le Palemene. Ia alofagia e le Atua le Palemia, ma le tatou Palemene atoa aemaise o le tapuaiga a Le Ao Mamalu o le Malo, aemaise Taitai o Ekalesia.

Le paia o Samoa o lo o afifio ma papaaao i atunuu mamao, aemaise tupu ma ee o lo o faapena ona afifio i Samoa nei.

Ia tafimala ni faamai, a o ni ao pogisa i si o tatou atunuu. Ia tatou lototetele ma faamoemoe pea i le Atua. Ia manuia le fonotaga, soifua.

FOFOGA FETALAI: Ua faamalo tanoa, malo saunoa i lau Afioga i le Sui Palemia. Ou te talitonu foi o lea ua faaii mai i le saunoaga a lau Afioga, ia le Itu a lo tatou Malo, ia malo lava sausaunoa. Ou te talitonu foi, o lea ua maua uma ia nisi foi sa laga e le paia o le Maota, sui usufono mamalu faafetai o lea ua paia e lau saunoaga.

Ia aemaise lava ia tulaga o tatou masini foi ia aua le puipuiga o saogalemu o le tatou atunuu, ia malo faafetai o la ua i ai le fuafuaga a lo tatou Malo. O le mea lea faamalo le saunoa, malo foi le onosai, faafetai o lea ua manino mea uma, i le tatou Maota.

Ia ou te talitonu o lea ua maea ona talifuaitau ia le tatou Malo, e tusa o mataupu na laga e sui usufono faalauaitale i tulaga tau tupe ma le tamaoaiga o Samoa ma faiga faavae tau tupe a le Malo. Ua maea ona faatu le lafo ma ua faapea ona faaluaina mo le faitauga faalua o le Tulafono Tau Faaofi i le Aso 14 o Tesema 2021.

Na tuuina atu le Fesili ma faamaonia ai le lafo na faatuina i le aso 14 Tesema 2021, ma faitau faalua ai le Tulafono Tau Faaofi o le Faatatauina o Tupe Faaopoopo (Nu.1) 2021/2022.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2021/2022 – iloiloga auiliili.**

FOFOGA FETALAI: O le a sagai atu loa le Fono Aoa o le Iloiloga auiliili o le Tulafono Tau Faaofi o le Faatatauina o Tupe Faaopoopo (Nu.1) 2021/2022.

I le faagasologa o le Iloiloga Auiliili o le Tulafono Tau Faaofi e mafai ona saunoa faatepa Sui Usufono i mataupu o lo o tusia i le Tala Faatatau o Tupe Faaopoopo Nu.1 o Tupe Maua ma Tupe Totogi a le Malo o Samoa mo le Tausaga Faaletupe faaiuina Aso 30 Iuni 2022. E ao foi ona silasila sui usufono mamalu i le Lipoti a le Komiti o Tupe Maua ma Tupe Tototgi i le Tala Faatatau Faaopoopo o Tupe Nu.1 2021/2022 P.P. 2021/2022 Nu.25 a o faagasolo le Iloiloga auiliili.

E tusa ai ma Tulafono Tumau 135(3), e amata le Iloiloga Auiliili o le Tulafono Tau Faaofi i ona Faamatalaga.

FAAMATALGA MUAMUA

VAEGATUPE MA TALA FAATATAU

FAAOPOOPOGA I TUPE FAATATAUINA

MATAGALUEGA	FAAMATALAGA	AOFAI TUPE ALU
FAATOAGA MA FAIGA FAIVA:		\$320,000

Faamaonia.

PISINISI, ALAMANUIA MA LEIPA	\$20,000
---	-----------------

Faamaonia.

**MATAGALUEGA
O TUPE:**

\$4,339,713.

Faamaonia.

**MATAUPU TAU LE
VA I FAFO MA
FEFAATAUAIGA**

\$516,129.

Afioga SULAMANAIA FETAIAI TAUILILI TUIVASA: Lau afioga i le Fofoga Fetalai...

FOFOGA FETALAI: Ia se i tulai mai le sui usufono o Vaimauga Nu.2, le Matagaluega o Mataupu Tau i le Va i Fafoma Fefaatauaiga?

Afioga SULAMANAIA FETAIAI TAUILILI TUIVASA: Ia, o le agaga o le fesili a le sui usufono o lea e matau i le Matagaluega lea e 2 taavale fou mo malo e feaveai ai. O lea e sau ai le \$278,000. O le fesili a le sui usufono, o lea e matau o lea e fai ia le Lockdown, ia e le o i ai foi ni malo e omai i totonu o si o tatou atunuu.

O le isi vaega e faafesili atu ai i lena itu o le Maota, pe o fea o i ai ia tatou taavale ia na aumai foi i le vaitaimi o le taligamalo a Saina. E pei e pau lava lena o sina faafesili a le sui usufono ona o lea maua e le o omai ni malo i lenei taimi ae o lea o le a alu ia le \$278,000 e faaagaga mo malo ia, ia ma le faaaloalo lava i lau afioga i le Fofoga Fetalai.

FOFOGA FETALAI: Ia se i tulai mai ia lau afioga i le Taitaifono.

Afioga VAELE PAIAAUA IONA PAIAAUA SEKUINI (Taitaifono, Komiti o Tupe Maua ma Tupe Totogi): Faafetai i lau afioga i le Fofoga Fetalai mo le avanoa. Faafetai foi i le sui usufono mamalu mo le faafesili i tulaga ia.

Na oo i ai sailiiliga a le Komiti lenei i taavale nei e 2. Sa fesiligia foi pe o le a le mea ua toe aumai ai taavale nei i lenei vaitaimi o lea e fai ia le e pei ona fesiligia e lau afioga, ae na manino le faamalamalaga a le Pule Sili o le Matagaluega, o taavale ia na aumai muamua lea sa i ai taavale o le SIDS, ua maea ona faatau ma ua tuai taavale ma ua le toe maua totoga.

O lona uiga a i ai ni malo faafuasei, e le toe i ai ni taavale ma e le toe aoga taavale ia aua le feaveaiina o malo faaaloaloga. O le ala lea ua talia ai e le Komiti ia le aumai o taavale ia, e faaleoleo mo ni tatou malo.

Ia e pei o le tali atu lea ma le faaaloalo.

FOFOGA FETALAI: Ia atonu o lea ua tali atu ua faamalieina le fesili.

Afioga SULAMANAIA FETAIAI TAUILIILI TUIVASA: O le lua o fesili a le sui usufono aua sa i ai le manatu i le taimi lenei e faaoga ia tatou taavale foi na o rental cars a si o tatou atunuu ona o le taimi o le Koviti e ave ai foi se tamaoaiga i ina i pisinisi.

Lua o le avanoa o le \$13,000 i loia. Ia e pei e avatu le fesili a le sui usufono a tau loa le loia e pei o se tulaga e tele lava le totogi, ia e pei lenei o se loia e \$13,000 le totogi. Ia e pei e faapena se fesili, pe o se loia ua ofoina mai sana auaunaga saoloto pe auauna fua i lo tatou Malo i le totogi lea e \$13,000 ae sau o le loia.

Ia e pei o le agaga lena e fia maua ai se malamalamaaga o lenei sui usufono.

FOFOGA FETALAI: Ia se i tulai mai lau afioga i le Taitaifono.

Afioga VAELE PAIAAUA IONA PAIAAUA SEKUINI: Faafetai mo le faafesili a le afioga i le sui usufono mamalu. O le vaega muamua e pei ona fesiligia taavale foi ia rental e faaoga, e le fetau ma talafeagai ona feaveai ia ni malo faaaloologia ia i ni taavale lisi. Ia e silafia uma lava e tatou te i ua aumai ni tatou malo faaaloologia po o le tulaga maualuluga i le tatou malo, ia e ave i ai le faamuamua i tulaga aloaia ma taualoa, e faapena le uiga o le tatou Malo o i ai nei.

Ae o le vaega lea e te saunoa i ai i le \$13,000 i le totogi lea, e le o se loia le tagata lea. Na faamanino mai foi e le Matagaluega, o le teine le tagata lea, e auauna i totonu o le Matagaluega lea e fesoasoani i faiga o isi galuega mo le Ofisa o le Loia.

O le tali atu lea ma le agaga faaaloalo.

Afioga SULAMANAIA FETAIAI TAUILIILI TUIVASA: Lau afioga i le Fofoga Fetalai e tataua la ona faasao ia le faamaumauga lea e i totonu. O lea e sai i le tou lipoti lea, avanoa faigaluega mo le loia. E tataua la ona toe tu lau afioga i le Taitaifono ma faaso faamaumauga ia, o le mea lena e ala ai ona avatu le fesili.

Afioga VAELE PAIAAUA IONA PAIAAUA SEKUINI: Ia faafetai, ia masalo o le tagata faigaluega lea e mo le Ofisa o le Loia ae le mo le Loia. O le Ofisa o le Loia.

FOFOGA FETALAI: Ia faafetai, o lea ua manino lea itu o lea vaega. Ia ma ua uma foi lou avanoa o lea na tuu atu ia avanoa o mea uma.

Faamaonia le \$516,129 mo le Va i Fafu.

**PUNAOA FAALENATURA
MA LE SIOSIOMAGA: \$493,719.**

Faamaonia.

**LEOLEO
MA FALEPUIPUI: \$480,410.**

Faamaonia.

**GALUEGA, FELAUAIGA
MA ATINAE ESEESE: \$4,100,000.**

Faamaonia.

FONO AOA FAITULAFONO: \$80,000.

FOFOGA FETALAI: O lo o i ai le Teuteuga a le Komiti o Tupe Maua ma Tupe Totogi i le Ofisa o le Fono Aoa Faitulafono e pei ona faaalua i le Pepa Faaopoopo o Galuega.

Tulai mai lau afioga i le Taitaifono o le Komiti o Tupe Maua ma Tupe Totogi.

Afioga VAELE PAIAAUA IONA PAIAAUA SEKUINI (Taitaifono):
Lau afioga i le Fofoga Fetalai, ou te faatu le Teuteuga i le Faamatalaga Muamua e faapea:

1. Ina ia teuteuina le Tulafono Tau Faaofi o le Faatatauina o Tupe Faaopoopo (Nu.1) 2021/2022, e toe fetuunai ai le faatatauina o vaegatupe alu faaopoopo a le Ofisa o le Fono Aoa Faitulafono, i Galuega Faatino sa'o e tatau ona faatatauina i ai, e faapea:-
 - i. Galuega Faatino 2.0 - \$45,000

ii. Galuega Faatino 3.1 - \$35,000

Faamaonia le Teuteuga.

AOFAI FAAOPOOPOGA I TUPE \$10,349,971.
ALU AOA 2021/2022:

Faamaonia.

FAAMATALAGA LONA LUA.

FAAITIITIGA I TUPE FAATATAUINA

MATAGALUEGA FAAMATALAGA FAAITIITIGA I TUPE ALU

MATAGALUEGA FAAMATALAGA AOFAI TUPE ALU

FAATOAGA MA (\$320,000)
FAIGA FAIVA:

Faamaonia.

MATAGALUEGA (\$4,339,713.)
O TUPE:

Faamaonia.

PUNAOA FAALENATURA (\$71,359.)
MA LE SIOSIOMAGA:

Faamaonia.

FONO AOA FAITULAFONO: (\$80,000.)

Faamaonia.

**AOFAI FAAITIITIGA AOAO
I TUPE ALU 2021/2022:**
Faamaonia.

(\$4,671,359.)

FAAMATALAGA:

Faamaonia.

FUAIUPU 2: Faamatuu atu ma le Faatatauina o le \$10,349,971 mai le Faaputugatupe a le Matagaluega o Tupe.

Faamaonia.

FUAIUPU 3: Faaitiitiga o aofaiga na uluai faatatauina ma toe faasoasoa atu i isi galuega fatino ma galueg faatino laiti.

Faamaonia.

FUAIUPU 1 MA LE IGOA

FUAIUPU 1: Igoa Puupuu ma le Amataga.

**IGOA: FAATATAUINA O TUPE FAAOPOOPO (Nu.1)
2021/2022.**

Faamaonia.

Na faagasolo le Tulafono Tau Faaofi o le Faatatauina o Tupe Faaopoopo (Nu.1) 2021/2022 faatasi ma Teuteuga.

**TULAFONO TAU FAAOFI O LE FAATATAUINA O TUPE
FAAOPOOPO (Nu.1) 2021/2022 – faitauga faatolu**

FOFOGA FETALAI: Tulai mai lau Afioga i le Minisita o Tupe.

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopopo (Nu.1) 2021/2022 i lona faitauga faatolu.*

Faaluaina e le Minisita mo Faatoaga ma Faigafaiva ma le Minisita mo Fesootaiga ma Faamatalaga Tekonolosi.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.

Na faaalua le agaga fiafia o le Maota i le patipati o latou aao i le pasia ai o le Tala Faatatau Faaopopo (Nu.1) o le Tupe 2021/2022.

FOFOGA FETALAI: Ia malo le onosai i le tatou Maota.
Ou te tapa lau Afioga i le Tamaitai Palemia mo lau Saunoaga Faa-Minisita.

SAUNOAGA FAA-MINISITA A LE AFIGOGA I LE PALEMIA

Afioga Hon FIAME NAOMI MATAAFA: Faafetai tele i lau afioga i le Fofoga Fetalai, mo le avanoa e tusa ai foi ma le faagasologa o le tatou Pepa o Galuega. E momoli atu le faamalo i le Maota aemaise le afioga i le Tamaitai Minisita o Tupe, i le faaiuina ma le manuia o le faasologa o le Tala o le Tupe Faaopopo (Nu.1) o lenei tausaga o lo o faagasolo. Malo le galulue, malo le onosai. Ou te manatu e le toe umi ae o tatou malolo i lenei afiafi.

Lau afioga i le Fofoga Fetalai, e tusa ai ma faamaumauga o le tatou Pepa o Galuega, o se faamatalaga faa-Minisita ia po o se folasaga. Na i ai le manatu lau afioga i le Fofoga Fetalai, o le autu o se faamatalaga i le taunuuga o le suesuega e faatatau i le mataupu na laga e le Loia Sili, e uiga i Teuteuga o le Faavae 2020 ma le Tulafono o Fanua ma Suafa 2020.

Ae ona ua tulai mai le mataupu lea o le malaga mai o le vaalele mai Ausetalia ma ua faamauina ai i latou na malaga mai ua maua le siama o le Koviti, ma ua faapea ai foi ona faatulaga ia tatou aiaiga o tatou puipuiga, ia aemaise foi o lea o lo o fonoa le Maota Fono, ona manatu ai lea, o le a matalua se folasaga.

Muamua e fia fai sina lipoti puupuu mo le silafia ma le faamaumauga a le Palemene e tusa ai ma le malaga mai lea i Ausetalia i le Aso 19 o Ianuari o le tausaga nei.

Lau afioga i le Fofoga Fetalai, o se faamatalaga o le tapenaina o le malaga lea. O le malaga QF115, o se malaga fuafuaina o le Polokalame o femalagaiga na tapenaina e le Malo o Ausetalia, Pacific Flights Programme. O se tasi o malaga mo le kuata muamua o le tausaga lenei e avatu ai tagata galulue faavaitaimi mo Ausetalia, ma maua ai foi avanoa e toe foi mai ai ia o tatou tagata ua leva ona sue avanoa mai, talu ona pepesi le faamai.

O le resitala sa tapenaina e le Ofisa o le Konesula o Samoa i Sini, faapea ma se toaitiiti na lesitala mai i Samoa nei. O le aofai na fuafua e malaga mai, e 261. Ae peitai e oo i le aso e faataunuu ai le malaga, ua na o le 73 le pasese. O nisi o mafuaaga o le pau o le fuainumera e pei ona molimauina e le Ofisa o le Konesula, e aofia ai:

- i. Le aafia o nisi i le faamai i le taimi o le Kerisimasi ma le Tausaga Fou.
- ii. E toatele i latou e le i maua tusifolau ona sa taumafai e faafou po o le leai o le faailoga faapitoa e mafai ai ona ulufale mai, pe afai e faaoga i se tusifolau ese.
- iii. E toatele nisi ua faapafala, le foi mai e nofomau ona e le i mafai ona faatau fale.
- iv. E i ai nisi e le i maua ni pasese.
- v. Toe sui aso e malaga mai ai.

O lo o talanoaina lava le faapea e i ai nisi na malaga mai ona o maliu. O le faamatalaga a le tatou Ofisa, afai na i ai nisi sa malaga mai mo maliu, e le i amiotonu le faaaliga po o tautinoga na faailoa mai. O aiaiga lava na mafai ona malaga mai ai tagata, o le ausia lea o suega tau soifua maloloina. A le negative le COVID test, e le mafai ona ulufale i le vaalele.

I le taimi o le taunuu o le malaga. I le taunuu ai o pasese e toa 73 i le malaevaalele i Faleolo i le 4:00 i le afiafi, sa suesueina loa tagata uma mo le Koviti-19, ae faatoa maua iuga i le afiafi po. O le iuga o le suesuega muamua, e 10 le pasese ua aafia i le Koviti.

O le faagasologa mai o a tatou suesuega, mo pasese ia ma le muaau o le aufaigaluega. O le suesuega i le Aso 19 na taunuu ai, e 10 ua aafia. O le aso na sosoo ai, faamausali le toa 10 ua aafia. O le Aso 21 o Ianuari, ua faaopoopo le 5 na aafia. O le Aso 22 o Ianuari, na auina ai samples i Niu Sila mo iloiloga po o a ituaiga vairasi ua maua ai le pasese. Aso 23 ma le 24 o Ianuari, 11 ua aafia e aofia ai ma tausii soifua e toa 5. Aso 26, 27, 1 le mai fou. Aso 29 ma le Aso 30, e toa 3 ua faaopoopo. O le aofai o i latou ua maua i le siama o le Koviti, e 30. E toa 25 le pasese ae 5 le autausi soifua o lo o nafa ma le vaaiga o latou o faanofoesea i le falemai i Motootua. O pasese na malaga mai ua maea uma tui puiptui faapea boosters mo nisi seia vagana ai tamaiti e toa 9, e i lalo ifo o le 12 tausaga.

O tulaga o le faanofoesea. E 17 nofoaga o lo o faaoga mo le faanofoesea e aofia ai nofoaga i le falemai o le TTM faapea Faleolo. E 12 nofoaga o lo o

i ai pasese, ae 5 o lo o faaaogaina e tagata faigaluega e pito i luma, frontliners.

Ua maea ia le faasologa lona 4, o faiga o tui suesue mo pasese ma tagata faigaluega. E le o i ai se faamaoniga, ua mama atu i fafo o nofoaga faanofoesea le faamai. Mo tagata faigaluega pito i luma, e le o i ai se isi ua aafia, seivagana ia tamaitai tausī soifua o lo o latou vaavaaia pasese ua aafia, i nofoaga i totonu o le falemai. O pasese ua aafia e 25, faapea tausī soifua e toa 5. E leai ni auga o le faamai asymptomatic. O lo o faaaauau pea tui suesue, ma e tai 44 itula ma fai mo latou uma o lo o faanofoesea. O le mau faasoifua maloloina, ua i totonu o le 10 aso talu ona aafia le tagata, ona aliae loa lea, o ni auga. O se incubation period.

Lau afioga i le Fofoga Fetalai ma le mamalu o le Maota, o a tatou vavao. O le vavao lona 3, lanumumu. O le Aso Toonai 22, seia oo i le Aso Gafua 24, na faaaauaia i le Aso Tofi 27 o Ianuari faapea le Aso Faraile 28. O le aso 29 o Ianuari na toe alu ai le faailo lanumoli, vavao lona lua mo le isi 2 vaiaso. O nei vavao le mamalu e o le Maota, e faapena ona faamasani ai ma tatou sauniuni ma tapenapena o tatou tagata i se tulaga e sao atu ai le faamai i le atunuu lautele.

Lau Afioga i le Fofoga Fetalai, sa i ai saunoaga i le Maota e fesiligia ai le Lipoti a le WHO ma le eseese o faamaumauga o lo o aumai ai pe a faatusatusa ma tatou faamaumauga i le faapea mai, e 32 faamaumauga a le WHO o tagata ua maua i le Koviti-19 ae 30 le tatou faamaumauga. Ou te faamalamalama atu lau Afioga i le Fofoga Fetalai, o le faamaumauga a le WHO, o le faitau aofai o e ua aafia. Pe manatua e le Maota, e 2 isi a tatou cases na lavevea muamua lea e faitau ai e le WHO le 32 ma le tatou faamaumauga o le 30 i le faigamalaga lea talu ai nei.

O le tulaga mulimuli lau Afioga i le Fofoga Fetalai, ia o leni foi aso ua maua ai faamatalaga eseese e faapea ua mama atu i tua le faamai. Ou te faaali atu ma le faaaloalo i lau Afioga, e le o sao lea faaaliga. Ae ao pea ona faamatala atu, ma o lea foi ua i ai le faaaliga aloaia a le NEOC o lo o tau mai ai o le aso Toonai sa malaga ese mai ai se tasi o tatou front liner ma se avetaavale a le NEOC mai se nofoaga faanofoesea ma o e faaaoga se ATM, ma ua avea le o ese mai aemaise o le front liner lea ua faapea ona breach tulaga o le Tulafono a le SOE mo i latou o lo o faanofoesea. E manatua foi e le Maota e i ai foi le isi tatou pasese i le isi taimi lea foi sa pisi ai le tatou Komiti e tau tuliloa mea na oo i ai lena foi sui ina ia mafai ona faamautinoa le puipuia o nisi sa ono vavalalata ma le sa sola atu i tua ma le nofoaga faanofoesea. O le lipoti mai e le tatou Komiti o le NEOC, e na o le pau lea o le mea na malaga i ai le front liner lea ma le avetaavale, o le o i le ATM. Ua malaga atu foi le Komiti e fai le galuega masani o le faamama o lea nofoaga, ae i le taimi nei, ua toe faafoi le toalua lea ma ua faanofo loa i totonu o le quarantine, e le gata o le front liner, a o le avetaavale ma ua tuuina atu loa le mataupu i leoleo latou te suesueina.

O lo o aumai pea le feau a le tatou Komiti o le NEOC, e le o i ai se mea e faapopoleina ai le atunuu i le mama atu i tua o le faamai. O se lipoti puupuu lea lau Afioga i le Fofoga Fetalai ma le mamalu o le Palemene e tusa ai ma le mea foi ua tupu i le faigamalaga lea na malaga mai Ausetalia. E lagona ai lava le agaga o le faafetai i le tatou aufaigaluega e tusa ai foi ma le tali atu i lea faafitauli, ma o lea foi o lo o maua i saunoaga a alii Minisita le agaga o le moomia lea o le galulue faatasi o le atunuu i lenei taimi.

O le mataupu lea o le molia o le toalua lea, atonu e aoga foi, o lea ua mataituina e tagata uma mea o lo o tutupu i le agaga o le tatou fia puipui lava ina ia le mama atu i tua lenei faamai.

Lau Afioga i le Fofoga Fetalai, ona ou oo mai ai lea i le vaega lona lua o le Faasilasilaga lenei, i le Lipoti lea o le Suesuega a le Ofisa o le Failautusi o le Fono Aoao Faitulafono e faatatau i a tatou Tulafono Teuteu o le Faavae 2020 faapea ma le Tulafono o Fanua ma Suafa 2020.

Na faasilasila e le Afioga i le Fofoga Fetalai lenei mataupu i le fonotaga a le Palemene i le aso Lua, 18 o Ianuari 2022. O lea na faataatia ai i le Laulau a Fono a le Maota lenei le Lipoti o le Suesuega a le Ofisa o le Fono Aoao Faitulafono e faatatau i mataupu na laga e le Loia Sili e uiga i Teuteuga o le Tulafono Faavae 2020 ma le Tulafono o Fanua ma Suafa 2020. O le tulaga o le Tulafono Faavae o lo o taoto ai nei lenei suesuega ua aliali mai ai le faafitauli ogaoga, ona ua tulai mai i le eseesega o lomiga o lenei Tulafono Faavae, ina ua feseetai kopi moni o ia Tulafono na tuuina atu i ai le maliega a Le Ao o le Malo.

O le popolega o le Maota e pei ona saunoa ai le Afioga i le Fofoga Fetalai, o le afaina ai o galuega a le Faamasinoga ae faapea le nofo silafia o le atunuu lautele po o fea le lomiga sao, ona ua matauina e ese kopi o lo o faatau atu i le atunuu ma kopi o lo o i luga o upega tafailagi, website a le Ofisa o le Fono, faapea foi kopi o lo o faaoga e le Ofisa o le Loia Sili faapea ma le Faamasinoga. E foliga mai e fa ni kopi po o ni lomiga o lo o taape, ma ua le mautinoa le kopi moni.

Lau Afioga i le Fofoga Fetalai, o le Tulafono o Fanua ma Suafa o le tausaga lea 2020, e le o i ai ni aiaiga mo agavaa moomia mo Faamasino o le Faamasinoga o Fanua ma Suafa, po o le a foi le umi o taimi o tofiga o latou tenure. Ia ma le leai foi o se aiaiga i le faia o totogi ma faamanuiaga o Faamasino.

Lau Afioga i le Fofoga Fetalai ma le mamalu o le Maota, a le faataatia nei aiaiga faavae i totonu o se Tulafono, o i e lamatia ai le tulaga tutoatasi o le Faamasinoga, i le ma le isi, ua leai foi se malos i le Pulega e faatatau ai aiaiga talafeagai mo Faamasino o le Faamasinoga o Fanua ma Suafa.

O le Tulafono o le Faamasinoga o Fanua 1981 lea na suia atoa i le Tulafono o le Faamasinoga o Fanua ma Suafa 2020, sa i ai aiaiga faavae nei o lo o taua i luga, e pei o agavaa moomia, taimi o tofiga faapea totogi ma faamanuiaga.

O le faafitauli lenei o lo o feagai ma le tatou Malo po o le pulega foi i le taimi nei. Ma ua i ai se manatu, o i inei lava i le Palemene e saili ai le fofo o le toe teuteu faasao ma faaatoatoa a tatou Tulafono. O lo o faaauau pea le pitolaau a le Pulega i sailiga mo ni fautuaga faaetulafono e tali atu i le faafitauli lenei. A ua manatu lau Afioga i le Fofoga Fetalai ma le mamalu o le Maota, o lea ua faataatia le Lipoti lea ua saunia e le tatou Ofisa o le Fono, ma e ao ona fai i ai se tatou galuega.

Ma i le itu lea, faapea foi ma se faasoa i se finagalo o le Fofoga Fetalai, ou te tulai ai e faatu se lafo, *Ina ia faataatiaese aiaiga o Tulafono Tumau e ono noatia ai le tofa o le Komisi Suesue Faapitoa a le Palemene, ma ia faamaonia le tofia i ai o sui usufono ua taua i lalo:*

1. *Afioga AUUAPAAU Mulipola Aloitafua Mulipola - Taitaifono*
2. *Afioga Hon LOAU Solamalemalo Keneti Sio - Sui Taitaifono*
3. *Afioga VAELE Paiaaau Iona Paiaaau Sekuini - Taitaifono*
4. *Afioga FALEOMAVAEGA Titimaea Tafua - Sui Usufono*
5. *Afioga LAUMATIAMANU Ringo M. Purcell - Sui Usufono*
6. *Tofa Hon TUUU Anasii Leota - Sui Usufono*
7. *Afioga ALAIASA Moefaauouo Malagaitutogiai Sepulona Moananu - Sui Usufono*

O Taiala o Galuega a le Komisi Suesue Faapitoa e fautuaina ai lenei:

1. Ia lauliliu le matafaioi a le Palemene e ao ona fai pe a tulai mai mataupu faapenei.
2. E taua ona sailia ma tuliloa e lenei suesuega le amiotonu o le faagasologa na faatino ai le faaofi o teuteuga ua maua e pei ona aliaie mai ai le eseese o lomiga o tulafono ua i ai nei.
3. Silasila i aafiaga faaetulafono na faatino ai lea galuega.
4. Le tuuina mai o ni fautuaga mo se alafua e ao ona faataoto mo se fofo mo mataupu faapenei i le toe tulai mai i le lumanai.

Ma e mulimuli ane, ia toe lipoti mai le Komisi i le Fono Aoa o se fonotaga lata mai.

Lau Afioga i le Fofoga Fetalai ma le mamalu e o le tatou Palemene, o le lafo lenei ma le agaga faaloalo e amatalia ai le tatou galuega, ona o tatou lava e ou le Tulafono, e tataua foi ona tatou faia le fofo o le mea ua tulai mai.

Ia o le lafo lea ma le faaloalo i lau Afioga.

Faaluaina e le Sui Palemia ma le Minisita o Faatoaga ma Faigafaiva.

Na faamaonia le lafo.

FOFOGA FETALAI: O lea ua tatou taunuu mai i le faaiuga o le tatou fonotaga faaumiumi sa feagai ai. E i ai le talitonuga ua faaaogagase le paia

o le Palemene. E le o toe natia le tulaga o i ai le tatou atunuu i lenei vaitau. E le gata o le suiga o le tau, ae o aafiaga o le faamai. E le natia foi e i ai nisi taimi o tatou tualumaga e oo atu lava i le tuneva o le po, peitai, sa maopoopo lava le faagasologa o le tatou galuega. E ui foi sa foliga e pei e tetele i pesega i nisi taimi, ae sa toafilemu lava peau o le tofa fefulisai i le maualuga o le tatou Maota. E momoli atu ai lava le faafetai a le Fofoga Fetalai i le paia o le Palemene i lo outou onosai ma le fefaapalepaleai. E le o tuuaunoaina lo tatou valaauina mo le sailiga o manuia mo le tapuaiga a le atunuu.

Lau Afioga i le Palemia ma le mamalu o le Kapeneta faapea le lagolagosua a Minisita Lagolago, ua faamalo fai o le faiva. O lo o tele galuega faatino a lo tatou Malo, ae sa outou onosai lava ina ia mafai ona faatino le tatou fonotaga. Ua faafofoga le mamalu o le Maota ma le tapuaiga a Samoa i fuafuaga ma faiga faavae ua outou faataoto mo le manuia o Samoa, malo faafetai!

E fia afea foi i sa matou gagana lea itu o le Maota. Ua tatou le mafuta ai ma le Afioga i le Taitai o le Itu Agai. Ae lau Afioga i le Sui Taitai ma le mamalu o lena Itu, e momoli atu le faafetai tele ua laulausasa lo outou tamaoiga e ala i tomai ma le tofa e tuualalo ma fautua ai le tatou Malo, malo faafetai. E i ai lava le talitonuga, o la outou taulagalaga ma le fautuaga ua fesoasoani tele i le tatou Malo ma lana faatonufofou, o aga ia faatemokarasi. Faafetai i le uunaia o lo outou faiva faa-Itu Agai, malo le tofa ma le uta mamao. E sailigata figota o le moana uli, ae ua malo faafetai tapena. Ui i lea, e leai se faiva e asa ma se maumau, a o se laolao e faamalulu atu ai le Fofoga Fetalai. Afai ua sipa le lamaga i le taitaiga o le tatou galuega, e matua atu le Nofoa i le tofa a le Maota ia alofa ma faamagalalo.

I le tapuaiga a Lana Afioga i Le Ao Mamalu o le Malo ma lau Masiofo, lau Afioga i le Sui Tofia ma lou faletua, lau Afioga i le Faamasino Sili ma lou faletua ma le mamalu o le Faamasinoga, le tapuaiga a faauluuluga o Ekalesia Kerisiano uma i le atunuu ma le aufaigaluega tofofi o le talalelei, le maimoa faafofoga mai a Samoa i ou paia ma mamalu faaleaganuu, aemaise foi o le taputapu mai a nai o tatou uso i Sasae. Ua faamalo tapuai, faafetai mo talosaga molia, ua manuia le alofaiva o lau Palemene ona o lo o mau pea le toovae i lau tapuaiga. E faamalulu atu foi pe afai ua sala se upu ma se gagana a lau Palemene, ia alofa ma lafoai i nuu le aina.

E momoli atu foi le faafetai i le tapuaiga a Ofisa Sili o Pulega o Matagaluega ma Faalapotopotoga Tumaoti a lo tatou Malo, malo tapuai, faafetai mo le auaunaga lagolago i tualumaga a le Palemene.

E le faagaloina foi se faafetai i le auaunaga faifaipea a malu o le Malo i le leoina o le saogalemu o le tatou Maota. E faapena foi le auaunaga a le Pulega o le Tinei Mu ma le Matagaluega o le Soifua Maloloina mo le tausiga o le puipuiga tau soifua maloloina o le tatou maota. Le auaunaga masani a le Matagaluega o Fesootaiga ma Faamatalaga Tekonolosi mo le faasalalauina e le 2AP o tatou tualumaga. E faapea foi i nisi o kamupani tumaoti o lo o

galulue faatasi mo le tautuaina o le tatou Maota i taimi o taualumaga, malo faafetai mo le auaunaga. Ia tatou talosia ia le agalelei o le Atua i lenei vaitau ma le feagai ai o le tatou atunuu ma puipuiga o le faamai. Na o le Atua lava e mafai ona ia faalafi ma faalilo i tatou i lona faleapitaga mai aso faigata ma puapuaga o le ola nei. O le tatalo a le Nofoa, ia malutia le soifua o le tatou Palemene i le puipuiga a le agaga paia, ina ia momoli atu lo outou soifua i se aso o le a tolopo i ai le tatou Fono ma tatou toe feiloai ai ma faaauau le tatou galuega.

Ae tatou te le i tolopo, ou te talosaga atu i le Afioga i le sui usufono mamalu o Faleata 4 e te saunia se tatou tatalo e faaiu ai le tatou fonotaga.

Na tolopo Taualumaga a le Fono Aoao Faitulafono i le itula e 8:52 i le po seia aulia le itula e 9:30 i le taeao o le Aso Lua, 15 o Fepuari 2022.